



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>

604.7
A60.4cd
1957

יהוה



S. ANSELMI CANTUARIENSIS

LIBRI DUO

CUR DEUS HOMO

RECOGNOVIT

HUGO LAEMMER

**PHIL. DOCTOR S. S. THEOL. LICENTIATUS IN UNIV. LITER. BEROL.
PRIV. DOCENS SOCIET. HISTOR.-THEOL. LIPS. SOCIUS ORD.**



BEROLINI
SUMTIBUS GUST. SCHLAWITZ.
1857.

Recd. Aug. 23, 1871.

604.7
A60.4 ed
1857
cop. 1

PRAEFATIO EDITORIS.

S. Anselmus, scholasticorum doctorum princeps,¹⁾ a. 1033 in Augusta Praetoria civitate Pedemontana natus est parentibus et divitiis et nobili genere insignibus. Pater quidem Gundulfus rerum familiarium incuriosus nec tam largus quam prodigus, prae negotiis saecularibus instituendum neglexit filium, mater autem Ermenberga officiis domesticis probe functa inde a prima pueritia illius pectus pietate studuit imbuere. In disciplinam traditus literasque edoctus, quum nondum attigisset aetatis annum quintum decimum, A. de vitae monachicae, quam Deo maxime acceptabilem existimavit, genere deligendo multum ac cum ardore quodam cogitavit; verum spe frustratus, fore ut contra voluntatem

1) Cfr. *Eadmeri Cantuar. Monachi Ord. S. Bened.* [qui S. Ans. auditor et discipulus exiliorumque et laborum individuus comes fuit], testis fide satis digni „*Libri Duo de Vita S. Anselmi*“ nec non „*Historia Novorum*.“ ed. Maur. — „*Dr. I. A. Möhler's Gesammelte Schriften und Aufsätze. Herausg. v. Döllinger.*“ Ratisb. 1839 sq. I, 3, 32 sq. — „*Anselm von Canterbury. Dargestellt von F. R. Hasse.*“ 2 Tomi Lips. aa. 1843 et 1852 ed., quorum unus vitam, alter doctrinam S. Ans. complectitur.

paternam in coenobium reciperetur, paullatim fervorem religiosum prorsus abiicere incepit animumque antea studiis deditum distinare mundanis deliciis, ita tamen, ut quamdiu mater dilecta esset superstes, claustra pudoris non perfringeret. At enim defuncta Ermenberga, „illico navis cordis eius, quasi anchora perdita, in fluctus saeculi paene tota dilapsa est.“ Accessit, quod Dei inscrutabilis sapientia permisit et in Anselmi salutem vertit, Gundulfi patris contra filium in dies crescens odium acerbaque indignatio, quae humilitate non modo leniri nequuit, sed etiam exaggerata est. Hinc patria relicta, iuvenis posteaquam Alpes haud sine magnis laboribus superavit, in Burgundia et Francia triennium transiit; deinde Abrincae, quae urbs in Normannia sita est, aliquamdiu demoratus monasterium celeberrimum Beccense petiit, cui Herluinus praefuit Abbas, Prior autem Lanfrancus. Huius ipsius scholastici pietate pariter ac sapientia et eruditione multimoda conspicui fama, quae clericos ex omnibus ferme occidentalibus terris praestantissimos undique allexit, non potuit non efficere, ut Anselmus se eius subderet magisterio studiosus. Cum amore vanitatis et insolentiae diu conflictatus et ex huiusmodi vexationibus victor egressus, Becci XXVII annos natus monachalem habitum assumpsit hunc in finem, ut Deus solus sua requies et intentio, solus amor eius contemplatio sua, beata et assidua memoria eius felix solamen et satietas sua fieret. Tribus annis peractis, Lanfranco Cadomensis coenobii regimen adepto successit in gradu Prioris, ac defuncto Herluino a. 1078 unanimi Fratrum consensu Abbas Beccensis promotus est. Orationibus vigiliis meditationibus insistens, coelestibus studiis imbutus, monachis erudiendis admonendis corrigendis

dis intentus, firmis et infirmis, sanis et insanis se praestitit patrem omnibusque exhibuit exemplum. sanctarum virtutum exercitiis imitabile. Magna eius gloria circumquaque percrebuit atque multis consilium et solamen requisituris ansam dedit eum ad-eundi privatis colloquiis. — Quadriennio post obitum Lanfranci, qui ab a. 1070 ad a. 1089 usque cathedram Cantuariensem obtinuerat, Anselmus a Guilelmo huius nominis secundo Angliae, rege, suadentibus principibus et acclamantibus clero laicisque, archiepiscopus designatus ac pridie Non. Decembr. a. 1093 Cantuariae ab episcopis regni consecratus est. Graves autem eum inde ex hoc munere suscepto manserunt aerumnae et miseriae. Neque enim fieri potuit, quin ecclesiasticae libertatis propugnator, quum libidinibus Guilelmi devastandis ecclesiarum bonis oppimendisque monasteriis et pecuniis per vim exigendis assueti resisteret, in furorem concitaret regiam mentem. Quare nihil mirum, si saepe protestatus est se maluisse in congregatione monachorum pueri loco inter pueros sub virga magistri pavere, quam per pastorem curam toti Britanniae praelatus in conventu popu-lorum cathedrae pontificali praesidere. Maxima inter regem et archiepiscopum de Urbano II. Papa agnoscendo exorta nec soluta dissensio coegit Anselmum, variis tribulationibus satis defessum, sub finem a. 1097 Angliam relinquere et ad sedem apostolicam confugere. Nec Romae exul quod sum-mopere expetiit, ut onere archiepiscopali liberaretur, a summo pontifice impetravit. Etsi autem Urbanus per biennium cum rege de Anselmo restituendo et pace ecclesiae Britannicae redintegrandae strenue egit, tamen omnes preces minae ac labores in cassum reciderunt. Henricus demum primus, Guilelmi

frater et successor, desiderio Anglorum vehementi satisfaciens exulem in Italia et Francia demoratum a. 1100 honorifice revocavit. At haud diu haec pax stetit. Decreta enim concilii Romae a. 1100 celebrati, quod excommunicationis sententiam tam in laicos qui investituras ecclesiarum darent, quam in clericos qui de manibus laicorum istas susceperent, intorserat, — materiam novarum contentionum praebuerunt et rixarum. Anselmus, quippe qui eorum vindex adversus tyrannidem Henrici exurgere non dubitaret, a. 1103 iterum Anglia excedere coactus est. Conditionibus autem restaurandae concordiae excussis et lite de presbyteris per annulum et baculum investiendis prorsus diremta, a. 1106 cathedram Cantuariensem magno totius populi gaudio recuperavit. Spiritu fortis, carne fragilis illucescente aurora quartae feriae solemnia paschalia A. D. I. 1109 praecedentis in pace obiit.

Inter omnes libros, quos S. Anselmus fidei christianae mysteria perscrutatus divinaeque sapientiae thesauris demersus mirabili ingenii acumine composuit, operi CUR DEUS HOMO inscripto — sive theologicam eius dignitatem perpendamus, sive quantum momenti ad ecclesiasticum de satisfactione dogma conformandum habuerit respiciamus — primas esse vindicandas partes constat.¹⁾ De quo

1) Cfr. C. Schwarz, De satisfactione Christi ab Anselmo Cantuariensi exposita. Gryphiae 1841. — Hasse l. c. II, 3, 12. p. 485 sq. 607 sq.: „Ans. ist der Erste, welcher eine eigentliche *Theorie* der Versöhnung aufgestellt hat. Und schon hieraus begreift sich der ausserordentliche *Einfluss*, welchen unsere Schrift auf die ganze *Folgezeit* ausgeübt hat. Denn es war doch nun eine feste *Grundlage* gegeben, an die alle weitem Theologumena über den Gegenstand anknüpfen konnten. — So weit sich von einem *Dogma* in

haec fere sunt quae praefanda esse videantur. Ac primum quidem investigemus, quibusnam *causis* internis externisque adductus A. scriptum illud confecerit. Iam Priorem Beccensem, per fidem ad intellectum proficiendi studiosum, vim rationemque mortis Christi vicariae — ex qua pendet humana salus — mente agitasse, patet ex Dialogo „de Veritate,“ cuius origo in annum circiter 1065 est referenda, cuiusque in capite octavo quatenus eadem res debeat esse et non esse edisserens, inter alia: „Dominus Iesus, inquit, quia solus innocens erat, non debuit mortem pati nec ullus eam illi debuit inferre, et tamen eam debuit pati, quia ipse sapienter et benigne et utiliter voluit eam sufferre.“ In lectione autem patrum ecclesiae veteris (Hilarii, Ambrosii, Augustini, Leonis M., Gregorii M. all.)¹⁾ — quorum post s. apostolos nec voces flocci pependit et vestigia pie studuit premere — quum scholae monasteriali praepositus multum sudaret, de notionibus redemptionis et reconciliationis invenit exposita, in quibus sibi non acquiescendum esse existimavit. Quamvis enim omnes inde ab ecclesiae primordiis testes illi veritatis sanguini Salvatoris non potuerint vim quae ei debetur propitiatoriam ac satisfactoriam non attribuere, hos tamen prae aliis fidei articulis instituenda in *causas* incarnationis et passionis Christi per eundemque comparatae humano generi salutis *modum* inquisitione accurata

dieser Beziehung reden lässt, muss man unsern Scholastiker als den ersten Begründer desselben betrachten. — Von keiner seiner Schriften lässt sich so sehr behaupten, wie von den BB. Cur Deus Homo, dass sie für die gesammte Kirche Frucht getragen und ihrem innersten Leben zu Gute gekommen ist.“

1) Vide S. Ans. *Epistolarum* Lib. IV, 106.

et rei amplae profundaeque congrua mirum quantum supersedissee, necnon aequo plus crucem diabolo iuste hominem vexanti quasi muscipulam tensam ursisse, nescit nemo in historia dogmatum christianorum versatus. At vero S. Anselmus non sat habuit cum patribus *convenientiam* asserere salvationis, qualem Dei filius humanitate in personae unitatem assumpta effecit, neque tantummodo *contentiones* inter Adamum et Christum illiusve inobedientiam peccatumque mortiferum et huius obedientiam iustitiamque vivificam absque dubio concinnas voluit fieri, sed *necessitatem* divinae humiliationis demonstrandam atque *rationabilem soliditatem* veritatis, cuius principia et germina apud superiorum temporum doctores indagavit, esse explicandam habuit persuasum. Praeterea autem argumentationibus istorum, qui tam diabolum per lignum in paradiso victorem aliquam in possidendo homine iustitiam mortisque imperium habuisse defenderunt, quam eundem corpore Domini in mortem rapti hami divinitatis in eo inclusi imprudentem esse devictum illusumque censuerunt, — prorsus dubitavit album adiciere calculum. Neque enim ullo iure Anselmo visus est peccatum peccatique poenam diabolus ab hominibus ante passionem dominicam exegisse; ac scholasticus noster quoniam recte Veritatem ullum fallere negavit, virtutem divinam humana humilitate hunc in finem opertam, ut falleretur falleretve se qui fallendo hominem de paradiso deiecisset diabolus, concedere nequii. Huiusmodi igitur — quoad dogma satisfactionis — offendicula legenti patrum scripta Becci iam occurrerunt, quae in dies adaucta sibi evelli non posse vidit, nisi ipse rem exacta demonstratione egentem retractando et partes a maioribus relictas expleret et veritatem

illorum de satanae fallacia disputationibus involutam mythica exueret forma. Accessit, quod tunc temporis haec eadem de ratione divinae incarnationis deque interna inter mortem Christi mundique vitam connexionem quaestio multorum fidelium non solum literatorum et clericorum sed etiam illiteratorum et laicorum occupavit animos. Fuere potissimum qui dubitarent, an redemptio sola voluntate iussu divino aut per aliam quam per Dei personam seu angelicam seu humanam fieri potuerit; quique obiectionibus infidelium simplicitatem christianam quasi fatuam deridere ac contradictiones in christiana fide obvias arroganter ementiri solitorum redarguendis et refellendis se agnoscerent impares. Inde factum est, ut saepe S. Anselmi in similibus cogitationibus defixi exquirerent consilium ab eoque eximi in quibus haeserunt de perdifficili illa quaestione scrupulos studiose peterent; nec defuerunt qui ut harum disputationum summam consignaret literis, enixe rogarent fidei intellectu delectati. Haec itaque omnia dederunt nostro ansas conficiendi tractatum „Cur Deus Homo“ inscriptum, quem ne differret evulgare, inter alios maxime Boso Monachus ¹⁾ flagitavit et impetravit.

1) Cum quo S. Anselmus fuit coniunctus arctissimo paternitatis spiritualis vinculo. Cfr. *Eadmerus De Vita S. A.* 1, 12: „— quidam Clericus aetate iuvenis, Boso nomine, Beccum venit Abbatis colloquium expetens. Erat enim idem acer ingenio et quibusdam perplexis quaestionibus involverat animum, nec reperire quemquam poterat qui eas sibi ad votum evolveret. Loquens igitur cum Anselmo ac nodos ei sui cordis depromens, omnia quae desiderabat ab eo sine scrupulo disceptationis accepit. Miratus ergo hominem est et nimio illius amore devinctus. Dehinc ergo quum eius allocutione familiariter potiretur, illectus ad contentum saeculi emenso brevi spatío, Becci Monachus factus

Iam vero de *tempore* compositi et editi huiusce operis erit agendum. Monasterio Beccensi relicto S. Anselmus posteaquam a. 1093 in Angliam transmigravit, quantum scribendi otium ipsi superfuit ante omnia eo esse conferendum arbitratus est, ut litem per Roscelinum canonicum Compendiensem nominalistam eundemque tritheistam in ecclesia Gallicana concitatam atque in synodo Suessionensi non sedatam nisi per speciem prorsus dirimeret doctrinae armis adiutus. Hinc libro egregio „de fide trinitatis“ Becci inchoato in Britannia novitius extremam manum imposuit eoque adversarii istius sophismata confutavit sagacissimus dogmatis ecclesiastici propugnator. Quo facto tractatum „Cur Deus Homo“ aggressus, iam per aestatem anni 1094 eius librum primum a Fratre Ermero ¹⁾ transcriptum ad ecclesiam Beccensem direxit. Nec mirum, si haec particula operis diu expectati ac vehementer desiderati, auctore inscio et invito, multis exemplis brevi tempore longe lateque circumferebatur. Secuta dein sunt proelia in favorem libertatis

est. Cuius conversioni simul et conversationi diabolus graviter invidens, in tantam illum tentationis procellam demersit, ut succedentibus sibi variis cogitationum tumultibus vix mentis suae compos existeret. Transierunt in hoc quidam dies et seipsa semper fiebat immanior tentatio eadem Turbatus ergo et mente confusus Anselmum adiit animique sui fluctus illi exposuit. At ipse quum singula intellexisset, hoc solum pio affectu, scil. „consulat tibi Deus,“ ei respondit illicoque Fratrem a se dimisit. Evestigio autem tanta tranquillitas mentis illum secuta est, ut sicut ipsemet mihi referebat, ultra quam dictu credibile sit, subito alius fieret ab eo qui fuit. Itaque omnis illa tentatio penitus evanuit nec quicquam huiusmodi in se ulterius sensit.

1) Quem auctor *Epp.* 3, 25 (cfr. 1, 17) carissimum filium suum et baculum senectutis suae appellat.

ecclesiasticae a. S. Anselmo contra Guilelmum regem suscepta; quae dum gerebantur, nostro denegata est opportunitas saepe in remotiorem camerae locum secedendi coelestibusque studiis inhaerendi; ac variae tribulationes eum coegerunt, in longinquum tempus differre voluminis illius coepti consummationem. Tandem flumini se obvium ferre solum impotens ad sedem apostolicam confugit; id quod supra pag. V enarravimus. Per hoc autem exilium Italicum Iohannes Abbas coenobii S. Salvatoris apud Telesim in Capuana provincia siti, olim Monachus Beccensis et S. Anselmi discipulus, magistrum carissimum ut in ipsius villa Sclavia menses a. 1098 aestivos transigeret hospitaliter invitavit. Huc itaque devertit exul et hac in habitatione montuosa turbarumque tumultu vacua vacavit die noctuque cum divinae contemplationi tum secundo nostri tractatus libro conficiendo, quamquam spatium quaestionibus quae restiterant enodandis satis congruum nactus non est. In Angliam reversus, scripti totius apographum per monachos Cantuarienses curatum anno ferme 1104 Paschali huius nominis secundo Papae transmisit.¹⁾

Quoad *indolem* operis *internamque oeconomiam*, id quare inscripserit „Cur Deus Homo,“ quidve fuerit cur in libros distinxerit duos, ac quale eorum sit discrimen materiale, — S. Anselmus ipse in Praefatione sua exposuit. Dialogi autem formam L. I c. 1 s. f. ideo se fatetur adhibuisse, „quoniam ea quae per interrogationem et responsionem investigantur, multis et maxime tardioribus ingeniis magis patent et ideo plus placent;“ quod quidem

1) Cfr. S. Ans. *Epistolarum* Lib. IV, 55.

auctoris studium se ad gradus lectorum eruditionis varios accomodandi laude omni dignum et ex ansis illis ei ad scribendum datis derivandum ne minimum quidem contraxit damnum admirabili sane subtilitati argumentationum. Egregie et exquisite S. Ven. *Hasse*¹⁾ tractatus structuram ita descripsit, ut praeter Prologum (I, 1—10) et Epilogum (II, 16^a—22) tres statueret partes, quarum prima (I, 11—19) satisfactionem evincit conditionem, sine qua remissio peccatorum fieri non possit; secunda (I, 20—24) hominem peccatorem demonstrat quam debeat Deo satisfactionem pro peccato eam reddere nequire et nisi reddiderit salvari non valere; tertia denique (II, 1—15) neminem concludit nisi Deum hominem eumque crucifixum satisfactionem illam debitam Deo praestare ac mundi peccata delere posse. Quaestionis summam Boso collocutor L. II c. 17 s. f. acute comprehendit; misericordiam vero Dei iustitiae concordem hoc tractatu se non evertisse sed qua par est ratione astruxisse auctor (II, 20) evidenter et dilucide ostendit.²⁾

Gabriel *Gerberon*, Presbyter ac Monachus Benedictinus ex Congregatione S. Mauri, qui sua S. Anselmi Operum editione³⁾ optime pro re critica

1) „Anselm v. Canterbury.“ II, 572 sq.

2) Cfr. „Geschichtliches aus der Versöhnungs- und Genugthuungslehre. *Anselmus*.“ in: „Evangelische Kirchen-Zeitung.“ 1834. n. 1—3. max. pag. 12 sq.

3) „*Sancti Anselmi Ex Beccensi Abbate Cantuariensis Archiepiscopi Opera Nec Non Eadmeri Monachi Cantuariensis Historia Novorum, Et alia opuscula: Labore ac studio D. Gabrielis Gerberon Mon. Congr. S. Mauri ad Mss. fidem expurgata et aucta. Secunda editio correctata et aucta. Lutetiae Parisiorum — MDCCXXI.*“

meruit, ad *textum* librorum „Cur Deus Homo“ inscriptorum nativae integritati ac puritati restituendum undequaque corrogavit consulitque novem codices manuscriptos hos: scil. tres Victorinos (A a b c),¹⁾ unum Iolianum (B) et quinque alios bibliothecarum Cisterciensis (C), monasterii S. Michaelis in dioecesi Verodunensi siti (D), Gemmeticensis (E) ac Beccensis (F a b).²⁾

At enim vero vir ille doctus, cuius industriae accurata et scrupulosa collectio variarum lectionum in codicibus obviarum debetur,³⁾ non proinde atque hi ipsi postulabant, locos depravatos emendare et conformare ausus est; nec semel scripturam quam libri tuebantur omnes, in textum recipere apertave librariorum menda tollere dubitavit. Hinc non defuerunt in quibus haec nostra editio elaboraret. Qua in adornanda penum criticum sedulitate Gerberoniana nobis subministratum religiose excussimus; codicum in verbis singulis et capitum partitione⁴⁾ consensum numquam non retinimus; ubi genuinam auctoris orationem restaurare studiosi a textu vulgato discessimus, testium auctoritate apposita lectiones varias conferendi et diiudicandi facultatem dedimus lectoris, quibus ipsis supellectilem brevium annotationum haud ingratam fore speramus.

1) Quae lunulis inclusimus sigla, iis in apparatu nostrae editionis critico sumus usi.

2) Cfr. Bern. de *Montfaucon*, Bibliotheca Bibliothecarum Manusc. Nova. Paris. MDCCXXXIX. Tom. II, 1369. 1347. 1178. 1208. 1252.

3) S. Ans. Opp. ed. Gerb. P. 611 — 621 s. h. t.: „Castigationes Et Variæ Lectiones Librorum Cur Deus Homo.“

4) Cuius quidem origo in omnibus scriptis ad S. Anselmum ipsum referenda esse videtur. Cfr. *Epist.* 4, 42.

Sed haec hactenus. Quod reliquum est, Deum Trinum qui operatur velle et perficere pro bona voluntate, ut opellam hanc meam in tractatu S. Anselmi aureo edendo consumtam Ipse agnoscat approbet et ad studium libri singularis salubre promovendum facere iubeat, pie precor.

Ser. Berolini mense Iulio a. 1857.

PRAEFATIO S. ANSELMI.

Opus subditum propter quosdam, qui antequam perfectum et exquisitum esset, primas partes eius me nesciente sibi transscribebant, festinantius quam mihi opportunum esset, ac ideo brevius quam vellem sum coactus, ut potui, consummare. Nam plura quae tacui, inseruissem et addidissem, si in quiete et congruo spatio illud mihi edere licuisset. In magna enim cordis tribulatione, quam unde et cur passus sim novit Deus, illud in Anglia rogatus incepti et in Capuana provincia peregrinus perfecti. Quod secundum materiam de qua editum est, CUR DEUS HOMO nominavi et in duos libellos distinxi. Quorum prior quidem infidelium respicientium christianam fidem, quia rationi putant illam repugnare, continet obiectiones et fidelium responsiones; ac tandem remoto Christo — quasi numquam aliquid fuerit de illo — probat rationibus necessariis, esse impossibile ullum hominem salvari sine illo. In secundo autem libro similiter, quasi nihil sciatur de Christo, monstratur non minus aperta ratione et veritate, naturam humanam ad hoc institutam esse, ut aliquando immortalitate beata totus homo

i. e. in corpore et in anima frueretur; ac necesse esse ut hoc fiat de homine, propter quod factus est; sed non nisi per hominem Deum, atque ex necessitate omnia quae de Christo credimus, fieri oportere. Hanc *Praefatiunculam cum Capitulis* totius operis omnes qui librum hunc transscribere volent, ante eius principium ut praefigant postulo; quatenus in cuiuscunque manus venerit, quasi in eius fronte aspiciat, si quid in toto corpore sit quod non despiciat.

CAPITULA.

I.

1. Quaestio, de qua totum opus pendet.
2. Quomodo accipienda sunt ea, quae dicenda sunt.
3. Obiectiones infidelium et responsiones fidelium.
4. Quod hae responsiones videantur infidelibus sine necessitate et quasi quaedam picturae.
5. Quod redemptio hominis non potuit fieri per aliam quam per Dei personam.
6. Quomodo reprehendant infideles, quod dicimus Deum morte sua nos redemisse et sic dilectionem suam ergo nos ostendisse et pro nobis expugnare diabolum venisse.
7. Quod nullam diabolus habebat iustitiam adversus hominem, et quare videatur habuisse, et cur Deus hoc modo hominem liberaverit.
8. Quomodo, licet humilia quae dicimus de Christo, non pertineant ad divinitatem, inconueniens videatur infidelibus ea de illo dici secundum hominem, et unde illis videatur idem homo non sponte mortuus esse.
9. Quod sponte mortuus sit, et quid sit *factus est obediens usque ad mortem, et propter quod Deus illum exaltavit,*

*

et non veni facere voluntatem meam, et proprio Filio suo non pepercit, et non sicut ego volo, sed sicut tu vis.

10. Item de eisdem, quomodo aliter recte intelligi possunt.
11. Quid sit peccare et pro peccato satisfacere.
12. Utrum sola misericordia sine omni solutione deceat Deum peccata dimittere.
13. Quod nihil minus sit tolerandum in rerum ordine, quam ut creatura creatori debitum honorem auferat, et non solvat quod aufert.
14. Cuiusmodi honor Dei sit poena peccantis.
15. Si Deus vel ad modicum patiatur honorem suum violari.
16. Ratio cur numerus angelorum qui ceciderunt, restituendus sit de hominibus.
17. Quod alii angeli pro illis non possint restitui.
18. Utrum plures futuri sint sancti homines, quam sint mali angeli.
19. Quod homo non possit salvari sine peccati satisfactione.
20. Quod secundum mensuram peccati oporteat esse satisfactionem, nec eam homo per se facere possit.
21. Quanti ponderis sit peccatum.
22. Quam contumeliam fecit homo Deo, cum se permisit a diabolo vinci, pro qua satisfacere non potest.
23. Quid abstulit Deo cum peccavit, quod reddere nequit.
24. Quod quamdiu homo non reddit Deo quod debet, non possit esse beatus nec excusetur impotentia.
25. Quod ex necessitate per Christum salvetur homo.

II.

1. Quod homo a Deo factus sit iustus, ut Deo fruendo beatus esset.
2. Quod homo non moreretur, si non peccasset.

3. Quod cum corpore in quo vivit in hac vita, homo resurget.
4. Quod de humana natura perficiet Deus quod incepit.
5. Quod quamvis hoc necesse sit fieri, tamen hoc non faciet cogente necessitate, et quae sit necessitas quae aufert gratiam aut minuit, et quae necessitas augeat.
6. Quod satisfactionem per quam salvatur homo, non possit facere nisi Deus homo.
7. Quod necesse sit eundem ipsum esse perfectum Deum et perfectum hominem.
8. Quod ex genere Adae et de Virgine femina Deum oporteat assumere hominem.
9. Quod necesse sit Verbum solum et hominem in unam convenire personam.
10. Quod idem homo non ex debito moriatur, et quomodo possit vel non possit peccare, et cur ille vel angelus de sua iustitia laudandus sit, cum peccare non possint.
11. Quod moriatur ex sua potestate et quod mortalitas non pertineat ad puram hominis naturam.
12. Quod quamvis incommodorum nostrorum particeps sit, miser tamen non sit.
13. Quod cum aliis infirmitatibus nostris ignorantiam non habeat.
14. Quomodo mors eius praevaleat numero et magnitudine peccatorum omnium.
15. Quomodo deleat mors eadem etiam peccata eum perimentium.
- 16^a. Qualiter Deus de massa peccatrice assumsit hominem sine peccato, et de salvatione Adae et Evae.
- 16^b. Quomodo non necessitate mortuus est, qui non potuit esse nisi quia erat moriturus.
17. Quod in Deo non sit necessitas vel impossibilitas, et quid sit necessitas cogens et necessitas non cogens.

18. Quomodo vita Christi solvatur Deo pro peccatis hominum, et quomodo Christus debuit et non debuit pati.
 19. Qua ratione de morte eius sequatur humana salvatio.
 20. Quam magna et quam iusta sit misericordia Dei.
 21. Quod impossibile sit diabolus reconciliari.
 22. Quod in his quae dicta sunt, veritas Veteris et Novi Testamenti probata sit.
-

S. ANSELMI CANTUARIENSIS

LIBER PRIMUS

CUR DEUS HOMO.

1. Saepe et studiosissime a multis rogatus sum 1 et verbis et literis, quatenus cuiusdam quaestionis de fide nostra rationes, quas soleo respondere quaerentibus, memoriae scribendo commendem; 1) dicunt enim sibi placere eas et arbitrantur satisfacere. Quod petant, 2 non ut per rationem ad fidem accedant, sed ut eorum quae credunt intellectu et contemplatione delectentur; et ut sint, quantum possunt, parati semper ad satisfactionem omni poseenti se rationem de ea quae in nobis est spe. 2) Quam quaestionem solent et infideles 3 nobis simplicitatem christianam quasi fatuam deridentes obicere, et fideles multi in corde versare: qua scilicet ratione vel necessitate Deus homo factus sit, et morte sua, sicut nos credimus et confitemur, mundo vitam reddiderit; cum hoc aut per aliam personam, sive ange-

1) *commendarem A a B.*

2) Cfr. 1. Petr. 3, 15: ἔτοιμος δὲ εἰς πρὸς ἀπολογία
παντὶ τῷ αἰτοῦντι ὑμᾶς λόγον περὶ τῆς ἐν ἡμῖν ἐλπίδος.

licam sive humanam, aut sola voluntate facere potuerit.
 4 De qua quæstione non solum literati, sed etiam illite-
 5 rati multi quaerunt et rationem eius desiderant. Quo-
 niam ergo multi de hac tractari postulant, et licet in
 quaerendo valde videatur difficilis, in solvendo tamen
 omnibus est intelligibilis, et propter utilitatem ratio-
 nisque pulchritudinem amabilis; quamvis a sanctis pa-
 tribus inde quod sufficere debeat, dictum sit, tamen
 de illa curabo, quod mihi Deus dignabitur aperire,
 6 petentibus ostendere. Et quoniam ea quae per inter-
 rogationem et responsionem investigantur, multis et
 maxime tardioribus ingeniis magis patent et ideo plus
 placent; unum ex illis qui hoc flagitant, qui inter alios
 instantius ad hoc me sollicitat, accipiam mecum dispu-
 tantem, ut *Boso* quaerat, et *Anselmus* respondeat hoc
 modo.

1 **2.** *Boso.* Sicut rectus ordo¹⁾ exigit, ut pro-
 funda christianæ fidei credamus, priusquam ea praesu-
 mamus ratione discutere; ita negligentia mihi videtur, si,
 postquam confirmati sumus in fide, non studemus quod
 2 credimus intelligere. Quapropter quoniam gratia Dei prae-
 veniente fidem nostrae redemptionis sic puto me tenere,
 ut etiam si nulla ratione quod credo possim compre-
 hendere, nihil tamen sit quod me ab eius firmitate va-

1) Cfr. *Proslogium* c. 1: „Non tento, Domine, penetrare altitudinem tuam, quia nullatenus comparo illi intellectum meum; sed desidero aliquatenus intelligere veritatem tuam, quam credit et amat cor meum. Neque enim quaero intelligere, ut credam; sed *credo, ut intelligam.* Nam et hoc credo, quia nisi credidero, non intelligam.“ — Qualem S. Anselmus rationem fidei cum intellectu mutuam defenderit, accurate et subtiliter edisseruit *F. R. Hasse* in libro: *Anselm von Canterbury*. 3, 2. („Die allgemeinen Principien A.'s.“)

leat evellere; a te peto mihi aperiri, quod, ut scis, plures mecum petunt: qua necessitate scilicet et ratione Deus, cum sit omnipotens, humilitatem et infirmitatem humanae naturae pro eius restauratione assumserit? *Anselmus.* Quod quaeris a me, supra me 3 est, et idcirco altiora me tractare timeo, ne forte, cum putaverit aut etiam viderit aliquis me non sibi satisfacere, plus existimet rei veritatem mihi deficere, quam intellectum meum ad eam capiendam non sufficere. *Bos.* Non hoc tantum timere debes, quantum et remi- 4 nisci, quia saepe contingit in colloquendo de aliqua quaestione, ut Deus aperiat quod prius latebat; et sperare de gratia Dei, quia, si ea quae gratis accepisti, libenter impartiris, altiora ad quae nondum attigisti, mereberis accipere. *Ans.* Est et aliud, propter quod 5 video aut vix aut nullatenus posse ad plenum inter nos de hac re nunc tractari; quoniam ad hoc est necessaria notitia potestatis necessitatis voluntatis¹⁾ et aliarum quarundam rerum, quae sic se habent, ut earum nulla possit plene sine aliis considerari; et ideo tractatus earum suum opus postulat non multum, ut puto, facile nec omnino inutile; nam earum ignorantia quaedam facit difficilia, quae per earum notitiam fiunt facilia. *Bos.* Sic 6 breviter de his suis locis dicere poteris, ut et quod sufficiat ad praesens opus habeamus, et quod plus dicendum est in aliud tempus differamus. *Ans.* Hoc quoque 7 multum me retrahit a petitione tua, quia materia non solum pretiosa, sed sicut est de speciosa forma²⁾ prae filiis hominum, sic etiam est de speciosa ratione super intellectus hominum; unde timeo, ne, quemadmodum ego soleo indignari pravis pictoribus, cum ipsum Dominum nostrum informi figura pingi video, ita mihi contingat,

1) potestatis et necessitatis et voluntatis A a b c B C.

2) specioso forma A b c C E F a.

- si tam decoram materiam incomto et contentibili dictamine exarare praesumo. *Bos.* Nec hoc te debet retrahere, quia sicut tu permittis, ut qui potest melius dicat, sic nulli praestituis, ut cui dictamen tuum non placet, pulchrius non scribat; verum ut omnes excusationes tuas excludam, quod postulo non facies doctis, sed mihi et hoc ipsum mecum petentibus. *Ans.* Quoniam video importunitatem tuam et illorum, qui hoc tecum ex charitate et religioso studio petunt, tentabo pro mea possibilitate (Deo adiuvante et vestris orationibus, quas hoc postulantes saepe mihi petenti ad hoc ipsum promisistis) quod quaeritis non tam ostendere, quam tecum quaerere; sed eo pacto, quo omnia quae dico accipi volo: videlicet, ut si quid dixerò, quod maior non confirmet auctoritas, quamvis illud ratione probare videar, non alia certitudine accipiatur, nisi quia interim mihi ita videtur,¹⁾ donec Deus melius aliquo modo revelet. Quod si aliquatenus quaestioni tuae satisfacere potero, certum esse debet, quia et sapientior me plenius hoc facere poterit; imo sciendum est, quidquid homo inde dicere vel scire possit, aliorum res tantae rei adhuc latere rationes. *Bos.* Patere igitur, ut verbis utar infidelium; aequum enim est, ut cum nostrae fidei rationem studemus inquirere, ponamus objectiones eorum, qui nullatenus ad fidem eandem sine ratione volunt accedere. Quamvis enim illi ideo rationem quaerant, quia non credunt, nos vero, quia credimus; unum idemque tamen est quod quaerimus; et si quid responderis, cui auctoritas obsistere sacra²⁾ videat-

1) Cfr. *Monologium* c. 1: „In quo si quid dixerò, quod maior non monstret auctoritas, sic volo accipi, ut quamvis ex *rationibus* quae mihi videbuntur, quasi necessarium concludatur, non ob hoc tamen omnino necessarium, sed tantum sic *interim* videri posse dicatur.“

2) Reperitur haec lectio in omnibus Codicibus.

tur, liceat mihi illam obtendere, quatenus quomodo non obstat aperiās. *Ans.* Dic quod tibi videtur.

3. *Bos.* Obiiciunt nobis deridentes simplicitatem 1
nostram infideles, quia Deo facimus iniuriam et conta-
meliam, cum eum asserimus in uterum Virginis¹⁾ de-
scendisse, natum esse de femina, lacte et alimentis hu-
manis nutritum crevisse, et ut multa alia taceam, quae
Deo non videntur convenire, lassitudinem famem sitim
verbera et inter latrones crucem mortemque subiisse.
Ans. Nos non facimus Deo iniuriam ullam aut contu- 2
meliam, sed toto corde gratias agentes laudamus et prae-
dicamus ineffabilem altitudinem misericordiae illius; quia
quanto nos mirabilius et praeter opinionem de tantis
et tam debitis malis in quibus eramus, ad tanta et tam
indebita bona quae perdideramus, restituit, tanto maiorem
dilectionem erga nos et pietatem monstravit. Si 3
enim diligenter considerarent, quam convenienter hoc
modo procurata sit humana restauratio, non deriderent
nostram simplicitatem, sed Dei nobiscum laudarent sa-
pientem benignitatem. Oportebat namque ut, sicut per 4
hominis inobedientiam mors in humanum genus intra-
verat, ita per hominis obedientiam vita restitueretur. Et 5
quemadmodum peccatum, quod fuit causa nostrae damna-
tionis, initium habuit a femina, sic verae iustitiae et sa-
lutis nostrae auctor²⁾ nasceretur de femina; et ut dia-
bolus, qui per gustum ligni quem persuasit, hominem
vicerat, ita per passionem ligni quam intulit, ab homine
vinceretur. Sunt quoque alia multa, quae studioso con- 6
siderata ineffabilem quandam nostrae redemptionis hoc
modo procuratae pulchritudinem ostendunt.

1) Dedi *Virginis* c. Cod. B pro *mulieris* vulg.

2) Sic nostrae iustitiae et salutis auctor A a b c B
C E F a.

1 **4.** *Bos.* Omnia haec pulchra et quasi quaedam
 2 picturae suscipienda sunt; sed si non sit aliquid soli-
 3 dum super quod sedeant, non videntur infidelibus suffi-
 4 cere, cur Deum ea quae dicimus pati voluisse credere
 5 debeamus. Nam qui picturam vult facere, aliquid eli-
 6 git solidum super quod pingat, ut maneat quod pingit.
 Nemo enim pingit in aqua vel in aëre, quia ibi nulla
 manent picturae vestigia. Quapropter cum has conve-
 nientias quas dicis infidelibus quasi quasdam picturas
 rei gestae obtendimus, quoniam non rem gestam sed
 figmentum arbitrantur esse, quod credimus quasi super
 nubem pingere nos existimant. Monstranda est ergo
 prius veritatis rationabilis soliditas i. e. necessitas,
 quae probet Deum ad ea quae praedicamus debuisse
 aut potuisse humiliari. Deinde ut ipsum quasi corpus
 veritatis plus niteat, istae convenientiae quasi picturae
 corporis sunt exponendae. *Ans.* Nonne satis neces-
 saria ratio videtur, cur Deus ea quae dicimus facere
 debuerit: quia genus humanum, tam scilicet pretiosum
 opus eius, omnino perierat nec decebat, ut quod Deus
 de homine proposuerat, penitus annihilaretur; nec idem
 eius propositum ad effectum duci poterat, nisi genus
 humanum ab ipso creatore suo liberaretur?

1 **5.** *Bos.* Haec ipsa liberatio si per aliam quam
 2 per Dei personam (sive per angelum sive per hominem)
 3 esse facta quolibet modo diceretur, mens humana hoc
 4 multo tolerabilius acciperet. Potuit enim Deus hominem
 aliquem facere sine peccato, non de massa peccatrice
 nec de aliquo homine, sed sicut fecit Adam, per quem
 hoc ipsum opus fieri potuisse videtur. *Ans.* Annon in-
 telligis, quia, quaecunque alia persona hominem a morte
 aeterna redimeret, eius servus idem homo recte iudica-
 retur? Quod si esset, nullatenus restauratus esset in

illam dignitatem, quam habiturus erat, si non peccasset; cum ipse, qui non nisi Dei servus et aequalis angelis bonis per omnia futurus erat, servus esset eius, qui Deus non esset, et cuius angeli servi non essent.

6. *Bos.* Hoc est, quod valde mirantur, quia liberationem hanc redemptionem vocamus. In qua namque, aiunt nobis, captione aut in quo carcere aut in cuius potestate tenebamini, unde vos Deus non potuit liberare, nisi vos tot laboribus et ad ultimum suo sanguine redimeret? Quibus cum dicimus: redemit nos a peccatis et ab ira sua et de inferno et de potestate diaboli, quem, quia nos non poteramus, ipse pro nobis venit expugnare, et redemit nobis regnum coelorum; et quia haec omnia hoc modo fecit, ostendit quantum nos diligeret; respondent: Si dicitis, quia Deus haec omnia facere non potuit solo iussu, quem cuncta iubendo creasse dicitis, repugnatis vobismetipsis, quia impotentem illum facitis. Aut si fatemini, quia potuit, sed non voluit nisi hoc modo: quomodo sapientem illum ostendere potestis, quem sine ulla ratione tam indecentia velle pati asseritis? Omnia enim haec quae obtenditis in eius voluntate consistunt; ira namque Dei non est aliud quam voluntas puniendi. Si ergo non vult punire peccata hominum, liber est homo a peccatis et ab ira Dei et ab inferno et a potestate diaboli, quae omnia propter peccata patitur; et recipit ea, quibus propter eadem peccata privatur. Nam in cuius potestate est infernus aut diabolus? aut cuius est regnum coelorum nisi eius, qui fecit omnia? Quaecumque itaque timetis aut desideratis, eius voluntati subiacent, cui nihil resistere potest. Quapropter si humanum genus salvare noluit, nisi quo dicitis modo,¹⁾ cum sola voluntate potuit: ut mitius

1) nisi quomodo dicitis A a b c C D.

- dicam, videte quomodo eius sapientiae repugnatis.
9. Nam si homo, quod facile posset, id cum gravi labore sine ratione faceret, non utique sapiens ab ullo iudicaretur. Quippe quod dicitis, Deum taliter ostendisse quantum vos diligeret, nulla ratione defenditur, si nullatenus hominem aliter potuisse salvare non monstratur.
10. Nam si aliter non potuisset, tunc forsitan necesse esset, ut hoc modo suam dilectionem ostenderet; nunc vero, cum aliter possit salvare hominem, quae ratio est, ut propter ostendendam dilectionem suam ea quae dicitis faciat et sustineat? An enim non ostendit angelis bonia, quantum eos diligit, pro quibus talia non sustinet? Quod vero eum dicitis venisse expugnare pro vobis diabolum, quo sensu audetis proferre? Nonne
12. Deus omnipotentia¹⁾ regnat ubique? Quomodo ergo indigebat Deus, ut ad vincendum diabolum de coelo descenderet? Haec nobis infideles obicere posse videntur.

1. **7.** Sed et illud quod dicere solemus, Deum scilicet debuisse prius per iustitiam contra diabolum agere, ut liberaret hominem, quam per fortitudinem, ut cum diabolus eum, in quo nulla mortis erat causa et qui Deus erat, occideret, iuste potestatem quam super peccatores habebat, amitteret, alioquin iniustam violentiam fecisset illi, quoniam iuste possidebat hominem, quem non ipse violenter attraxerat, sed idem homo se sponte ad illum contularat: non video, quam vim habeat.
2. Nam si diabolus aut homo suus esset aut alterius quam Dei, aut in alia quam in Dei potestate maneret, forsitan hoc recte diceretur; cum autem diabolus aut homo non sit nisi Dei, et extra potestatem Dei neuter consistat: quam causam debuit Deus agere cum suo de suo in

1) Ita Cod. B. Al. hab. „Dei omnipotentia.“

suo; nisi ut servum suum puniret, qui suo conservo
 communem dominum deserere et ad se persuasisset trans-
 ire, ac traditor fugitivum, fur furem cum furto domini
 sui suscepisset? Uterque namque fur erat, cum alter 3
 altero persuadente seipsum domino suo furabatur. Quid 4
 enim iustius fieri posset, si hoc Deus faceret? Aut si
 iudex omnium Deus hominem sic possessum de po-
 testate tam iniuste possidentis, vel ad puniendum illum
 aliter quam per diabolum vel ad parcendum illi, eri-
 peret: quae haec iniustitia esset? Quamvis enim homo 5
 iniuste a diabolo torqueretur, ipse tamen illum iniuste tor-
 quebat. Homo namque meruerat, ut puniretur, nec ab
 ullo convenientius quam ab illo, cui consenserat ut pec-
 caret. Diaboli vero meritum nullum erat, ut puniret; 6
 imo hoc tanto faciebat iniustius, quanto non ad hoc
 amore iustitiae trahebatur, sed instinctu malitiae impel-
 lebatur. Nam hoc non faciebat Deo iubente, sed in- 7
 comprehensibili sapientia sua, qua mala etiam bene ordi-
 nat, permittente. Et puto illos, qui diabolum ali- 8
 quam opinantur habere in possidendo homine iustitiam,
 ad hoc inde adduci, quia vident hominem diaboli vexa-
 tioni subiacere iuste et Deum hoc iuste permittere; et
 idcirco putant diabolum illam iusto inferre. Contingit 9
 enim idem aliquid diversis considerationibus¹⁾ esse

1) Cfr. *Dialogus de Veritate* c. 8: „Multis modis eadem res suscipit diversis considerationibus contraria; quod in actione saepe contingit, ut in percussione. Percussio namque et agentis est et patientis; unde et actio dicitur et passio potest; quamvis secundum ipsum nomen actio vel percussio, et quae similiter dicta a passivis in activa significatione dicuntur, magis videantur esse patientis quam agentis. — Cum et qui percutit, recte percutit; et qui percutitur, recte percutitur; ut cum peccans ab eo ad quem pertinet, corrigitur: ex utraque parte recta est, quia ex utraque parte debet esse, percussio. E contrario, quando ab iniquo iustus percutitur,

- iustum et iniustum, et ob hoc a non diligenter intuentibus totum iustum aut iniustum iudicari. Evenit enim, ut aliquis innocentem percutiat iniuste, unde ipse iuste percuti mereatur; si tamen percussus vindicare se non debet et percutit percutientem se, iniuste hoc facit.
- 11 Haec igitur percussio ex parte reperimentis iniusta est, quia non debuit se vindicare; ex parte vero percussi iusta, quia iniuste percutiens iuste percuti meruit.
- 12 Diverso igitur intuitu iusta et iniusta est eadem actio, quia contingere potest ab alio iudicari iustam tantum, ab alio iniustam. Hoc itaque modo diabolus dicitur iuste vexare hominem, quia Deus hoc iuste permittit
- 13 et homo hoc iuste patitur. Sed et hoc, quod homo iuste dicitur pati, non sua iustitia iuste dicitur pati, sed
- 14 quia punitur iusto iudicio Dei. At si obtenditur chirographum illud decreti, quod adversum nos dicit apostolus¹⁾ fuisse et per mortem Christi deletum esse; et putat aliquis, per illud significari, quia diabolus quasi sub cuiusdam pacti chirographo ab homine iuste ante passionem Christi peccatum, velut usuram primi peccati quod persuasit homini, et poenam peccati exigeret, ut per hoc iustitiam suam super hominem videatur probare, nequaquam ita intelligendum puto. Quippe chirographum illud non est diaboli, quia chirographum dicitur decreti, decretum autem illud non erat diaboli

quia nec iste percuti nec ille percutere debet; ex utraque parte non recta est, quia ex neutra parte debet esse, percussio. Cum vero peccans ab eo ad quem non pertinet, percutitur; quoniam et iste debet percuti et ille non debet percutere: debet et non debet esse percussio, et ideo recta et non recta negari non potest.⁴

1) Coloss. 2, 14: *ἔξαλειψας τὸ καθ' ἡμῶν χειρόγραφον τοῖς δόγμασιν ὃ ἦν ὑπεναντίον ἡμῖν.* Vulg.: „delens quod adversus nos erat chirographum decreti.“ — Vid. *Bengelii Gnomon* N. T. a. h. l.

sed Dei. Iusto namque iudicio Dei decretum erat et 16
 quasi chirographo confirmatum, ut homo qui sponte pec-
 caverat, nec peccatum nec poenam peccati per se vitare
 posset; est enim spiritus vadens et non rediens; 1) et
qui facit peccatum, servus est peccati, 2) nec qui pec-
 cat, impunitus debet dimitti, nisi misericordia peccatori
 pareat et eum liberet ac reducat. Quamobrem per hoc 17
 chirographum nullam inveniri posse diaboli iustitiam in
 hominis vexatione credere debemus. Denique sicut in 18
 bono angelo nulla omnino est iniustitia, ita in malo nulla
 est penitus iustitia. Nihil igitur erat in diabolo, cur 19
 Deus contra illum ad liberandum hominem sua uti for-
 titudine non deberet.

8. *Ans.* Sufficere nobis debet ad rationem volun- 1
 tas Dei 3) cum aliquid facit, licet non videamus cur
 ita velit; voluntas namque Dei nunquam est irrationa-
 bilis. *Bos.* Verum est, si constat Deum id velle, unde 2
 agitur; nequaquam enim acquiescunt multi Deum ali-
 quid velle, si rationi repugnare videtur. *Ans.* Quid 3
 tibi videtur repugnare rationi, cum Deum ea voluisse
 fatemur, quae de eius incarnatione credimus? *Bos.* Ut 4
 breviter dicam: altissimum ad tam humilia inclinari,
 omnipotentem aliquid facere cum tanto labore. *Ans.* Qui 5
 hoc dicunt, non intelligunt quod credimus. Divinam enim
 naturam absque dubio asserimus impassibilem, nec ulla-
 tenus posse a sua celsitudine humiliari, nec in eo quod
 vult facere laborare. Sed Dominum Iesum Christum 6
 dicimus Deum verum et verum hominem, unam per-

1) Cfr. Psalm. 77 [78], 39.

2) Ioann. 8, 34.

3) Cfr. Liber *de Voluntate Dei* c. 1: „Voluntas Dei
 est (ut breviter dicam) quicquid fit, ut fieri invenitur
 in creaturis.“

1 sonam in duabus naturis et duas naturas in una per-
 7 sona. Quapropter cum dicimus Deum aliquid humile
 aut infirmum pati, non hoc intelligimus secundum subli-
 mitatem impassibilis naturae, sed secundum infirmita-
 tem humanae substantiae quam gerebat; et sic nostras
 8 fidei nulla ratio obviare cognoscitur. Sic enim nullam
 divinae substantiae significamus humilitatem, sed unam
 9 Dei et hominis monstramus esse personam. Non ergo
 incarnatione ¹⁾ Dei humilitas eius ulla intelligitur facta,
 10 sed natura hominis creditur exaltata. *Bos.* Ita sit:
 nihil imputetur divinae naturae, quod secundum infir-
 mitatem hominis de Christo dicitur; verum quomodo
 iustum aut rationabile probari poterit, quia Deus homi-
 nem illum, quem Pater Filium suum dilectum in quo
 sibi bene complacuit, vocavit ²⁾ et quem Filius seipsum
 11 fecit, sic tractavit aut tractari permisit? Quae autem
 iustitia est, hominem omnium iustissimum morti tradere
 pro peccatore? Quis homo, si innocentem damnaret
 12 ut nocentem liberaret, damnandus non iudicaretur? Ad
 idem res ³⁾ deduci videtur inconveniens, quod supra
 dictum est. Nam si aliter peccatores non potuit sal-
 vare quam iustum damnando, ubi est eius omnipoten-
 13 tia? Si vero potuit sed noluit, quomodo defendemus
 14 sapientiam eius atque iustitiam? *Ans.* Deus Pater non,
 quemadmodum videris intelligere, hominem illum tra-
 ctavit aut innocentem pro nocente morti tradidit. Non
 enim eum invitum ad mortem ille coëgit aut occidi
 permisit, sed idem ipse sponte sua mortem sustinuit, ut
 15 homines salvaret. *Bos.* Etiam si non invitum, quoniam
 voluntati Patris consensit, quodammodo tamen illum
 16 coëgisse videtur praeciando. Dicitur enim, quia
 17

1) ergo in incarnatione A a b c C.

2) Cfr. Matth. 3, 17.

3) Omnes codd. omitt. „enim“ s. „ergo.“

Christus humiliavit semetipsum, factus obediens Patri usque ad mortem, mortem autem crucis. Propter quod et Deus illum exaltavit;¹⁾ et quia didicit obedientiam ex his, quas passus est;²⁾ et quia proprio Filio suo non pepercit Pater, sed pro nobis omnibus tradidit illum.³⁾ Et idem Filius dicit: Non veni voluntatem meam facere, sed voluntatem eius, qui misit me.⁴⁾ Et iturus ad passionem dicit: Sicut mandatum dedit mihi Pater, sic facio.⁵⁾ Item: Calicem, quem dedit mihi Pater, non bibam illum?⁶⁾ Et alibi: Pater, si possibile est, transeat a me calix iste: verumtamen non sicut ego volo, sed sicut tu.⁷⁾ Et iterum: Pater, si non potest hic calix transire, nisi bibam illum, fiat voluntas tua.⁸⁾ In his omnibus plus videtur Christus obedientia cogente quam spontanea voluntate disponente mortem sustinuisse.

9. *Ans.* Ut mihi videtur, non bene discernis inter hoc quod fecit exigente obedientia, et quod sibi factum, quia servavit obedientiam, sustinuit non exigente obedientia. *Bos.* Necesse habeo, ut hoc apertius exponas. *Ans.* Cur persecuti sunt eum Iudaei usque ad mortem? *Bos.* Non ob aliud nisi quia veritatem et iustitiam vivendo et loquendo indeclinabiliter tenebat. *Ans.* Hoc puto quia Deus ab omni rationali creatura exigit, et hoc illa per obedientiam Deo debet. *Bos.* Sic nos fateri oportet. *Ans.* Hanc igitur obedientiam debebat homo ille Deo Patri et humanitas divinitati, et hanc ab illo exigebat Pater. *Bos.* Hoc nulli dubium est. *Ans.* Ecce habes, quid fecit exigente obedientia. *Bos.* Verum est; et iam video quid sibi illatum, quia

1) Philipp. 2, 8. 9. — 2) Ebr. 5, 8. — 3) Rom. 8, 32.
4) Ioann. 6, 38. — 5) Ioann. 14, 31. — 6) Ioann. 18, 11. — 7) Matth. 26, 39. — 8) Matth. 26, 42.

obediendo perseveravit, sustinuit. Nam illata est illi mors quia perstitit in obedientia, et hanc sustinuit; sed quomodo hoc obedientia non exigit, non intelligo.

6 *Ans.* Si homo nunquam peccasset, deberet pati mortem,
7 aut deberet Deus hoc ab illo exigere? *Bos.* Quemadmodum credimus, nec homo moreretur nec hoc exigeretur ab illo; sed huius rei a te audire volo rationem.

Ans. Rationalem creaturam iustam factam esse et ad
X hoc, ut Deo fruendo beata esset, non negas. *Bos.* Non.

8 *Ans.* Deo autem nequaquam aestimabis convenire, ut
quam fecit iustam ad beatitudinem, cogat sine culpa esse miseram; hominem enim invitum mori miserum

9 est. *Bos.* Patet, quia si non peccasset homo, non de-

10 beret Deus ab eo mortem exigere. *Ans.* Non ergo coëgit Deus Christum mori, in quo nullum fuit peccatum; sed ipse sponte sustinuit mortem, non per obedientiam deserendi vitam sed propter obedientiam servandi iustitiam, in qua tam fortiter perseveravit, ut

11 inde mortem incurreret. Potest etiam dici, quia praecepit illi mori Pater cum hoc praecepit, unde incurrit mortem. Ita ergo *sicut mandatum dedit illi Pater, sic fecit, et calicem, quem dedit ei, bibit; et factus est obediens Patri usque ad mortem; et sic didicit ex his, quae passus est, obedientiam, i. e., quousque debeat*

12 *servari obedientia. Verbum autem quod positum est, didicit, duobus modis intelligi potest. Aut enim didicit dictum est pro: alios fecit discere, aut quia, quod per scientiam non ignorabat, experimento didicit.*

13 Quod autem apostolus, cum dixisset: *humiliavit semetipsum, factus obediens usque ad mortem, mortem autem crucis, subdidit: propter quod et Deus illum exaltavit, et donavit illi nomen, quod est super omne nomen,*¹⁾ cui simile est quod David dixit: *de torrente*

1) Philipp. 2, 9.

in via bibet, propterea exaltabit caput; ¹⁾ non ita dictum est, quasi nullatenus potuisset pervenire ad hanc exaltationem nisi per hanc mortis obedientiam, et haec exaltatio non nisi in retributionem huius obedientiae collata sit — priusquam enim pateretur, ipse dixit omnia sibi esse tradita a Patre ²⁾ et omnia Patris esse sua ³⁾ — sed quoniam ipse cum Patre sanctoque Spiritu disposuerat, se non aliter quam per mortem celsitudinem omnipotentiae suae ostensurum mundo; quippe quod non nisi per illam mortem fieri dispositum est, cum per illam fit, non incongrue dicitur propter illam fieri. Si enim intendimus aliquid facere, sed proponimus nos prius aliud facturos, per quod illud fiat; cum iam factum est quod volumus praecedere, si fit quod intendimus, recte dicitur propterea fieri, quoniam factum est propter quod differebatur; quia non nisi per illud fieri dispositum erat. Nam si fluvium quem equo vel navi transire possum, propono me non nisi navi transiturum, et idcirco differo transmeare, quia navis abest; cum iam praesto est navis, si transeo, recte de me dicitur: navis parata fuit, propterea transivit. Et non solum ita loquimur, quando per illud quod praecedere volumus, sed etiam quando non per illud, sed tantummodo post illud facere aliud aliquid statuimus. Si quis enim differt cibum sumere propterea, quia nondum ea die missae celebrationi affuit; peracto quod prius facere volebat, non incongrue dicitur illi: iam sume cibum, propterea quia iam fecisti propter quod sumere differebas. Multo igitur minus inusitata est locutio, cum Christus dicitur exaltatus propterea quia mortem sustinuit, per quam et post quam illam exaltationem

1) Psalm. 109 [110], 7.

2) Luc. 10, 22: Πάντα μοι παρεδόθη ὑπὸ τοῦ πατρὸς μου.

3) Ioann. 16, 15: Πάντα ὅσα ἔχει ὁ πατὴρ ἐμὰ ἔστιν.

- 19 decrevit facere. Potest hoc et eo modo intelligi, quo
idem Dominus legitur¹⁾ profecisse sapientia et gratia
apud Deum, non quia ita erat, sed quia ille sic se ha-
bebat, ac si ita esset. Nam sic post mortem exaltatus
20 est, quasi propter illam hoc fieret. Quod autem ipse
ait: *Non veni voluntatem meam facere, sed patris, qui
misit me,*²⁾ tale est, quale est et illud: *Mea doctrina
non est mea;*³⁾ nam quod quis non habet a se sed a
Deo, hoc non tam suum quam Dei dicere debet. Nul-
lus vero homo a se habet veritatem quam docet, aut
21 iustam voluntatem, sed a Deo. Non ergo venit Chri-
stus voluntatem suam facere sed Patris; quia iusta vo-
luntas quam habebat, non erat ex humanitate sed ex
22 divinitate. *Proprio autem Filio suo non pepercit Deus,
sed pro nobis omnibus tradidit illum,*⁴⁾ non est aliud
quam, non liberavit illum. Nam multa in sacra scriptura
23 huiusmodi inveniuntur. Ubi autem dicit: *Pater, si
possibile est, transeat a me calix iste; verumtamen non
sicut ego volo, sed sicut tu;*⁵⁾ et: *si non potest hic
calix transire, nisi bibam illum, fiat voluntas tua;*⁶⁾
naturalem salutis per voluntatem suam significat appe-
24 titum, quo humana caro dolorem mortis fugiebat. Vo-
luntatem vero Patris dicit, non quoniam maluerit Pater
mortem Filii quam vitam; sed quia humanum genus
restaurari nolebat Pater, nisi faceret homo tam magnum
25 aliquid, sicut erat mors illa. Quia non poscebat ratio
quod alius facere non poterat, ideirco dicit Filius
illum velle suam mortem; quoniam ipse maluit illam
pati, quam ut genus humanum non salvaretur; ac si di-
ceret: quoniam non vis aliter reconciliationem mundi
feri, dico te hoc modo velle mortem meam; fiat ergo

1) Cfr. Luc. 2, 52. — 2) Ioann. 6, 38. — 3) Ioann.
7, 16. — 4) Roman. 8, 32. — 5) Matth. 26, 39. — 6)
Matth. 26, 42.

voluntas tua, id est, fiat mors mea, ut mundus tibi reconcilietur. Nam saepe aliquem velle dicimus aliquid, 26 quia non vult aliud, quod si vellet, non fieret illud quod dicitur velle; ut cum dicimus, illum lucernam velle extinguere, qui non vult fenestram claudere, per quam ventus intrat qui lucernam extinguit. Sic ergo voluit 27 Pater mortem Filii, quia non aliter voluit mundum salvari nisi homo tam magnum aliquid faceret, ut iam dixi. Quod Filio volenti salutem hominum tantundem valuit, 28 quoniam hoc alius facere non valebat, quantum si illi mori praeciperet; unde ille sicut mandatum illi dedit Pater, sic fecit et calicem quem dedit ei Pater, bibit obediens usque ad mortem.

10. Potest etiam recte intelligi, quia per illam 1
piam voluntatem, qua voluit Filius pro salute mundi mori, dedit illi Pater (non tamen cogendo) mandatum et calicem passionis et non pepercit illi, sed pro nobis tradidit illum et mortem illius voluit; et quia ipse Filius obediens fuit usque ad mortem, et didicit ex his 2
quae passus est obedientiam. Quemadmodum enim secundum humanitatem non habebat a se voluntatem iuste vivendi sed a Patre, ita quoque illam voluntatem, qua ut tantum bonum faceret, mori voluit, non potuit habere nisi a Patre luminum, a quo est omne datum optimum et omne donum perfectum;¹⁾ et sicut Pater trahere dando voluntatem dicitur, ita non incongrue fit, si impellere asseritur. Sicut enim dicit Filius de Patre: 3
*Nemo venit ad me, nisi Pater traxerit eum,*²⁾ ita dicere potuit, nisi impulerit eum. Similiter quoque 4

1) Cfr. Iacob. 1, 17: *Πᾶσα δόσις ἀγαθὴ καὶ πᾶν δῶρημα τέλειον ἄνωθεν ἐστὶν καταβαῖνον ἀπὸ τοῦ πατρὸς τῶν φωτῶν.*

2) Ioann. 6, 44.

proferre potuit: nemo currit ad mortem propter nomen
 5 meum, nisi Pater impulerit aut traxerit eum. Quoniam
 namque voluntate quisque ad id quod indeclinabiliter
 vult, trahitur vel impellitur, non inconvenienter trahere
 aut impellere dicitur Deus, cum talem dat voluntatem;
 in quo tractu vel impulsu nulla intelligitur violentiae
 necessitas, sed acceptae bonae voluntatis spontanea et
 6 amata tenacitas. Si ergo hoc modo nequit negari, Pa-
 trem voluntatem illam dando Filium ad mortem traxisse
 vel impulsisse; quis non videat eadem ratione mandatum
 illi, ut mortem sustineret sponte, et calicem quem non
 7 invitatus biberet, dedisse? Et si Filius sibi non peper-
 cisse sed pro nobis spontanea voluntate se ipsum tra-
 didisse recte dicitur, quis neget recte dici, quia Pater
 a quo talem habuit voluntatem, illi non pepercit, sed
 8 pro nobis tradidit illum et mortem eius voluit? Hoc
 etiam modo indeclinabiliter et sponte servando acceptam
 voluntatem a Patre Filius factus est illi obediens usque
 ad mortem, et didicit ex his quae passus est obedi-
 entiam, id est, quam magna res facienda sit per obedi-
 9 tiam. Nam tunc est vera et simplex obedientia, cum
 rationalis creatura non necessitate sed sponte servat
 10 voluntatem a Deo acceptam. Aliis quoque modis recte
 possumus Patrem voluisse Filii mortem intelligere,
 11 quamvis isti possint sufficere. Nam sicut velle dici-
 mus eum qui facit, ut alius velit; ita etiam dicimus
 eum velle qui non facit, ut alius velit, sed approbat
 quia vult; ut cum videntur aliquem fortiter pati velle
 molestiam, ut perficiat quod bene vult; quamvis fatea-
 mur nos velle, ut illam poenam sustineat, non tamen
 12 volumus aut amamus poenam eius sed voluntatem. Illum
 quoque, qui prohibere potest et non prohibet, solemus
 13 dicere quia vult, quod non prohibet. Quoniam ergo
 Patri voluntas Filii placuit, nec prohibuit eum velle
 aut implere quod volebat; recte voluisse, ut Filius mor-

tem tam pie et tam utiliter sustineret, quamvis poenam eius non amaret, affirmatur. Non autem potuisse calicem transire nisi biberet illum, dixit, non quia non posset mortem vitare si vellet; sed quoniam, sicut dictum est, mundum erat impossibile aliter salvari; et ipse inclinabiliter volebat potius mortem pati, quam ut mundus non salvaretur. Idcirco autem dixit verba illa, ut doceret humanum genus aliter non potuisse salvari quam per mortem suam; non ut ostenderet se mortem nequaquam valuisse vitare. Nam quaecunque de illo dicuntur his quae dicta sunt similia, sic sunt exponenda, ut nulla necessitate sed libera voluntate mortuus creditur. Erat namque omnipotens, et de illo legitur, quoniam *oblatus est, quia ipse voluit.*¹⁾ Et ipse dicit: *Ego pono animam meam, ut iterum sumam eam; nemo tollit eam a me, sed ego pono eam a me ipso. Potestatem habeo ponendi animam meam et iterum sumendi eam.*²⁾ Quod ergo idem ipse sua potestate et sua voluntate facit, nullatenus ad hoc eogi recte dici potest. *Bos.* Hoc solum, quia permittit Deus illum sic tractari quamvis volentem, non videtur tali Patri de tali Filio convenire. *Ans.* Imo maxime decet talem Patrem tali Filio consentire, si quid vult laudabiliter ad honorem Dei et utiliter ad salutem hominum, quae aliter fieri non potuit. *Bos.* In hoc adhuc versamur, qualiter mors illa rationabilis et necessaria monstrari possit. Aliter namque nec ipse Filius eam velle, nec Pater cogere aut permittere debuisse videtur. Quaeritur enim, cur Deus aliter hominem salvare non potuit, aut si potuit, cur

1) Ita Vulg. Interpr. verba apud Iesaiam prophetam c. 53 v. 7 obvia: *נָשַׁךְ וְנָתַתָּה לְמוֹתוֹ* perperam reddidit.

2) Ioann. 10, 17. 18.

- hoc modo voluit. Nam et inconveniens videtur esse Deo, hominem hoc modo salvasse; nec apparet, quid mors illa valeat ad salvandum hominem. Mirum enim est, si Deus sic delectatur aut eget sanguine innocentis, ut non nisi interfecto eo parcere velit aut possit nocenti. *Ans.* Quoniam accipis in hac quaestione personam eorum, qui credere nihil volunt nisi praemonstrata ratione, volo tecum pacisci, ut nullum vel minimum inconveniens in Deo a nobis accipiatur, et nulla vel minima ratio, si maior non repugnat, reiiciatur. Sicut enim in Deo quantumlibet parvum¹⁾ inconveniens sequitur impossibilitas; ita quantumlibet parvam rationem, si maiori non vincitur, comitatur necessitas.
- 26 *Bos.* Nihil in hac re libentius accipio, quam ut hoc pactum inter nos communiter servetur. *Ans.* De incarnatione Dei tantum et de his quae de illo assumpto
- 28 homine credimus, quaestio est. *Bos.* Ita est. *Ans.* Ponamus ergo Dei incarnationem et quae de illo dicimus homine, numquam fuisse; et constet inter nos hominem esse factum ad beatitudinem, quae in hac vita haberi non potest, nec ad illam posse pervenire quemquam nisi dimissis peccatis, nec ullum hominem hanc vitam transire sine peccato, et alia quorum fides ad salutem aeternam necessaria est. *Bos.* Ita fiat; quia nihil in his inconveniens aut impossibile Deo videtur. *Ans.* Necessaria est igitur homini peccatorum remissio, ut ad beatitudinem perveniat. *Bos.* Sic omnes tenemus.

- 1 **11.** *Ans.* Quaerendum est igitur, qua ratione Deus dimittat peccata hominibus? et ut hoc faciamus

1) *quantumlibet parvum* A a b c B E F a.

apertius, prius videamus, quid sit peccare et quid pro peccato satisfacere. *Bos.* Tuum est ostendere, et meum intendere. *Ans.* Si angelus et homo semper redderet 2 Deo quod debet, nunquam peccaret. *Bos.* Nequeo contradicere. *Ans.* Non est itaque aliud peccare, quam 3 Deo non reddere debitum. *Bos.* Quid est debitum 1) quod Deo debemus? *Ans.* Omnis voluntas rationalis 4 creaturae subiecta debet esse voluntati Dei. *Bos.* Nihil verius. *Ans.* Hoc est debitum quod debet angelus et 5 homo Deo, quod solvendo nullus peccat; et quod omnis qui non solvit, peccat. Haec est iustitia sive rectitudo voluntatis, quae iustos facit sive rectos corde, i. e. voluntate; hic est solus et totus honor quem debemus 6 Deo, et quem a nobis exigit Deus. Sola namque talis 6 voluntas opera facit placita Deo, cum potest operari; et cum non potest, ipsa sola per se placet, quia nullum opus sine illa placet. Hunc honorem debitum qui Deo non reddit, aufert Deo quod suum est, et Deum exhonorat; et hoc est peccare. Quamdiu autem non solvit quod rapuit, manet in culpa; 7 nec sufficit solummodo reddere quod ablatum est, sed pro contumelia illata plus debet reddere, quam abstulit. Sicut enim qui laedit salutem alterius, non sufficit si 8 salutem restituit, nisi pro illata doloris iniuria recompenset aliquid, ita qui honorem alicuius violat, non sufficit honorem reddere, si non secundum exhonoratam factam molestiam aliquid, quod placet illi quem exhonoravit, restituat. Hoc quoque attendendum, quod cum 9 aliquis quod iniuste abstulit, solvit, hoc debet dare quod ab illo non posset exigi, si alienum non rapuisset. Sic 10 ergo debet omnis qui peccat, honorem quem rapuit Deo, solvere; et haec est satisfactio, quam omnis peccator debet Deo facere. *Bos.* In his omnibus, quoniam 11

1) *Quod est debitum* B C.

rationem sequi proposuimus, quamvis aliquantulum me
terreas, nihil habeo quod possim dicere contra.

- 1 **12.** *Ans.* Redeamus et videamus, utrum sola mi-
 2 sericordia sine omni solutione ablati sibi honoris, de-
 3 ceat Deum peccata dimittere. *Bos.* Non video cur non
 4 deceat. *Ans.* Sic dimittere peccatum, non est aliud
 5 quam non punire; et quoniam recte ordinare peccatum
 6 sine satisfactione non est nisi punire, si non punitur,
 7 inordinatum dimittitur. *Bos.* Rationabile est quod di-
 8 cis. *Ans.* Deum vero non decet aliquid in suo regno
 9 inordinatum dimittere. *Bos.* Si aliud volo dicere, timeo
 10 peccare. *Ans.* Igitur non decet Deum peccatum sic
 11 impunitum dimittere. *Bos.* Ita sequitur. *Ans.* Est et
 12 aliud quod sequitur, si peccatum sic dimittitur impuni-
 tum, quia similiter erit apud Deum peccanti et non
 peccanti; quod Deo non convenit. *Bos.* Non possum
 negare. *Ans.* Vide et hoc. Iustitiam hominum nemo
 nescit esse sub lege, ut secundum eius quantitatem men-
 sura retributionis a Deo recompensetur. *Bos.* Ita cre-
 dimus. *Ans.* Si autem peccatum nec solvitur nec pu-
 nitur, nulli legi subiacet. *Bos.* Non possum aliter in-
 telligere. *Ans.* Liberior igitur est iniustitia, si sola
 misericordia dimittitur, quam iustitia; quod valde in-
 conveniens videtur. Ad hoc etiam extenditur haec in-
 convenientia, ut iniustitiam Deo similem faciat; quia
 sicut Deus nullius legi subiacet, ita et iniustitia. *Bos.* Ne-
 queo resistere rationi tuae. Sed cum Deus nobis prae-
 cipiatur omnino dimittere peccantibus in nos, videtur re-
 pugnanare, ut hoc praecipiat nobis quod ipsum facere
 non decet. *Ans.* Nulla in hoc est repugnantia, quia
 Deus hoc praecipit nobis, ut non praesumamus quod
 solius Dei est. Ad nullum enim pertinet vindictam fa-
 cere, nisi ad illum qui Dominus est omniam; nam cum

terrenae potestates hoc recte faciunt, ipse facit Deus, a quo ad hoc ipsum sunt ordinatae. *Bos.* Removisti repugnantiam, quam putabam inesse; sed est aliud, ad quod tuum volo habere responsum. Nam cum Deus sic sit liber, ut nulli legi, nullius subiaceat iudicio, et sit ita benignus, ut nihil benignius cogitari queat, et nihil sit rectum aut decens nisi quod ipse vult: mirum videtur, si dicimus quia nullatenus vult aut non ei licet iniuriam suam dimittere, a quo etiam de his quas aliis facimus, solemus indulgentiam petere. *Ans.* Verum est, quod dicis de libertate et voluntate et benignitate illius; sed sic eas debemus rationabiliter intelligere, ut dignitati illius non videamur repugnare. Libertas enim non est nisi ad hoc, quod expedit aut quod decet, nec benignitas dicenda est, quae aliquid Deo indecens operatur. Quod autem dicitur, quia quod vult iustum est, et quod non vult iustum non est,¹⁾ non ita intelligendum est, ut si Deus velit quodlibet inconveniens, iustum sit, quia ipse vult. Non enim sequitur, si Deus vult mentiri, iustum esse mentiri, sed potius Deum illum non esse. Nam nequaquam potest velle mentiri voluntas, nisi in qua corrupta est veritas, imo quae deserendo veritatem corrupta est. Cum ergo dicitur: si Deus vult mentiri; non est aliud, quam: si Deus talis est natura, quae velit mentiri; et idcirco non sequitur, iustum esse mendacium, nisi ita intelligatur, sicut cum de duobus impossibilibus dicimus: si hoc est, illud est; quia nec hoc nec illud est; ut si quis dicat: si aqua est sicca et ignis est humidus; neutrum enim verum est. Itaque de illis tantum est verum dicere: si Deus hoc vult, iustum est, quae Deum velle non est inconveniens. Si

1) Cfr. *Proslogium* c. 11: „Id solum iustum est quod vis, et non iustum quod non vis.“

- enim vult Deus ut pluat, iustum est ut pluat; et si vult ut aliquis homo occidatur, iustum est ut occidatur.
- 20 Quapropter si non decet Deum aliquid iniuste aut inordinate facere, non pertinet ad eius libertatem aut benignitatem aut voluntatem, peccantem, qui non solvit Deo quod abstulit, impunitum dimittere. *Bos.* Omnia mihi auferis, quae putabam tibi posse obici. *Ans.* Vide adhuc, cur Deum non deceat hoc facere? *Bos.* Libenter ausculto quidquid dicis.

- 1 **13.** *Ans.* Nihil minus tolerandum est in rerum ordine, quam ut creatura creatori debitum honorem auferat, et non solvat quod aufert. *Bos.* Hoc nihil
- 2 clarius. *Ans.* Nihil autem iniustius toleratur, quam quo nihil minus est tolerandum. *Bos.* Neque hoc est ob-
- 3 scurum. *Ans.* Puto ergo, quia non dices Deum debere tolerare, quo nihil iniustius toleratur, ut creatura¹⁾ non reddat Deo quod aufert. *Bos.* Imo penitus negandum esse video. *Ans.* Item si Deo nihil maius aut melius est; nihil iustius, quam quae honorem illius servat in rerum dispositione, summa iustitia, quae non est aliud quam ipse Deus. *Bos.* Hoc quoque nihil apertius. *Ans.* Nihil ergo servat Deus iustius quam suae dignitatis honorem. *Bos.* Concedere me oportet.
- 6 *Ans.* Videtur tibi, quod eum integre servet, si sic auferri sibi permittit, ut nec solvatur nec ipse auferentem puniat? *Bos.* Non audeo dicere. *Ans.* Necesse est ergo, ut aut ablati honor solvatur aut poena sequatur; alioquin aut sibi ipsi Deus iustus non erit aut ad utrumque impotens erit: quod nefas est vel cogitare. *Bos.* Nihil rationabilius dici posse intelligo.

1) ut quod creatura.] A a b c B C D omitt. „quod.“

14. *Bos.* Sed volo a te audire, si peccantis 1
 poena sit illi honor aut cuiusmodi honor sit. Si enim
 poena peccantis non eius honor est: cum peccator non
 solvit quod abstulit, sed punitur, sic perdit Deus hono-
 rem suum, ut non recuperet; quod his quae dicta sunt
 repugnare videtur. *Ans.* Deum impossibile est honorem 2
 suum perdere; aut enim peccator sponte solvit quod
 debet, aut Deus ab invito accipit. Nam aut homo debi- 3
 tam subiectionem Deo, sive non peccando sive quod
 peccat solvendo, voluntate spontanea exhibet, aut Deus
 eum invitum sibi torquendo subiicit et sic se Dominum
 eius esse ostendit, quod ipse homo voluntate fateri re-
 cusat. In quo considerandum, quia sicut homo pec- 4
 cando rapit quod Dei est, ita Deus puniendo aufert
 quod hominis est. Quippe non solum id ipsum alicuius
 esse dicitur quod iam possidet, sed quod in eius po-
 testate est ut habeat. Quoniam ergo homo ita factus 5
 est, ut beatitudinem habere posset, si non peccaret:
 cum propter peccatum beatitudine et omni bono priva-
 tur, de suo quamvis invitus solvit quod rapuit; quia,
 licet Deus hoc ad usum sui commodi non transferat
 quod aufert, sicut homo pecuniam quam alii aufert, in
 suam convertit utilitatem: hoc tamen quod aufert, uti-
 tur ad suum honorem, p̄ hoc quia aufert. Aufe- 6
 rendo enim peccatorem et quae illius sunt subiecta sibi
 esse probat.

15. *Bos.* Placet quod dicis. Sed est et aliud, ad 1
 quod tuam respensionem postulo. Nam si Deus ita sic-
 ut probas, suum debet honorem servare: cur vel ad
 modicum patitur illum violari? Quod enim aliquo modo
 laedi sinitur, non integre nec perfecte custoditur. *Ans.* Dei 2

honor¹⁾ nequit aliquid, quantum ad illum pertinet, addi vel minui. Idem namque ipse sibi honor est incorruptibilis et nullo modo mutabilis. Verum quando unaquaeque creatura suum et quasi sibi praeceptum ordinem sive naturaliter sive rationabiliter servat, Deo obedire et eum dicitur honorare; et hoc maxime rationalis natura, cui datum est intelligere quid debeat.

3 Quae cum vult quod debet, Deum honorat; non quia illi aliquid confert, sed quia sponte se eius voluntati et dispositioni subdit et in rerum universitate ordinem suum et eiusdem universitatis pulchritudinem, quantum

4 in ipsa est, servat. Cum vero non vult quod debet, Deum, quantum ad ipsam²⁾ pertinet, inhonorat, quoniam non subdit se sponte illius dispositioni; et universitatis ordinem et pulchritudinem, quantum in se est, perturbat, licet potestatem aut dignitatem Dei nullatenus laedat aut decoloret. Si enim ea quae coeli ambitu continentur, vellent non esse sub coelo aut elongari a coelo, nullatenus possent nisi sub coelo esse, nec fugere coelum nisi appropinquando coelo. Nam et unde et quo et qua irent, sub coelo essent; et quanto magis a qualibet parte coeli elongarentur, tanto magis

7 oppositae parti appropinquarent. Ita quamvis homo vel malus angelus divinae voluntati et ordinationi subiacere nolit, non tamen eam fugere valet; quia si vult fugere de sub voluntate iubente, currit sub voluntatem

8 punientem. Et si quaeris, qua transit? non nisi sub voluntate permittente; et hoc ipsum, quod perverse vult aut agit, in universitatis praefatae ordinem et pulchritudinem summa sapientia convertit. Ipsa namque per

1) Cfr. *Hasse* Tom. II, pag. 576: „Ans. unterscheidet deutlich eine *doppelle* Ehre Gottes: die *immanente* und die *transeunte*.“

2) *ad illam A a — ad illam A b c.*

versitatis spontanea satisfactio vel a non satisfaciente poenae exactio (excepto hoc, quod Deus de malis multimodis bona facit) in eadem universitate locum tenent suam et ordinis pulchritudinem. Quas si divina sapientia, ubi perversitas rectum ordinem perturbare nititur, non adderet, fieret in ipsa universitate quam Deus debet ordinare, quaedam ex violata ordinis pulchritudine deformitas, et Deus in sua dispositione videretur deficere. Quae duo quoniam sicut sunt inconvenientia, ita sunt impossibilia, necesse est, ut omne peccatum satisfactio aut poena sequatur. *Bos.* Satisfecisti obiectioni meae. *Ans.* Palam est ergo, quia Deum, quantum in ipso est, nullus potest honorare vel exhonore; sed, quantum in se est, hoc aliquis facere videtur, cum voluntatem suam voluntati eius subiicit, aut subtrahit. *Bos.* Nescio, quid contra queam dicere. *Ans.* Adhuc addam aliquid. *Bos.* Tamdiu dic, donec me taedeat audire.

16. *Ans.* Deum constat proposuisse, ut de humana natura quam fecit sine peccato, numerum angelorum qui ceciderant restitueret.¹⁾ *Bos.* Hoc credimus, sed vellem aliquam huius rei rationem habere. *Ans.* Fallis me; non enim proposuimus tractare nisi de incarnatione Dei; et tu mihi alias interseris quaestiones. *Bos.* Ne irascaris; hilarem enim datorem diligit Deus;²⁾ nam nemo probat magis se hilariter dare quod promittit, quam qui plus dat quam promittit; dic ergo libenter quod quaero. *Ans.* Rationalem naturam, quae Dei contemplatione beata vel est vel futura est,

1) Cfr. S. Augustini Enchiridion ad Laurentium c. 29. De Civitate Dei 22, 1. — Io. Scoti Erigenae de Divisione Naturae L. 5. p. 576 sq. ed. Schlüter. Monast. Guest. 1838.

2) 2. Corinth. 9, 7.

- in quodam rationabili et perfecto numero praescitam esse a Deo, ita ut nec maiorem nec minorem illum esse
- 5 deceat, non est dubitandum. Aut enim nescit Deus, in quo numero melius eam deceat constitui: quod falsum est; aut si scit, in eo illam constituet, quem ad
- 6 hoc decentiorem intelliget. Quapropter aut angeli illi qui ceciderunt, facti erant ad hoc, ut essent intra illum numerum; aut quia extra illum numerum permanere non potuerunt, ex necessitate ceciderunt: quod absurdum est opinari. *Bos.* Veritas est aperta quod dicitis.
- 7 *Ans.* Quoniam ergo de illo numero esse debuerunt, aut restaurandus est ex necessitate numerus eorum, aut in imperfecto numero remanebit rationalis natura, quae in numero perfecto praescita est; quod esse non pot-
- 8 est. *Bos.* Restaurandi procul dubio sunt. *Ans.* Necesse est ergo, eos de humana natura, quoniam non est alia de qua possint restaurari.

- 1 **17.** *Bos.* Cur non ipsi aut alii angeli pro illis possunt restitui? *Ans.* Cum videbis nostrae restaurationis difficultatem, intelligis eorum reconciliationis im-
- 2 possibilitatem. Alii autem angeli pro illis restitui non possunt ideo, (ut taceam quomodo hoc repugnare videatur primae creationis perfectioni) quia non debent, nisi tales esse possint, quales illi fuissent si non peccassent, cum illi nulla visa vindicta peccati perseverassent; quod post illorum casum aliis qui pro illis restituerentur, es-
- 3 set impossibile. Non enim pariter laudabiles sunt, si stant in veritate, et qui nullam novit peccati poenam et qui eam semper aspicit aeternam. Nam nequaquam putandum est bonos angelos esse confirmatos casu ma-
- 4 lorum, sed suo merito. Sicut namque si boni cum malis peccassent, simul damnati essent, ita iniusti si cum iustis stetissent, pariter confirmati fuissent. Quippe si aliqui eorum non nisi casu aliorum confirmandi erant,

aut nullus unquam confirmaretur, aut necesse erat aliquem casurum, qui ad alios confirmandos puniretur; quae utraque absurda sunt. Illo itaque modo confirmati sunt illi qui steterunt, quo pariter confirmati essent omnes si stetissent; quemadmodum ostendi¹⁾ sicut potui, ubi tractavi, cur Deus diabolo perseverantiam non dedit.²⁾ *Bos.* Probasti malos angelos de humana natura restaurandos; et patet ex hac ratione, quia non in minori numero erunt electi homines quam sunt angeli reprobis. Sed utrum plures futuri sint, si potes, ostende.

18. *Ans.* Si angeli, antequam quidam illorum caderent, erant in illo perfecto de quo diximus numero, non sunt homines facti nisi pro restauratione angelorum perditorum; et palam est, quia non erunt plures illis. Si autem ille numerus non erat in illis omnibus angelis, complendum est de hominibus et quod periit et quod prius deerat, et erunt electi homines plures reprobis angelis; et sic dicemus, quia non fuerunt homines facti tantum ad restaurandum numerum imminutum, sed etiam ad perficiendum nondum perfectum. *Bos.* Quid potius tenendum est, an quod angeli prius facti sint in numero perfecto, an non? *Ans.* Quod mihi videtur dicam. *Bos.* Non possum a te plus exigere. *Ans.* Si homo factus est post casum malorum angelorum, sicut quidam intelligunt in Genesi, non video posse me per hoc probare alterum horum determinate. Potest enim (ut puto) esse, quod angeli prius fuerint in numero perfecto, et postea factus sit homo propter restaurandum imminutum eorum numerum; et potest esse, quod non fuerint in numero perfecto, quia differebat Deus sicut adhuc differt, illum implere numerum, facturus huma-

1) quem modum E F a.

2) Cfr. Dialog. de Casu Diaboli c. 2. 3. 24.

- 6 nam naturam suo tempore. Unde aut solummodo numerum nondum integrum perficeret, aut etiam si minueretur, restitueret. Si autem tota creatura simul facta est, et dies illi in quibus Moyses istum mundum non simul factum esse videtur dicere, aliter sunt intelligendi, quam sicut videmus istos dies in quibus vivimus: intelligere nequeo, quomodo facti sint angeli in
- 7 illo perfecto numero. Quippe si ita esset, videtur mihi, quia ex necessitate aut aliqui homines vel angeli casuri erant, aut plures essent in illa coelesti civitate, quam
- 8 illa perfecti numeri convenientia exigeret. Si ergo omnia simul facta sunt, sic videntur angeli et duo primi homines in numero imperfecto fuisse, ut hominibus, si nullus caderet angelus, quod deerat solum perficeretur, et si aliquis periret, hoc quoque quod caderet, restitueretur; et hominis natura quae infirmior erat, quasi Deum excusaret atque diabolum confunderet, si ille suum casum infirmitati suae imputaret, cum ipsa infirmior staret; ac si et eadem ipsa caderet, multo magis Deum defenderet contra diabolum et contra se ipsam, cum ipsa facta valde infirmior et mortalis in electis de tanta infirmitate tanto altius ascenderet, quam unde diabolum cecidisset, quanto boni angeli quorum aequalitas ei debetur, profecerunt post ruinam malorum, quia perseveraverunt. Ex his rationibus potius mihi videtur, quia
- 9 in angelis non fuit ille perfectus numerus, quo civitas illa superna perficeretur; quoniam si homo simul cum angelis factus non est, sic possibile est esse; et si simul facti sunt, quod magis putant multi, quoniam legitur: *qui vivit in aeternum, creavit omnia simul,*¹⁾
- 10 videtur necesse esse. Sed et si perfectio mundanae creaturae non tantum est intelligenda in numero individuorum, quantum in numero naturarum, necesse est

1) Ecclesiastic. 18, 1.

humanam naturam aut ad complementum eiusdem perfectionis esse factam aut illi superabundare, quod de minimi vermiculi natura dicere non audemus. Quare 11 pro se ipsa ibi facta est et non solum pro restaurandis individuis alterius naturae. Unde palam est, quia etiamsi angelus nullus periisset, homines tamen in coelesti civitate suum locum habuissent. Sequitur itaque, quia in 12 angelis antequam quidam illorum caderent, non erat ille perfectus numerus; alioquin necesse erat, ut aut homines aut angeli aliqui caderent: quoniam extra numerum illum perfectum nullus ¹⁾ manere poterat. *Bos.* Non 13 nihil efficisti. *Ans.* Est et alia ratio, ut mihi videtur, quae non parum suffragatur illi sententiae, quae angelos non esse factos in perfecto numero existimat. *Bos.* Dic illam. *Ans.* Si angeli in illo perfecto numero facti 14 sunt, et nullatenus facti sunt homines nisi pro restauratione perditorum angelorum, palam est, quia nisi angeli ab illa beatitudine cecidissent, homines ad illam non ascenderent. *Bos.* Hoc constat. *Ans.* Si quis vero 15 dixerit, quia tantum laetabuntur electi homines de angelorum perditione, quantum gaudebunt de sua assumptione, quoniam absque dubio haec non esset nisi illa fuisset; quomodo poterunt ab hac perversa gratulatione defendi? aut quomodo dicemus angelos qui ceciderunt, ex hominibus restauratos, si illi sine hoc vitio perman- 16 suri erant si non cecidissent, id est, sine gratulatione de casu aliorum; isti vero sine illo esse non poterunt? Imo qualiter cum hoc vitio beati esse debebunt? 17 Deinde qua audacia dicemus, Deum non velle aut non posse hanc restaurationem sine hoc vitio facere? *Bos.* 18 Nonne similiter est in Gentibus quae ad fidem vocatae sunt, quia illam Iudaei repulerunt? *Ans.* Non; nam si 18

1) *extra numerum illum perfectum nullus* A a —
ext. num. perf. ibi nullus.

- omnes Iudaei credidissent, Gentes tamen vocarentur; quia in omni gente, qui timet Deum et operatur iustitiam, acceptus est illi.¹⁾ Sed quoniam Iudaei apostolos contemserunt, ea tunc fuit occasio, ut ad Gentes illi converterentur. *Bos.* Nullo modo video, quid contra haec dicere possim. *Ans.* Unde tibi videtur accidere
- 20 singularis illa laetitia de alieno casu? *Bos.* Unde, nisi quia certus erit unusquisque, quoniam ubi erit nullatenus esset, nisi alius inde cecidisset? *Ans.* Si ergo hanc certitudinem nullus haberet, non esset unde ullus de
- 21 alieno damno gauderet. *Bos.* Ita videtur. *Ans.* Putasne aliquem illorum habiturum hanc certitudinem, si
- 22 multo plures erunt quam qui ceciderunt? *Bos.* Nequaquam possum opinari, quod eam habeat aut habere debeat. Quomodo namque quis poterit scire, utrum pro restaurando quod imminutum erat, aut pro complendo quod nondum perfectam erat, de illo numero constituendae civitatis sit factus? sed omnes certi erunt, se
- 23 factos esse ad perficiendam illam civitatem. *Ans.* Ergo si plures erunt quam reprobi angeli, nullus poterit aut debebit scire, se non esse ibi assumptum nisi pro alieno
- 24 casu. *Bos.* Verum est. *Ans.* Non igitur habebit aliquis, cur gaudere debeat de alterius perditione. *Bos.*
- 25 Ita sequitur. *Ans.* Cum itaque videamus, quia si plures erunt homines electi quam sint reprobi angeli, illa non sequetur²⁾ inconvenientia, quam³⁾ sequi necesse est, si plures non erunt; et cum impossibile sit ullum in illa civitate futurum inconueniens, videtur necesse esse, ut angeli non sint facti in illo perfecto numero, et plures futuri sint beati homines quam sint miseri
- 26 angeli. *Bos.* Non video, qua ratione hoc negari queat.

1) Acta Apost. 10, 35.

2) sequetur A a — sequatur A b c B E F a.

3) quae B.

Ans. Aliam adhuc eiusdem sententiae posse dici puto rationem. *Bos.* Hanc quoque proferre debes. *Ans.* Cre- 27
 dimus hanc mundi molem corpoream in melius renovandam nec hoc futurum esse, donec impleatur numerus electorum hominum et illa beata perficiatur civitas, nec post eius perfectionem differendum. Unde colligi pot- 28
 est Deum ab initio proposuisse, ut utrumque simul perficeret; quatenus et minor quae Deum non sentiret, natura ante maiorem quae Deo frui deberet, nequaquam perficeretur; et in maioris perfectione mutata in melius suo quodam modo quasi congratularetur; imo omnis creatura de tam gloriosa et tam admirabili sui consummatione ipsi creatori et sibi invicem quaeque suo modo aeternae congaudendo iocundaretur, quatenus quod voluntas in rationali natura sponte facit, hoc et iam insensibilis creatura per Dei dispositionem naturaliter exhiberet. Solemus namque in maiorum nostrorum exaltatione congaudere, ut cum in natalitiis Sanctorum exultatione festiva iocundamur de gloria eorum laetantes. 29
 Quam sententiam illud adiuvare videtur, quia si Adam 30
 non peccasset, differret tamen Deus illam civitatem perficere, donec completo ex hominibus quem expectabat numero, ipsi quoque homines in corporum, ut ita dicam, 31
 immortalem transmutarentur immortalitatem. Habebant enim in paradiso quandam immortalitatem i. e. potestatem non moriendi, sed non erat immortalis haec potestas, quia poterat mori, ut scilicet ipsi non possent mori. Quod si¹⁾ ita est, ut videlicet rationalem illam 32
 et beatam civitatem et hanc mundanam insensibilemque naturam Deus ab initio proposuerit simul perficere, videtur quia aut illa civitas non erat completa in numero angelorum ante malorum ruinam, sed expectabat Deus, ut eam de hominibus compleret, quando corpoream

1) *Sed si A a.*

- mundi naturam in melius mutaret; aut si perfecta erat in numero, non perfecta erat in confirmatione, et differenda erat eius confirmatio, etiamsi nullus in ea peccasset, usque ad eam mundi quam expectamus renovationem; aut si non diutius illa confirmatio differenda erat, acceleranda erat mundana renovatio, ut cum eadem
- 33 confirmatione fieret. Sed quod mundum noviter factum statim Deus renovare et eas res quae post renovationem illam non erunt, in ipso initio, antequam appareret cur factae essent, destruere instituerit, omni caret ratione.
- 34 Sequitur ergo, quia angeli non ita fuerunt in numero perfecto, ut eorum confirmatio non diu differretur, propterea quia mundi novi renovationem mox oporteret
- 35 fieri; quod non convenit. Quod autem eandem confirmationem usque ad mundi futuram renovationem differre Deus voluerit, inconueniens videtur, praesertim cum illam in aliquibus tam cito perfecit; et cum intelligi possit, quia in primis hominibus quando peccaverunt, illam fecisset si non peccassent, sicut fecit in perseve-
- 36 rantibus angelis. Quamvis enim nondum proveherentur ad illam aequalitatem angelorum, ad quam perventuri erant homines, cum perfectus esset numerus de illis assumendus; in illa tamen iustitia in qua erant, videtur, quod, si vicissent ut non peccarent tentati, ita confirmarentur cum omni propagine sua, ut ultra peccare non possent: quemadmodum qui¹⁾ victi peccaverunt, sic infirmati sunt, ut, quantum in ipsis est, sine
- 37 peccato esse non possint. Quis enim audeat dicere plus valere iniustitiam ad alligandum in servitute hominem in prima suasionem sibi consentientem, quam valeret iustitia ad confirmandum eum in libertate, sibi in eadem
- 38 prima tentatione adhaerentem? Nam quemadmodum, quoniam humana natura tota erat in parentibus primis,

1) *qui B — quia.*

tota in illis victa est, ut peccaret (excepto illo solo homine, quem Deus sicut scivit sine viri semine de Virgine facere, sic scivit a peccato Adae secernere), ita in eisdem tota vicisset, si non peccassent. Restat ergo, 39 ut non completa in illo primo numero angelorum superna civitas sed de hominibus complenda fuisse dicatur. Quae si rata sunt, plures erunt electi homines quam sint reprobi angeli. *Bos.* Rationabilia mihi valde videntur 40 quae dicis; sed quid dicemus, quia legitur de Deo: *constituit terminos populorum iuxta numerum filiorum Israel?* 1) Quod quidam, quia pro *filiorum Israel* invenitur *angelorum Dei*, 2) sic exponunt, ut secundum numerum honorum angelorum assumendus intelligatur numerus electorum hominum. *Ans.* Hoc non repugnat 41 praedictae sententiae, si certum non est, quod totidem angeli cecidissent quot remanserunt. Nam si plures sunt angeli electi quam reprobi, et necesse est ut reprobos electi homines restaurent, et potest fieri ut beatorum numero coequantur, et sic plures erunt homines iusti quam angeli iniusti. Sed memento, 3) quo pacto in- 42 cepi tuae respondere quaestioni; ut videlicet si quid dixerem, quod maior non confirmet auctoritas, quamvis illud ratione probare videar, non alia certitudine accipiat, nisi quia interim mihi ita videtur, donec mihi Deus melius aliquo modo revelet. Certus enim sum, si 43 quid dico quod sacrae scripturae 4) absque dubio con-

1) Deuteron. 32, 8.

2) LXX: κατὰ ἀριθμὸν ἀγγέλων θεοῦ.

3) Vide supra c. 2, 9.

4) „Sicut Deus in principio per miraculum fecit frumentum et alia de terra nascentia ad alimentum hominum sine cultore et seminibus, ita sine humana doctrina mirabiliter fecit corda prophetarum et apostolorum nec non et evangelistarum foecunda salutaribus seminibus:

traducat, quia falsum est; nec illud tenere volo, si
 44 cognovero. Sed si in illis rebus, de quibus diversa
 sentiri possunt sine periculo, sicut est illud unde nunc
 agimus — si enim nescimus, utrum plures homines eli-
 gendi sint quam angeli perdit¹⁾ an non, et alterum
 horum aestimamus magis quam alterum; nullum puto
 esse animae periculum —: si, inquam, huiusmodi rebus
 sic exponimus divina dicta, ut diversis sententiis favere
 videantur, nec alicubi invenitur, ubi quid indubitanter
 tenendum sit determinent; non arbitror reprehendi de-
 45 bere. Illud autem, quod dixisti: *constituit terminos*
populorum, seu gentium, *iuxta numerum angelorum Dei*,
 quod in alia translatione²⁾ legitur: *iuxta numerum fi-*
liorum Israel: quoniam ambae translationes aut idem
 significant aut diversa sine repugnantia, ita intelligen-
 dum est, ut et per angelos Dei et per filios Israel angeli
 boni significantur tantummodo, aut soli homines electi,
 aut simul angeli et electi homines, tota scilicet illa ci-
 46 vitas superna. Aut per angelos Dei sancti angeli tan-
 tum et per filios Israel soli homines iusti. Aut soli

unde accipimus quicquid salubriter in agricultura Dei
 ad alimentum animarum seminamus; sicut non nisi de
 primis terrae seminibus habemus, quod ad nutrimentum
 corporum propagamus. Siquidem *nihil* utiliter ad sa-
 lutem spirituales praedicamus, quod *Sacra Scriptura*
 Spiritus S. miraculo foecundata non protulerit aut intra
 se non contineat.“ Tractat. *de Concordia Gratiae Dei*
cum libero arbitrio c. 6. — Cfr. *Eadmerus de Vita S.*
Anselmi L. 1. p. 5. ed. Maur.: „Divinis Scripturis tan-
 tam fidem adhibebat, ut indissolubili firmitate cordis
 crederet nihil in eis esse, quod solidae veritatis trami-
 tem ullo modo exiret. Quapropter summo studio ani-
 mum ad hoc intenderat, quatenus iuxta fidem suam
 mentis ratione mereretur percipere, quae in ipsis sensit
 multa caligine tecta latere.“

1) *quam sint ang. perd.* A a b c E F a — *reprobi* B.

2) *Vulgata.*

angeli per filios Israel et iusti homines per angelos Dei. Si boni angeli tantum designantur per utrumque, idem 47 est quod si solum per angelos Dei; si vero tota coelestis civitas, hic est sensus, quia tam diu assumentur populi i. e. multitudines electorum hominum, aut tam diu erunt populi in hoc saeculo, donec de hominibus praedestinatus numerus illius civitatis nondum perfectus compleatur. Sed non video nunc, quomodo soli angeli 48 aut simul angeli et homines sancti per filios Israel intelligantur; sanctos autem homines filios Israel, sicut filios Abrahae vocari, non est alienum. Qui angeli quo- 49 que Dei per hoc recte possunt vocari, quia vitam angelicam imitantur, atque similitudo et aequalitas angelorum illis promittitur in coelo, et quia omnes iuste viventes angeli Dei sunt. Unde ipsi confessores atque 50 martyres¹⁾ dicuntur; qui enim confitetur et testatur veritatem, Dei nuntius i. e. angelus eius est. Et si malus homo dicitur diabolus, sicut de Iuda dicit Dominus²⁾ propter similitudinem malitiae: cur non etiam bonus homo dicitur angelus propter imitationem iustitiae? Quare possumus, ut puto, dicere, Deum constituisse *ter-* 51 *minos populorum iuxta numerum* electorum hominum, quia tamdiu erunt populi et erit in hoc mundo hominum procreatio, donec numerus eorundem electorum hominum compleatur; et eo completo cessabit hominum generatio, quae fit in hac vita. At si per angelos Dei 52 intelligimus sanctos angelos tantum et per filios Israel tantummodo iustos homines, duobus modis intelligi potest, quia *constituit Deus terminos populorum iuxta numerum* angelorum Dei: aut quia tantus populus i. e. tot homines assumentur quot sunt sancti angeli Dei,

1) Est haec lectio omn. Codd. comm.

2) Cfr. Ioann. 6, 70: „ἐξ ὑμῶν εἰς διάβολός ἐστιν.“

aut quia tamdiu erunt populi, donec numerus angelorum
 53 Dei compleatur ex hominibus. Et hoc uno solo modo
 exponi posse video: *constituit terminos populorum iuxta*
numerum filiorum Israel, id est, quia (sicut supra di-
 ctum est) tamdiu erunt populi in hoc saeculo, donec nu-
 54 merus sanctorum hominum assumatur. Et colligitur ex
 utraque translatione, quia tot homines assumentur quot
 remanserunt angeli. Unde tamen non sequitur, quam-
 vis perditii angeli ex hominibus restaurandi sunt, tot
 55 angelos cecidisse quot perseveraverunt. Quod tamen
 si dicitur, inveniendum erit, quomodo ratae non sint
 supra positae rationes, quae videntur ostendere non
 fuisse in angelis, prius quam illorum quidam caderent,
 illum perfectum numerum quem supra dixi, et plures
 56 homines electos futuros quam sint mali angeli. *Bos.* Non
 me poenitet quia coegi te, ut de angelis haec diceres;
 nam non frustra factum est. Nunc redi ad id unde
 digressi sumus.

- 1 **19.** *Ans.* Constat Deum proposuisse, ut de homi-
 nibus angelos qui ceciderant restauraret. *Bos.* Certum
 2 est. *Ans.* Tales ergo oportet esse homines in illa civi-
 tate superna qui pro angelis in illam assumentur, qua-
 les illi futuri ibi erant, pro quibus ibidem erunt i. e.
 quales nunc sunt boni angeli; alioquin non erunt re-
 staurati qui ceciderunt, et sequetur, quia Deus aut non
 poterit perficere bonum quod incepit, aut poenitebit
 eum tantum bonum incepisse; quae duo absurda sunt.
 3 *Bos.* Vere oportet ut aequales sint homines bonis ange-
 lis. *Ans.* Boni angeli unquamne peccaverunt? *Bos.*
 4 Non. *Ans.* Potesne cogitare, quod homo qui aliquando
 peccavit nec unquam Deo pro peccato suo satisfacit,
 sed tantum impunitus dimittitur, aequalis sit angelo qui
 5 nunquam peccavit? *Bos.* Verba ista cogitare et dicere

possum; sed sensum eorum ita cogitare nequeo, sicut falsitatem non possum intelligere veritatem esse. *Ans.* 6
 Non decet ergo Deum, hominem peccantem sine satisfactione ad restaurationem angelorum assumere perditorum; quoniam non patitur veritas eum levari ad aequalitatem beatorum.¹⁾ *Bos.* Sic ostendit ratio. *Ans.* Con- 7
 sidera etiam in solo homine sine hoc quia²⁾ debet angelis aequari, utrum eum taliter Deus ad beatitudinem ullam vel talem, qualem habebat antequam peccaret, debeat provehere? *Bos.* Dic tu quod cogitas, et ego considerabo prout potero. *Ans.* Ponamus divitem 8
 quem in manu tenere margaritam pretiosam, quam nunquam pollutio ulla tetigit quamque nullus alius possit amovere de manu eius nisi ipso permittente; et eam disponat recondere in thesaurum suum, ubi sunt charissima et pretiosissima quae possidet. *Bos.* Cogito hoc velut ante nos. *Ans.* Quid, si ipse permittat eandem 9
 margaritam ab aliquo invido excuti de manu sua in coenum, cum prohibere possit;³⁾ ac postea eam de coeno sumens pollutam et non lotam in aliquem locum suum mundum et charum, deinceps illam sic servaturus, recondat: putabisne illum sapientem? *Bos.* Quomodo 10
 hoc possum? nam nonne esset satis melius, ut margaritam suam mundam teneret et servaret quam pollutam? *Ans.* Nonne similiter faceret Deus, qui hominem ange- 11
 lis sociandum sine peccato quasi in manu sua tenebat in paradiso et permisit, ut accensus invidia diabolus eum, in lutum peccati quamvis consentientem deiiceret? Si enim prohibere vellet diabolus, non posset tentare hominem. Nonne, inquam, similiter faceret, si hominem 12
 peccati sorde maculatum sine omni lavatione i. e.

1) *beatorum* A b c B C D E F a — *bonorum* A a F b.

2) *sine hoc quia*: omn. Codd.

3) Ita omn. Codd.

- absque omni satisfactione, talem semper mansurum saltem in paradisum, de quo eiectus fuerat, reduceret?
- 13 *Bos.* Similitudinem, si Deus hoc faceret, negare non audeo et idcirco eum hoc facere posse non annuo. Videretur enim aut quod proposuerat peragere non potuisse, aut boni propositi eum poenituisse; quae in
- 14 Deum cadere nequeunt. *Ans.* Tene igitur certissime, quia sine satisfactione i. e. sine debiti solutione spontanea nec Deus potest peccatum impunitum dimittere nec peccator ad beatitudinem vel talem, qualem habebat antequam peccaret, pervenire; non enim hoc modo repararetur homo vel talis, qualis fuerat ante
- 15 peccatum. *Bos.* Rationibus tuis omnino contradicere non possum. Sed quid est, quod dicimus Deo: *dimitte nobis debita nostra*;¹⁾ et omnis gens orat Deum quem
- 16 credit, ut dimittat sibi peccata? Si enim solvimus quod debemus, cur oramus, ut dimittat? Numquid Deus iniustus est, ut iterum exigat quod solutum est? Si autem non solvimus, cur frustra oramus, ut faciat quod,
- 17 quia non convenit, facere non potest? *Ans.* Qui non solvit, frustra dicit: *dimitte*; qui autem solvit, supplicat, quoniam hoc ipsum pertinet ad solutionem ut supplicet; nam Deus nulli quidquam debet, sed omnis creatura illi debet; et ideo non expedit homini, ut agat
- 18 cum Deo, quemadmodum par cum pari. Sed de hoc non est opus nunc tibi respondere. Cum enim cognoscas, cur Christus mortuus est, forsitan per te videbis
- 19 quod quaeris. *Bos.* Sufficit ergo nunc mihi,²⁾ quod de hac quaestione respondes. Quod autem nullus homo ad beatitudinem pervenire queat cum peccato aut solvi a peccato, nisi solvat quod rapuit peccando, sic aperte monstrasti, ut, etiamsi velim, non possim dubitare.

1) Matth. 6, 12.

2) Sic A a b c B E F a.

20. *Ans.* Hoc quoque non dubitabis, ut puto, 1
quia secundum mensuram peccati oportet satisfactionem
esse. *Bos.* Aliter aliquatenus inordinatum maneret pec- 2
catum, quod esse non potest, si Deus nihil relinquit
inordinatum in regno suo.¹⁾ Sed hoc est praestitutum, 3
quia quamlibet parvum inconueniens in Deo impossi-
bile est. *Ans.* Dic ergo, quid solves Deo pro peccato
tuo? *Bos.* Poenitentiam, cor contritum et humiliatum, 4
abstinentias et multimodos labores corporis et miseri-
cordiam dandi et dimittendi et obedientiam. *Ans.* Quid 5
in his omnibus das Deo? *Bos.* An non honoro Deum,
quando propter timorem eius et amorem in cordis con-
tritione laetitiam temporalem abiicio, in abstinentiis et
laboribus delectationes et quietem huius vitae calco, in
dando et dimittendo quae mea sunt largior, in obedien-
tia meipsum illi subiicio? *Ans.* Cum reddis aliquid, 6
quod debes Deo etiamsi non peccasti, non debes com-
putare hoc pro debito, quod debes pro peccato. Omnia 7
autem ista debes Deo, quae dicis. Tantus namque de-
bet esse in hac mortali vita amor, et ad quod pertinet
oratio, desiderium perveniendi ad id ad quod factus es,
et dolor quia nondum ibi es, et timor ne non pervenias,
ut nullam laetitiam sentire debeas nisi de his, quae tibi
aut auxilium aut spem dant perveniendi. Non enim me- 8
reris habere, quod non secundum quod est amas et de-
sideras, et de quo, quia nondum habes et adhuc utrum
habiturus sis an non in tanto es periculo, non doles.
Ad quod etiam pertinet, quietem et delectationes mun- 9
danas, quae animum ab illa vera quiete et delectatione
revocant, fugere, nisi quantum ad intentionem illuc
perveniendi cognoscis sufficere. Dationem vero ita de- 10
bes considerare te facere ex debito, sicut intelligis, quia

1) Vide supra c. 12, 3.

- quod das a te non habes sed ab illo, cuius servus es tu et ille cui das; et natura te docet, ut conservo tuo i. e. homo homini, facias quod tibi ab illo vis fieri;¹⁾ et quia, qui non vult dare quod habet, non debet accipere quod non habet. De dimissione vero breviter dico, quia nullatenus pertinet²⁾ ad te vindicta, sicut supra³⁾ diximus; quoniam nec tu tuus es, nec ille tuus aut suus qui tibi fecit iniuriam, sed unius Domini servi facti ab illo de nihilo estis; et si de conservo tuo te vindicas, iudicium quod proprium Domini et iudicis omnium est, super illum superbe praesumis. In obedientia vero quid das Deo quod non debes, cui iubenti totum quod es et quod habes et quod potes, debes?
- 13 *Bos.* Nihil iam audeo in his omnibus dicere me dare Deo, quod debeo. *Ans.* Quid ergo solves Deo pro peccato tuo? *Bos.* Si meipsum et quidquid possum, etiam quando non pecco, illi debeo ne peccem, nihil habeo quod pro peccato illi reddam. *Ans.* Quid ergo erit de te? Quomodo poteris salvus esse? *Bos.* Si rationes tuas considero, non video quomodo. Si autem ad fidem meam recurro, in fide christiana quae per dilectionem operatur,⁴⁾ spero me posse salvari, et quia legimus,⁵⁾ si iniustus conversus fuerit ab iniustitia sua et fecerit iustitiam, omnes iniustitias eius tradi oblivioni. *Ans.* Hoc non dicitur nisi de illis, qui aut expectaverunt Christum antequam veniret, aut credunt in eum postquam venit. Sed Christum et christianam fidem quasi nunquam fuisset posui-

1) Cfr. Matth. 7, 12.

2) *pertinet*: omn. Codd.

3) c. 12, 12: „Ad nullum pertinet vindictam facere nisi ad illum, qui Dominus est omnium.“

4) Galat. 5, 6.

5) Ezechiel 18, 27; 33, 14 sq.

mus,¹⁾ quando sola ratione, utrum adventus eius ad salvationem hominum esset necessarius, quaerere proposuimus. *Bos.* Ita fecimus. *Ans.* Sola igitur ratione 18 procedamus. *Bos.* Quamvis in angustias quasdam me ducas, desidero tamen multum, ut, sicut incepisti, progrediaris.

21. *Ans.* Ponamus omnia illa, quae modo posuisti te pro peccato posse solvere, te non debere et videamus, utrum possint sufficere ad satisfactionem unius tam parvi peccati, sicuti est unus aspectus contra voluntatem Dei. *Bos.* Nisi quia audio te hoc ponere in 2 quaestionem, putarem me hoc peccatum una sola compunctione delere. *Ans.* Nondum considerasti, quanti ponderis sit peccatum. *Bos.* Nunc ostende mihi. *Ans.* 3 Si videres te in conspectu Dei et aliquis tibi diceret: aspice illuc, et Deus econtra: nullatenus volo, ut aspicias; quaere tu ipse in corde tuo, quid sit in omnibus quae sunt, pro quo deberes contra voluntatem Dei illum aspectum facere? *Bos.* Nihil invenio propter quod hoc 4 debeam, nisi forte sim in ea necessitate positus, ut sit necesse me aut hoc aut maius peccatum facere. *Ans.* Remove hanc necessitatem, et de solo hoc peccato 5 considera, si possis illud facere pro teipso redimendo. *Bos.* Aperte video, quia non possum. *Ans.* Ne te 6 diutius protraham: quid, si necesse esset aut totum mundum et quidquid Deus non est perire et in nihilum redigi, aut de facere tam parvam rem contra voluntatem Dei? *Bos.* Cum considero actionem ipsam, levis- 7 simum quiddam video esse; sed cum intueor, quid sit

1) Vide quae in Praefatione sua S. Anselmus de disserendi ratione sibi ineunda monuit. „remoto Christo.“ — Cfr. c. 10, 28: „Ponamus Dei incarnationem — numquam fuisse.“

- contra voluntatem Dei, gravissimum quiddam et nulli damno comparabile intelligo; sed solemus aliquando facere contra voluntatem alicuius non reprehensibiliter, ut res eius serventur; quod postea illi placet, contra cuius voluntatem facimus. *Ans.* Hoc fit homini, qui aliquando non intelligit quid sit sibi utile, aut non potest restaurare quod perdidit; sed Deus nullo indiget, et omnia si perirent, posset sicut ea fecit restituere.
- 9 *Bos.* Fateri me necesse est, quia pro conservanda tota creatura nihil deberem facere contra voluntatem Dei.
- 10 *Ans.* Quid si plures essent mundi pleni creaturis, sicut iste est? *Bos.* Si infinito numero multiplicarentur et similiter mihi ostenderentur, idipsum responderem.
- 11 *Ans.* Nihil rectius potes; sed considera etiam, si contingeret, ut contra voluntatem Dei illum aspectum faceres; quid posses pro hoc peccato solvere? *Bos.* Non habeo aliquid maius quam quod supra dixi. *Ans.* Sic graviter peccamus, quotiescunque scienter aliquid quamlibet parvum contra voluntatem Dei facimus; quoniam semper sumus in conspectu eius, et semper ipse praecipit nobis ne peccemus. *Bos.* Ut audio, nimis periculose vivimus. *Ans.* Patet, quia secundum quantitatem exigit Deus satisfactionem. *Bos.* Non possum negare.
- 14 *Ans.* Non ergo satisfacis, si non reddis aliquid maius, quam sit id pro quo peccatum facere non debueras. *Bos.* Et rationem video sic exigere et omnino esse
- 15 impossibile. *Ans.* Nec Deus ullum obligatum aliquatenus debito peccati assumere potest ad beatitudinem, quia non debet. *Bos.* Nimis est gravis haec sententia.

1 **22.** *Ans.* Audi adhuc aliud,¹⁾ cur non minus sit difficile hominem reconciliari Deo. *Bos.* Nisi fides me

1) Codicum secutus consensum, a verbis: *audi adhuc* etc. initium capituli 22 duxi faciendum.

consolaretur, hoc solum cogeret me desperare. *Ans.* Audi tamen. *Bos.* Dic. *Ans.* Homo in paradiso sine peccato 2 factus quasi positus est pro Deo inter Deum et diabolum, ut vinceret diabolum non consentiendo suadenti peccatum, ad excusationem et honorem Dei et ad confusionem diaboli, cum ille infirmior in terra non peccaret eodem diabolo suadente, qui fortior peccavit in coelo nullo suadente; et cum hoc homo facile posset efficere, nulla vi coactus sola suasionem sponte se vinci permisit ad voluntatem diaboli et contra voluntatem et honorem Dei. *Bos.* Ad quid vis tendere? *Ans.* Iudica 3 tu ipse, si non est contra honorem Dei, ut homo reconcilietur illi cum calumnia huius contumeliae Deo irrogatae, nisi prius honoraverit Deum vincendo diabolum, sicut inhonoravit illum victus a diabolo. Victoria vero talis esse debet, ut sicut fortis ac pote- 4 state immortalis consensit facile diabolo ut peccaret, unde iuste incurrit poenam mortalitatis; ita infirmus et mortalis, qualem se fecit ipse, per mortis difficultatem vincat diabolum ut nullo modo peccet; quod facere non potest, quamdiu ex vulnere primi peccati concipitur et nascitur in peccato. *Bos.* Iterum dico, quia et 5 ratio probat quod dicis, et impossibile est.

23. *Ans.* Adhuc¹⁾ accipe unum, sine quo iuste 1 non reconciliatur homo, nec minus impossibile est. *Bos.* Tot iam proposuisti nobis quae facere debemus, ut quidquid superaddas, non me magis terrere possit. *Ans.* Audi tamen. *Bos.* Audio. *Ans.* Quid abstulit 2 homo Deo, cum vinci se permisit a diabolo? *Bos.* Dic tu ut incepisti, quia ego nescio, quid super haec mala quae ostendisti potuit addere. *Ans.* Nonne abstulit 3

1) In Mscr. hic incipit c. 23.

- Deo, quidquid de humana natura facere proposuerat?
- 4 *Bos.* Non potest negari. *Ans.* Intende in districtam iustitiam; et iudica secundum illam, utrum ad aequalitatem peccati¹⁾ homo satisfaciatur Deo, nisi id ipsum, quod permittendo se vinci a diabolo Deo abstulit, diabolum vincendo restituat, ut quemadmodum per hoc quod victus est rapuit diabolus quod Dei erat, et Deus perdidit, ita per hoc quod vincat perdat diabolus, et Deus recuperet. *Bos.* Ne districtius nec iustius aliquid
- 5 potest cogitari. *Ans.* Putasne summam iustitiam hanc iustitiam posse violare? *Bos.* Non audeo cogitare.
- 6 *Ans.* Nullatenus ergo debet aut potest accipere homo a Deo quod Deus illi dare proposuit, si non reddit Deo totum quod illi abstulit; ut sicut per illum Deus
- 7 perdidit, ita per illum Deus recuperet. Quod non aliter fieri valet, nisi ut quemadmodum per victum tota humana natura corrupta et quasi fermentata est peccato, cum quo nullum Deus assumit ad perficiendam illam civitatem coelestem; ita per vincentem iustificentur a peccato tot homines, quot illum numerum completuri erant, ad quem complendum factus est homo. Sed hoc facere nullatenus potest homo peccator, quia
- 8 peccator peccatorem iustificare nequit. *Bos.* Et nihil iustius et nihil impossibilius; sed ex his omnibus videtur misericordia Dei et spes hominis perire, quantum ad beatitudinem spectat, ad quam factus est homo. *Ans.* Exspecta adhuc parum. *Bos.* Quid habes amplius?

- 1 **24.** *Ans.* Si homo dicitur iniustus, qui homini non reddit quod debet, multo magis iniustus est, qui
- 2 Deo quod debet non reddit. *Bos.* Si potest et non

1) Cfr. c. 20, 1: „secundum mensuram peccati oportet satis factionem esse.“ c. 21, 13: „secundum quantitatem exigit Deus satisfactionem.“

reddit, vere iniustus est. Si vero non potest, quomodo iniustus est? *Ans.* Forsitan si nulla in illo est impotentiae causa, aliquatenus excusari potest. Sed si in ipsa impotentia est culpa: sicut non levigat peccatum, ita non excusat non reddentem debitum. Nam si quis iniungat aliquod opus servo suo et praecipiat illi, ne deiciat se in foveam quam illi monstrat,¹⁾ unde nullatenus exire possit; et servus ille contemnens mandatum et monitionem domini sui sponte se in praemonstratam mittat foveam, ut nullatenus possit iniunctum opus efficere: putasne illi aliquatenus impotentiam istam ad excusationem valere, cur opus iniunctum non faciat? *Bos.* Nullo modo, sed ad augmentum potius culpae, quoniam ipse impotentiam illam sibi fecit. Dupliciter namque peccavit, quia et quod iussus est facere non fecit, et quod praeceptum est ne faceret fecit. *Ans.* Ita homo, qui se sponte obligavit illo debito quod solvere non potest, et sua culpa deiecit se in hanc impotentiam, ut nec illud possit solvere quod debebat ante peccatum, id est, ne peccaret, nec hoc quod debet, quia peccavit: inexcusabilis est. Ipsa namque impotentia culpa est, quia non debet eam habere, imo debet eam non habere; nam sicut culpa est non habere quod debet habere, ita culpa est habere quod debet non habere. Sicut ergo culpa est homini non habere potestatem illam, quam accepit ut posset cavere peccatum, sic culpa est illi habere impotentiam, qua nec iustitiam tenere et peccatum cavere, nec quod pro peccato debet reddere potest. Sponte namque fecit, unde perdidit illam potestatem et devenit in hanc impotentiam. Idem enim est, non habere potestatem quam debet habere, et habere impotentiam quam debet non habere. Quapropter impotentia reddendi Deo quod debet, quae

1) *monstrat* A a b c E F a — *demonstrat.*!

- facit ut non reddat, non excusat hominem, si non reddit; quoniam effectum peccati non excusat peccatum quod facit. *Bos.* Et grave nimis est et ita esse necesse
- 11 est. *Ans.* Iniustus ergo homo est, qui non reddit Deo quod debet. *Bos.* Nimis est verum; nam iniustus est quia non reddit, et iniustus est quia reddere nequit.
- 12 *Ans.* Nullus autem iniustus admittetur ad beatitudinem; quoniam, quemadmodum beatitudo est sufficientia in qua nulla est indigentia, sic nulli convenit nisi in quo ita pura est iustitia, ut nulla in eo sit iniustitia. *Bos.* Non
- 13 audeo aliter credere. *Ans.* Qui ergo non solvit Deo quod debet, non poterit esse beatus. *Bos.* Nec hoc
- 14 consequi negare possum. *Ans.* Quod si vis dicere, quia misericors Deus dimittit supplicanti quod debet, idcirco quia reddere nequit, non potest dici dimittere, nisi aut hoc quod homo sponte reddere debet nec potest, id est, quod recompensari possit peccato, quod fieri non deberet pro conservatione omnis rei quae Deus non est; aut hoc quod puniendo erat ablaturus invito, sicut supra ¹⁾ dixi, i. e. beatitudinem; sed si dimittit quod sponte reddere debet homo, ideo quia reddere non potest, quid est aliud, quam dimittit Deus quod habere non potest? Sed derisio est, ut talis misericordia Deo
- 15 attribuat. At si dimittit quod invito erat ablaturus, propter impotentiam reddendi quod sponte reddere debet, relaxat Deus poenam et facit beatum hominem propter peccatum, quia habet quod debet non habere.
- 16 Nam ipsam impotentiam debet non habere, et idcirco quamdiu illam habet sine satisfactione, peccatum est illi; verum huiusmodi misericordia Dei nimis est contraria iustitiae illius, quae non nisi poenam permittit reddi
- 17 propter peccatum. Quapropter quemadmodum Deum sibi esse contrarium, ita hoc modo illum esse miseri-

1) c. 14, 5.

cordem est impossibile. *Bos.* Aliam Dei misericordiam :
 video esse quaerendam, quam istam. *Ans.* Verum esto: 18
 dimittit Deus ei, qui non solvit quod debet, idcirco quo-
 niam non potest. *Bos.* Ita vellem. *Ans.* At quamdiu 19
 non reddet, aut volet reddere aut non volet. Sed si
 volet quod non poterit, indigens erit; si vero non volet, in-
 iustus erit. *Bos.* Hoc nihil clarius. *Ans.* Sive autem indi-
 gens sive iniustus sit, beatus non erit. *Bos.* Et hoc aper-
 tum. *Ans.* Quamdiu ergo non reddet, beatus esse non pote- 20
 rit. *Bos.* Si rationem sequatur Deus iustitiae, non est qua
 evadat miser homuncio, et misericordia Dei perire videtur.
Ans. Rationem postulasti, rationem accipe; misericordem 21
 Deum esse non nego, qui homines et iumenta salvat,
 quemadmodum multiplicavit misericordiam suam. Nos 22
 autem loquimur de illa ultima misericordia, qua post
 hanc vitam beatum facit hominem; hanc beatitudinem
 nulli dari debere nisi illi, cui penitus dimissa sunt pec-
 cata, nec hanc dimissionem fieri nisi debito reddito,
 quod debetur pro peccato secundum magnitudinem
 peccati, supra positis rationibus puto me sufficienter
 ostendisse. Quibus si quid tibi videtur posse rationibus 23
 obiici, dicere debes. *Bos.* Ego utique nullam tuarum
 rationum aliquatenus infirmari posse video. *Ans.* Neque 24
 ego, si bene considerentur, existimo; verumtamen si vel
 una de omnibus quas posui inexpugnabili veritate ro-
 boratur, sufficere debet. Sive namque uno sive pluribus
 argumentis veritas inexpugnabiliter monstratur, aequa-
 liter ab omni dubitatione defenditur.

25. *Bos.* Ecce ¹⁾ ita est. Quomodo ergo salvus 1
 erit homo, si ipse nec solvit quod debet, nec salvari si
 non solvit debet? aut qua fronte asseremus, Deum in
 misericordia divitem super ²⁾ humanum intellectum hanc

1) In Mscr. hic incipit c. 25.

2) *Supra* A a b c B E F a.

- 2 misericordiam facere non posse? *Ans.* Hoc debes nunc ab illis exigere, (qui Christum non esse credunt necessarium ad illam salutem hominis) quorum vice loqueris, ut dicant, qualiter homo salvari sine Christo possit.
- 3 Quod si non possunt ullo modo, desinant nos irridere et accedant et iungant se nobis, qui non dubitamus hominem salvari posse per Christum; aut desperent hoc
- 4 ullo modo posse fieri. Quod si horrent, credant nobiscum in Christum, ut possint salvari. *Bos.* A te quaeram, sicut incepti, ut ostendas mihi, qua ratione salvetur
- 5 homo per Christum. *Ans.* Nonne sufficienter probatur per Christum hominem posse salvari, cum etiam infideles non negent hominem ullo modo posse fieri beatum, et satis ostensum sit, quia si ponimus Christum non
- 6 esse, nullo modo potest inveniri salus hominis? Aut enim per Christum aut alio aliquo aut nullo modo poterit homo salvus esse; quapropter si falsum est, quia nullo aut aliquo alio modo potest hoc esse, necesse est fieri per Christum. *Bos.* Si quis videns rationem quia alio modo non potest esse, et non intelligens qua ratione per Christum esse valeat, asserere velit, quia nec per Christum nec ullo modo queat hoc
- 8 esse: quid huic respondebimus? *Ans.* Quid respondendum est illi, qui idcirco astruit esse impossibile quod necesse est esse, quia nescit, quomodo sit? *Bos.* Quia insipiens est. *Ans.* Contemnendum est ergo quod dicit. *Bos.* Verum est; sed hoc ipsum illi ostendendum est, qua ratione sit quod putat impossibile. *Ans.*
- 9 An non intelligis ex his quae supra diximus, quia necesse est aliquos homines ad beatitudinem pervenire? Nam si Deo est inconveniens hominem cum aliqua macula perducere ad hoc, ad quod illum sine omni macula fecit, ne aut boni incepti poenitere aut propositum implere non posse videatur; multo magis propter eandem inconvenientiam impossibile est nullum hominem

ad hoc provehi, ad quod factus est. Quapropter aut 10
 extra fidem christianam invenienda est peccati satis-
 factio, qualem supra esse debere ostendimus, quod nulla
 ratio potest ostendere, aut indubitanter in illa esse
 credenda est. Quod enim necessaria ratione veraciter 11
 esse colligitur, id in nullam debet deduci dubietatem,
 etiamsi ratio quomodo sit non percipitur. *Bos.* Verum
 est quod dicis. *Ans.* Quid ergo quaeris amplius? *Bos.* 12
 Non ad hoc veni, ut auferas mihi fidei dubitationem,
 sed ut ostendas mihi certitudinis meae rationem¹⁾; qua-
 propter sicut me rationabiliter deduxisti ad hoc, ut
 videam hominem peccatorem hoc debere Deo pro
 peccato, quod et reddere nequit et nisi reddiderit salvari
 non valet: ita volo me perducas illuc, ut rationabili
 necessitate intelligam esse oportere omnia illa, quae
 nobis fides catholica de Christo credere praecipit, si
 volumus salvari, et quid valeant ad salutem hominis,
 et qualiter Deus misericordia salvet hominem, cum non
 dimittat illi peccatum, nisi reddiderit quod propter illud
 debet; et ut certiores sint argumentationes tuae, sic a
 longe incipe, ut eas supra firmum fundamentum con-
 stituas. *Ans.* Adiuvet me nunc Deus, quia tu nullate- 13
 nus mihi parcis nec consideras imbecillitatem scientiae
 meae, cui tam magnum opus iniungis. Tentabo tamen,
 quandoquidem incepti, non in me sed in Deo confidens,
 et faciam quod ipso adiuvante potero. Sed ne fa- 14
 stidium haec volenti legere nimis longa continuatione
 generetur, a dictis dicenda alio exordio distinguamus.

1) Cfr. c. 1, 2: „Quod petunt, non ut per rationem
 ad fidem accedant, sed ut eorum quae credunt intel-
 lecta et contemplatione delectentur.“

S. ANSELMI CANTUARIENSIS

LIBER SECUNDUS

CUR DEUS HOMO.

- 1 **1.** *Anselmus.* Rationalem naturam a Deo factam esse iustam, ut illo fruendo beata esset, dubitari non debet. Ideo namque rationalis est, ut discernat inter iustum et iniustum, inter bonum et malum, inter maius bonum et minus bonum; alioquin frustra facta esset
- 2 rationalis. Sed Deus non fecit eam rationalem frustra. Quare ad hoc eam factam esse rationalem dubium non est. Simili ratione probatur, quia ad hoc accepit potestatem discernendi ut odisset et vitaret malum ac amaret et eligeret bonum, atque maius bonum magis
- 3 diligeret et eligeret. Aliter namque frustra illi Deus dedisset potestatem illam discernendi, quia in vanum discerneret, si secundum discretionem non amaret et vitaret. Sed non convenit, ut Deus tantam potestatem
- 4 frustra dederit. Ad hoc itaque factam esse rationalem naturam certum est, ut summum bonum super omnia amaret et eligeret, non propter aliud sed propter ipsum; si enim propter aliud, non ipsum sed aliud

amat.¹⁾ At hoc nisi iusta facere nequit. Ut igitur frustra 5
 non sit rationalis, simul ad hoc rationalis et iusta facta
 est. Quod si ad summum bonum eligendum et amandum
 iusta facta est, aut talis ad hoc facta est, ut aliquando
 assequeretur quod amaret et eligeret, aut non. Sed si 6
 non ad hoc iusta est facta, ut quod sic amat et eligit
 assequatur, frustra facta est talis, ut sic illud amet et
 eligat; nec ulla ratio erit, cur illud assequi debeat ali-
 quando. Quamdiu ergo amando et eligendo summum 7
 bonum iusta faciet, ad quod facta est, misera erit, quia
 indigens erit contra voluntatem, non habendo quod de-
 siderat; quod nimis absurdum est. Quapropter ratio- 8
 nalis natura iusta est facta, ut summo bono i. e. Deo
 fruendo beata esset; homo ergo qui rationalis na-
 tura est, factus est iustus ad hoc, ut Deo fruendo bea-
 tus esset.

2. *Ans.* Quod autem talis factus sit, ut necessi- 1
 tate non moreretur, hinc facile probatur, quia, ut iam
 diximus,²⁾ sapientiae et iustitiae Dei repugnat, ut co-
 geret hominem mortem pati sine culpa, quem iustum
 fecit ad aeternam beatitudinem. Sequitur ergo, quia 2
 si nunquam peccasset nunquam moreretur.

1) Cfr. *Monologium* c. 68: „Satis patenter videtur
 omne rationale ad hoc existere, ut sicut ratione dis-
 cretionis aliquid maius vel minus bonum sive non bo-
 num iudicat, ita magis aut minus id amet aut respuat.
 Nihil igitur apertius quam rationalem creaturam ad hoc
 esse factam, ut summam essentiam amet super omnia
 bona, sicut ipsa est summum bonum; imo ut nihil amet
 nisi illam aut propter illam; quia illa est bona per se,
 et nihil aliud est bonum nisi per illam.“

2) Vide Lib. I. c. 9, 8.

- 1 **3.** *Ans.* Unde aperte quandoque futura mortuorum resurrectio probatur. Quippe si homo perfecte restaurandus est, talis debet restitui, qualis futurus erat,
 2 si non peccasset. *Bos.* Aliter esse non potest. *Ans.* Quemadmodum igitur si non peccasset homo, cum eodem quod gerebat corpore in incorruptibilitatem transmutandus erat, ita oportet, ut cum restaurabitur, cum suo
 3 in quo vivit in hac vita corpore restauretur. *Bos.* Quid respondebimus, si quis dicat, quia hoc fieri oportet de illis in quibus humanum genus restaurabitur, de
 4 reprobis vero non est necesse? *Ans.* Nihil iustius aut convenientius intelligitur, quam ut, sicut homo si perseverasset in iustitia, totus i. e. anima et corpore aeternae beatus esset; ita si perseverat in iniustitia, totus similiter aeternae miser sit. *Bos.* Breviter mihi de his satisfacisti.

- 1 **4.** *Ans.* Ex his est facile cognoscere, quoniam aut hoc de humana natura perficiet Deus quod incepit, aut in vanum fecit tam sublimem naturam ad tantum
 2 bonum. At si nihil pretiosius agnoscitur Deus fecisse quam rationalem naturam ad gaudendum de se, valde alienum est ab eo, ut ullam rationalem naturam penitus perire sinat. *Bos.* Non potest aliter putare cor rationale.
 3 *Ans.* Necesse est ergo, ut de humana natura perficiat quod incepit; hoc autem fieri, sicut diximus, nequit nisi per integram peccati satisfactionem, quam
 4 nullus peccator facere potest. *Bos.* Intelligo iam necesse esse, ut Deus perficiat quod incepit, ne aliter quam deceat a suo incepto videatur deficere.

- 1 **5.** *Bos.* Sed si ita est, videtur quasi cogi Deus necessitate vitandi indecentiam, ut salutem procuret
 2 humanum. Quomodo ergo negari poterit, plus hoc

propter se facere quam propter nos? At si ita est, quam gratiam illi debemus pro eo quod facit propter se? Quomodo etiam nostram imputabimus salutem eius gratiae, si nos salvat necessitate? *Ans.* Est necessitas 3 quae beneficienti gratiam aufert aut minuit, et est necessitas qua maior beneficio gratia debetur. Cum enim aliquis ea necessitate cui subiacet invitus, benefacit, aut nulla aut minor illa gratia debetur. Cum vero ipse 4 se sponte necessitati beneficienti subdit nec invitus eam sustinet, tunc utique beneficii gratiam meretur maiorem. Non enim haec est dicenda necessitas sed gratia, quia nullo cogente illam suscepit aut servat sed gratis. Nam 5 si quod hodie sponte promittis te cras daturum, eadem cras voluntate das; quamvis necesse sit te cras reddere promissum si potes, aut mentiri, non tamen minus tibi debet ille pro impenso beneficio cui das, quam si non promisisses, quoniam te debitorem ante tempus dationis illi facere non es coactus. Tale est, cum quis sanctae 6 conversationis sponte vovet propositum. Quamvis namque servare illud ex necessitate post votum debeat, ne apostatae damnationem incurrat, et licet cogi possit servare si nolit, si tamen non invitus servat quod vovit, non minus sed magis gratus est Deo, quam si non vovisset; quoniam non solum communem vitam sed etiam eius licentiam sibi propter Deum abnegavit; nec sancte vivere dicendus est necessitate, sed eadem qua vovit libertate. Quare multo magis si Deus facit bonum homini 7 quod incepit, licet non deceat eum a bono incepto deficere, totum gratiae debemus imputare, quia hoc propter nos non propter se nullius egens incepit. 8 Non enim illum latuit, quid homo facturum erat cum illum fecit, et tamen bonitate sua illum creando sponte se, ut perficeret inceptum bonum, quasi obligavit. Denique Deus nihil facit necessitate, 9 quia nullo modo cogitur aut prohibetur aliquid

- 10 facere.¹⁾ Et cum dicimus Deum aliquid facere quasi necessitate vitandi inhonestatem quam utique non timet, potius intelligendum est, quia hoc facit necessitate servandae honestatis, quae scilicet necessitas non est aliud quam immutabilitas honestatis eius, quam a se ipso et non ab alio habet; et idcirco improprie dicitur necessitas. Dicamus tamen, quia necesse est, ut bonitas Dei propter immutabilitatem suam perficiat de homine quod incepit, quamvis totum sit gratia bonum quod facit. *Bos.* Concedo.

- 1 **6.** *Ans.* Hoc autem fieri nequit, nisi sit qui solvat Deo pro peccato hominis aliquid maius, quam omne
2 quod praeter Deum est. *Bos.* Ita constat. *Ans.* Illum quoque, qui de suo poterit Deo dare aliquid, quod superet omne quod sub Deo est, maiorem esse necesse est, quam omne quod non est Deus. *Bos.* Nequeo negare. *Ans.* Nihil autem est supra omne quod Deus
3 non est, nisi Deus. *Bos.* Verum est. *Ans.* Non ergo potest hanc satisfactionem facere nisi Deus. *Bos.* Sic sequitur. *Ans.* Sed nec facere illam debet nisi homo, alioquin non satisfacit homo. *Bos.* Non videtur aliquid
4 iustius. *Ans.* Si ergo, sicut constat, necesse est ut de hominibus perficiatur illa superna civitas, nec hoc esse valet nisi fiat praedicta satisfactio, quam nec potest facere nisi Deus nec debet nisi homo; necesse est, ut
5 eam faciat Deus homo. *Bos.* Benedictus Deus! iam magnum quiddam invenimus de hoc quod quaerimus; prosequere igitur, ut incepisti. Spero enim, quia Deus nos adiuvabit.

1) Cfr. S. Anselmi Liber *Meditationum*. rec. A. *Buse.* Colon. 1851. XI., 135: „Omnis necessitas et impossibilitas eius subiacet voluntati. Quippe quod vult, necesse est esse; et quod non vult, impossibile est esse.“

7. *Ans.* Investigandum est¹⁾ nunc, quomodo 1
 possit fieri Deus homo. Divina enim natura et humana
 non possunt in invicem mutari, ut divina fiat humana
 vel humana divina; nec ita misceri, ut quaedam tertia
 sit ex duabus, quae nec divina sit omnino nec humana.
 Denique si fieri posset, ut altera in alteram converte- 2
 retur, aut esset tantum Deus et non homo aut solum
 homo et non Deus. Aut si miscerentur ita, ut ex dua-
 bus corruptis fieret quaedam tertia, (quemadmodum de
 duobus individuis animalibus diversarum specierum mas-
 culo et femina nascitur tertium, quod nec patris inte-
 gram nec matris servat naturam, sed ex utraque tertiam
 mixtam) nec homo esset nec Deus. Non igitur potest 3
 fieri homo Deus, quem quaerimus ex divina et humana
 natura, aut conversione alterius in alteram aut corrup-
 tiva commixtione utriusque in tertiam; quia haec fieri
 nequeunt, aut si fieri valerent, nihil ad hoc quod quae-
 rimus valerent. Si autem quolibet modo ita coniungi 4
 dicuntur hae duae naturae integrae, ut tamen alius sit
 homo alius sit Deus, et non idem sit Deus qui et homo,
 impossibile est, ut ambo faciant quod fieri necesse est.
 Nam Deus non faciet quia non debebit, et homo non 5
 faciet quia non poterit; ut ergo hoc faciat Deus homo,
 necesse est eundem ipsum esse perfectum Deum et per-
 fectum hominem, qui hanc satisfactionem facturum est;
 quoniam eam facere non potest nisi verus Deus, nec
 debet nisi verus homo. Quoniam ergo servata integri- 6
 tate utriusque naturae necesse est inveniri Deum homi-
 nem, non minus necesse est has duas naturas integras
 convenire in unam personam, quemadmodum corpus et
 anima rationalis conveniunt in unum hominem;²⁾

1) In omn. Codd. hic incipit c. 7.

2) Cfr. *Symbolum Quicumque s. Athanasianum* 27 sq.

quoniam aliter fieri nequit, ut idem ipse sit perfectus Deus et perfectus homo. *Bos.* Totum mihi placet, quod dicis.

- 1 8. *Ans.* Restat nunc quaerere, unde et quomodo
 assumet Deus humanam naturam. Aut enim assumet
 eam de Adam aut faciet novum hominem, quemadmo-
 2 dum fecit Adam de nullo alio homine. Sed si novum
 hominem facit non ex Adae genere, non pertinebit ad
 genus humanum quod natum est de Adam; quare non
 3 debet satisfacere pro eo, quia non erit de eo. Sicut
 enim rectum est, ut pro culpa hominis homo satisfaciat,
 ita necesse est, ut satisfaciens idem sit qui peccator,
 aut eiusdem generis; aliter namque nec Adam nec ge-
 4 nus eius satisfaciet¹⁾ pro se. Ergo sicut de Adam et
 Eva peccatum in omnes homines propagatum est, ita
 nullus, nisi vel ipsi vel qui de illis nascitur, pro peccato
 hominum satisfacere debet. Quoniam ergo illi nequeunt,
 5 necesse est ut de illis sit, qui hoc faciet. Amplius:
 sicut Adam et totum genus eius per se stetisset sine
 sustentatione alterius creaturae si non peccasset, ita
 oportet, ut si idem genus resurgit post casum, per se
 6 resurgat et relevetur. Nam per quemcunque in statum
 restituatur, per illum utique stabit, per quem statum
 7 suum recuperabit. Deus etiam quando humanam natu-
 ram primitus fecit in solo Adam nec feminam, ut de
 utroque sexu multiplicarentur homines, facere voluit
 nisi de ipso, aperte monstravit, se non nisi de Adam
 voluisse facere, quod de humana natura facturus erat.
 8 Quapropter si genus Adae per aliquem relevatur ho-
 minem, qui non sit de eodem genere, non in illam dig-
 nitatem, quam habiturum erat si non peccasset Adam,
 et ideo non integre restaurabitur, et Dei propositum
 deficere videbitur, quae duo inconvenientia sunt; ergo

1) *satisfaceret* A a b c.

necesse est, ut de Adam assumatur homo, per quem restauretur genus Adae. *Bos.* Si rationem sequimur, sicut proposuimus, hoc inevitabiliter oportet esse. *Ans.* 10 Investigemus nunc, utrum assumenda sit a Deo natura hominis de patre et de matre, sicut alii sunt homines, aut de viro sine femina, aut de femina sine viro. Nam 11 quocunque modo ex his tribus modis sit, de Adam et de Eva erit, de quibus est omnis homo utriusque sexus, nec aliquis modus ex tribus his facilius est Deo quam alii, ut eo modo potius debeat assumi. *Bos.* Bene procedis. *Ans.* Verum non est opus multo labore, ut 12 ostendatur, quia mundius et honestius procreabitur homo ille de solo viro vel femina quam de commixtione utriusque, sicut omnes alii filii hominum. *Bos.* Sufficit. *Ans.* Aut ergo de solo viro aut de sola femina assu- 13 mendus est. *Bos.* Aliunde non potest. *Ans.* Quatuor 14 modis potest Deus facere hominem; videlicet aut de viro et de femina, sicut assiduus usus monstrat; aut nec de viro nec de femina, sicut creavit Adam; aut de viro sine femina, sicut fecit Evam; aut de femina 15 sine viro, quod nondum fecit. Ut igitur hunc quoque modum probet suae subiacere potestati et ad hoc ipsum opus dilatatum esse, nihil convenientius quam ut de femina sine viro assumat illum hominem, quem quaerimus. Utrum autem de Virgine aut de non Virgine 16 dignius hoc fiat, non est opus disputare, sed sine omni dubitatione asserendum est, quia de Virgine¹⁾ Deum hominem nasci oportet. *Bos.* Secundum placitum cordis mei loqueris. *Ans.* Estne solidum hoc quod dixi- 17 mus, aut vanum aliquid sicut nubes, quod dixisti²⁾ nobis infideles obiicere? *Bos.* Nihil solidius. *Ans.* Pinget 18 igitur non super fictam vanitatem sed super solidam

1) Cfr. infra c. 16 a.

2) Cfr. Lib. I. c. 4.

veritatem, et dic, quia valde convenit, ut quemadmodum hominis peccatum et causa nostrae damnationis initium sumpsit a femina, ita medicina peccati et causa nostrae salvationis nascatur de femina; ac ne mulieres desperent se pertinere ad sortem beatorum, quoniam de femina tantum malum processit, oportet, ut ad reformandam spem earum de muliere tantum bonum pro-

19 cedat. Pinge et hoc. Si virgo erat quae causa fuit humano generi totius mali, multo magis decet, ut virgo sit quae causa erit totius boni. Hoc quoque pinge. Si mulier, quam fecit Deus de viro sine femina, facta est de virgine, convenit valde, ut vir quoque, qui fiet

20 de femina, sine viro fiat de Virgine. Sed de picturis quae possunt pingi super hoc, quia Deus homo de Virgine muliere nasci debet, ista nunc sufficiant. *Bos.* Valde pulchrae et rationabiles sunt istae picturae.

- 1 **9.** *Ans.* Nunc quoque quaerendum est, in qua persona Deus, qui est tres personae, hominem assumat. Plures enim personae nequeunt unum eundemque hominem assumere in unitatem personae. Quare in una
- 2 persona tantum hoc fieri necesse est. Sed de hac unitate personae Dei et hominis et in qua persona Dei hoc magis fieri oporteat, in epistola de incarnatione Verbi ad Dominum Papam Urbanum directa,¹⁾ quantum ad praesentem investigationem sufficere puto, locu-
- 3 tus sum. *Bos.* Breviter tamen hic tange, cur potius persona Filii debeat incarnari quam Patris aut Spiritus

1) Inchoatam hanc a. 1092 Epistolam ac per aestatem sequentis anni absolutam S. Anselmi Operum editioni Maurinae Parisiis 1721 repetitae invenies insertam fol. 41 sq. s. h. t.: *Liber de fide Trinitatis et de incarnatione Verbi contra blasphemias Ruzelini sive Roscelini.*

sancti? *Ans.* Si quaelibet alia persona incarnetur, erunt 4
 duo filii in Trinitate, filius scilicet Dei qui et ante in-
 carnationem filius est, et ille qui per incarnationem fi-
 lius erit virginis; et erit in personis, quae semper
 aequales esse debent, inaequalitas secundum dignitatem
 nativitatum. Digniore namque nativitatem habebit 5
 natus ex Deo, quam natus ex Virgine. Item si Pater
 fuerit incarnatus, erunt duo nepotes in Trinitate, quia
 Pater erit nepos parentum Virginis per hominem assum-
 tum, et Verbum cum nihil habeat de homine, nepos ta-
 men erit Virginis, quia filii eius erit filius; quae omnia
 inconvenientia sunt nec in incarnatione Verbi con-
 tingunt. Est et aliud, cur magis conveniat incarnari 6
 Filio quam aliis personis: quia convenientius sonat fi-
 lium supplicare patri, quam aliam personam alii. Item 7
 homo pro quo erat oraturus, diabolus quem erat expugna-
 turus, ambo falsam similitudinem Dei per propriam vo-
 luntatem praesumserant. Unde quasi specialius adver- 8
 sus personam Filii peccaverunt, qui vera Patris simili-
 tudo creditur. Illi itaque, cui specialius fit iniuria, con-
 venientius attribuitur culpae vindicta aut indulgentia.
 Quapropter cum ratio nos inevitabilis perduxerit ad hoc, 9
 ut necesse sit divinam et humanam naturam in unam
 convenire personam, nec hoc fieri possit in pluribus
 personis Dei, et hoc convenientius fieri pateat in per-
 sona Verbi quam in aliis; necesse est Verbum Deum
 et hominem in unam convenire personam. *Bos.* Sic 10
 est via, qua me ducis, undique munita ratione, ut ne-
 que ad dexteram neque ad sinistram videam me ab illa
 posse declinare. *Ans.* Non ego te duco sed ille, de
 quo loquimur, sine quo nihil possumus, nos ducit ubi-
 cunque viam veritatis tenemus.

10. *Ans.* Utrum autem homo ille sit moriturus 1
 ex debito, sicut omnes alii homines ex debito moriun-

tur, non investigare debemus; sed si Adam moriturus non erat, si non peccasset, multo magis iste mortem pati non debet, in quo peccatum esse non poterit, quia
 2 Deus erit. *Bos.* In hoc volo te aliquantulum morari; sive enim dicatur posse sive non posse peccare, in utro-
 3 que mihi non parva nascitur quaestio. Nam si non posse peccare dicitur, difficile credi debere videtur; ut enim aliquantulum loquar non quasi de illo, qui nunquam fuerit, sicut hactenus fecimus, sed velut de eo, quem et cuius facta novimus: quis neget illum multa
 4 potuisse facere, quae peccata dicimus? Quippe ut alia taceam, quomodo dicemus eum non potuisse mentiri, quod semper peccatum est? Cum enim dicat Iudaeis de Patre: *si dixero, quia non scio eum, ero similis vobis mendax,*¹⁾ et inter haec verba dicat: *non scio eum;* quis eum dicat easdem tres nequivisse proferre dictiones, sive aliis verbis, ut sic diceret, *non scio eum?*
 5 Quod si faceret, ut ipse ait, esset mendax, quod est esse peccatorem. Quare quoniam hoc potuit, peccare potuit. *Ans.* Et hoc dicere potuit et peccare non potuit. *Bos.* Hoc ostende. *Ans.* Omnis potestas sequitur voluntatem. Cum enim dico quia possum loqui vel ambulare, subauditur, si volo. Si enim non subintelligitur
 6 voluntas, non est potestas sed necessitas. Nam cum dico quia nolens possum trahi aut vinci, non est haec mea potestas sed necessitas et potestas alterius. Quippe non est aliud, possum trahi vel vinci, quam alius me
 7 trahere vel vincere potest. Possumus itaque dicere de Christo quia potuit mentiri, si subaudiatur, si vellet; et quoniam mentiri non potuit nolens nec potuit velle
 8 mentiri, non minus dici potest nequivisse mentiri. Sic
 9 itaque potuit et non potuit mentiri.²⁾ *Bos.* Nunc re-

1) Ioann. 8, 55.

2) Cfr. Dialog. *de Casu Diaboli* c. 12: „Multa di-

deamus ad investigandum de illo, quasi nondum sit, sicut incepimus. Dico igitur, si peccare non poterit, quia sicut dicis non poterit velle, ex necessitate servabit iustitiam, quare non ex libertate arbitrii iustus erit. Quae igitur gratia illi pro iustitia sua debebitur? So-
 10
 lemus namque dicere, Deum idcirco fecisse angelum et hominem tales, qui peccare possent; quatenus cum possent deserere iustitiam et ex libertate arbitrii servarent, gratiam et laudem mererentur, quae illis si necessitate iusti essent non deberentur. *Ans.* Nonne angeli, qui
 11
 modo peccare nequeunt, laudandi sunt? *Bos.* Sunt utique, quia hoc quod modo non possunt meruerunt per hoc, quod potuerunt et noluerunt. *Ans.* Quid dicis de
 12
 Deo, qui peccare non potest nec hoc meruit per potestatem peccandi, qua non peccavit; nonne laudandus est pro iustitia sua? *Bos.* Hic volo, ut respondeas pro
 13
 me; nam si dico eum non esse laudandum, scio me mentiri; si autem dico laudandum, timeo infirmare rationem quam dixi de angelis. *Ans.* Angeli non sunt
 14
 laudandi de iustitia sua, quia peccare potuerunt, sed quia per hoc quodammodo a se habent quod peccare nequeunt; in quo aliquatenus similes sunt Deo, qui a se habet quidquid habet. Dicitur enim dare aliquid,
 15
 qui non aufert quando potest; et facere esse aliquid, qui cum possit id ipsum facere non esse, non facit. Sic itaque cum angelus potuit auferre sibi iustitiam et non abstulit, et facere se non esse iustum et non fecit; recte asseritur ipse sibi dedisse iustitiam, et seipsum iustum fecisse. Hoc igitur modo habet a se iustitiam,
 16
 (quia creatura eam aliter a se habere nequit,) et idcirco laudandus est de sua iustitia, nec necessitate sed libertate iustus est; quia improprie dicitur necessitas,

cuntur posse, non sua sed aliena potestate; et multa non posse, non sua sed aliena impotentia.“

- 17 ubi nec coactio ulla est nec prohibitio. Quapropter
 quoniam Deus perfecte habet a se quidquid habet, ille
 maxime laudandus est de bonis, quae habet et servat
 non ulla necessitate, sed, sicut supra¹⁾ dixi, propria
 18 et aeterna immutabilitate. Sic ergo homo ille qui idem
 ipse Deus erit, quoniam omne bonum quod ipse habe-
 bit a se habebit, non necessitate sed libertate et a se
 19 ipso iustus et idcirco laudandus erit. Quamvis enim
 humana natura a divina habeat quod habebit, idem ta-
 men ipse a seipso (quoniam duae naturae una persona
 20 erunt) habebit. *Bos.* Satisfecisti mihi ex hoc; et aperte
 video, quia et peccare non poterit et tamen laudandus
 21 erit de iustitia sua. Sed nunc quaerendum aestimo,
 eum Deus talem posset facere hominem, cur non tales
 fecit angelos et duos primos homines, ut similiter et
 peccare non possent et de iustitia sua laudandi essent.
 22 *Ans.* Intelligis, quae dicis? *Bos.* Videor mihi intelli-
 23 gere et idcirco quaero, cur eos tales non fecit? *Ans.*
 Quoniam nec potuit nec debuit fieri, ut unusquisque
 eorum esset idem ipse qui Deus, sicut de homine isto
 dicimus; et si quaeris, cur non de tot quot sunt per-
 sonae Dei, vel saltem de uno hoc fecit, respondeo: quia
 ratio tunc fieri nullatenus hoc exigebat, sed omnino
 24 (quia Deus nihil sine ratione facit) prohibebat. *Bos.*
 Erubesco quia hoc quaesivi; dic quae dicturus eras.
Ans. Dicamus ergo, quia mori non debet, quoniam
 non erit peccator. *Bos.* Concedere me oportet.

- 1 **11.** *Ans.* Nunc autem restat indagare, utrum
 possit mori secundum humanam naturam; nam secun-
 2 dum divinam incorruptibilis semper erit. *Bos.* De hoc
 cur dubitare debemus, cum ipse verus homo futurus sit

1) c. 5, 11.

et omnis homo naturaliter mortalis sit? *Ans.* Non puto 3
 mortalitatem ad puram sed ad corruptam hominis natu-
 ram pertinere. Quippe si nunquam peccasset homo et 4
 immortalitas ipsius immutabiliter firmata esset, non ta-
 men minus homo esset verus; et quando mortales in
 incorruptibilitate resurgent, non minus erunt veri ho-
 mines; nam si pertineret ad veritatem humanae natu-
 rae mortalitas, nequaquam posset esse homo, qui esset
 immortalis; non ergo pertinet ad sinceritatem humanae
 naturae corruptibilitas sive incorruptibilitas, quoniam
 neutra facit aut destruit hominem, sed altera valet ad
 eius miseriam, altera ad beatitudinem. Sed quoniam 5
 nullus homo est qui non moriatur, idcirco mortale po-
 nitur in hominis definitione a philosophis,¹⁾ qui non
 crediderunt totum hominem aliquando potuisse aut posse
 esse immortalem. Quare non sufficit ad demonst- 6
 randum illum hominem debere mortalem esse, hoc, quia
 verus homo erit. *Bos.* Quaere ergo tu aliam rationem, 7
 quia ego illam nescio si tu nescis, qua ille probetur
 posse mori. *Ans.* Dubium non est, quia sicut Deus
 erit, ita omnipotens erit. *Bos.* Verum est. *Ans.* Si
 ergo volet, poterit animam suam ponere et iterum su-
 mere. *Bos.* Si hoc non potest, non videtur quod sit
 omnipotens. *Ans.* Poterit igitur nunquam mori si vo- 8
 let, et poterit mori et resurgere. Sive autem animam
 suam ponat nullo alio faciente, sive alius hoc faciat, ut
 eam ponat ipso permittente: quantum ad potestatem
 nihil differt. *Bos.* Non est dubium. *Ans.* Si igitur vo- 9
 luerit permittere, poterit occidi; et si noluerit, non po-
 terit. *Bos.* Ad hoc nos indeclinabiliter perducit ratio.
Ans. Ratio quoque nos docuit, quia oportet eum maius 10
 aliquid habere quam quidquid sub Deo est, quod sponte

1) Cfr. *Aristotelis Analytica Priora* 1, 31. all.

- 11 det et non ex debito Deo.¹⁾ *Bos.* Ita est. *Ans.* Hoc autem nec sub illo nec extra illum inveniri potest.
- 12 *Bos.* Verum est. *Ans.* In ipso igitur inveniendum est. *Bos.* Sic sequitur. *Ans.* Aut igitur seipsum aut aliquid
- 13 de se dabit. *Bos.* Non possum aliter intelligere. *Ans.* Quaerendum est nunc, cuiusmodi haec datio debebit esse. Dare namque se non poterit Deo aut aliquid de se quasi non habenti, ut suus sit; quoniam omnis creatura Dei est. *Bos.* Sic est. *Ans.* Sic ergo intelligenda est haec datio, quia aliquo modo ponet se ad honorem Dei aut aliquid de se, quo modo debitor non erit. *Bos.*
- 15 Ita sequitur ex supra dictis. *Ans.* Si dicimus, quia dabit seipsum ad obediendum Deo, ut perseveranter servando iustitiam subdat se eius voluntati; non erit hoc dare, quod Deus ab illo non exigat ex debito. Omnis enim rationalis creatura debet hanc obedientiam Deo.
- 16 *Bos.* Hoc negari nequit. *Ans.* Alio itaque modo oportet ut det se ipsum Deo aut aliquid de se. *Bos.* Ad
- 17 hoc nos impellit ratio. *Ans.* Videamus, si forte hoc sit vitam suam dare sive ponere animam suam sive tradere seipsum morti ad honorem Dei. Hoc enim ex debito Deus non exiget ab illo; quoniam namque non erit
- 18 peccatum in illo, non debebit mori, ut diximus. *Bos.* Aliter nequeo intelligere. *Ans.* Consideremus adhuc, utrum sic rationabiliter conveniat. *Bos.* Dic tu; et ego
- 19 libenter audiam. *Ans.* Si homo per suavitatem peccavit, annon convenit, ut per asperitatem satisfaciat? Et si tam facile victus est a diabolo, ut Deum peccando exhonoreret, ut facilius non posset; nonne iustum est, ut homo satisfaciens Deo pro peccato tanta difficultate vincat diabolum ad honorem Dei, ut maiori non possit?
- 20 Annon est dignum, quatenus qui se sic abstulit Deo peccando, ut se plus auferre non posset, sic se det Deo

1) Cfr. supra c. 6.

satisfaciendo, ut magis se non possit dare? *Bos.* Non est aliquid rationabilius. *Ans.* Nihil autem asperius aut 21 difficilius potest homo ad honorem Dei sponte et non ex debito pati quam mortem, et nullatenus seipsum potest homo magis dare Deo, quam cum se morti tradit ad honorem illius. *Bos.* Vera sunt omnia haec. *Ans.* 22 Talem ergo oportet eum esse, qui pro peccato hominis satisfacere volet, ut mori possit si velit. *Bos.* Video 23 hominem illum plane, quem quaerimus, talem esse oportere, qui nec ex necessitate moriatur, quoniam erit omnipotens; nec ex debito, quia nunquam peccator erit; et mori possit ex libera voluntate, quia necessarium erit. *Ans.* Sunt et alia multa, cur eum valde conve- 24 niat hominum similitudinem et conversationem absque peccato habere, quae facilius et clarius per se patent in eius vita et operibus, quam velut ante experimentum sola ratione monstrari possint. Quis enim explicet, 25 quam necessarie, quam sapienter factum sit,¹⁾ ut ille qui homines erat redempturus et de via mortis et perditionis ad viam vitae et beatitudinis aeternae docendo reducturus, cum hominibus conversaretur et in ipsa conversatione, cum eos doceret verbo qualiter vivere deberent, seipsum exemplum praeberet? Exemplum autem 26 seipsum quomodo daret infirmis et mortalibus, ut propter iniurias aut contumelias aut dolores aut mortem a iustitia non recederent, si ipsum haec omnia sentire non agnoscerent?

12. *Bos.* Omnia haec patenter ostendunt eum 1 mortalem et incommodorum nostrorum participem esse oportere. Sed haec omnia miseriae nostrae sunt; numquid ergo miser erit? *Ans.* Nequaquam; nam sicut ad 2

1) *factum est* A a b c B D.

beatitudinem non pertinet commodum quod habet quis contra voluntatem, ita non est miseria apprehendere sapienter nulla necessitate aliquod incommodum secundum voluntatem. *Bos.* Concedendum est.

- 1 **13.** *Bos.* Verum in hac similitudine quam habere
 debet cum hominibus, dic, utrum ignorantiam quoque
 2 sicut alias infirmitates nostras habiturus sit? *Ans.* Quid
 dubitas de Deo, utrum sit omnia sciens? *Bos.* Quia
 quamvis sit immortalis futurus ex divina natura, mor-
 talis tamen erit ex humana. Nam cur non similiter po-
 terit illis homo esse vere ignorans, sicut vere mortalis
 3 erit? *Ans.* Illa hominis assumptio in unitatem personae
 Dei non nisi sapienter a summa sapientia fiet; et ideo
 non assumet in homine, quod nullo modo utile sed
 valde noxium est ad opus, quod idem homo facturus
 4 est. Ignorantia namque ad nihilum illi utilis esset sed
 ad multa noxia; quomodo enim tot et tanta opera quae
 facturus est, faciet sine summa sapientia? aut quomodo
 5 illi homines credent, si eum scient nescium? Si autem
 nescient, ad quid erit ei utilis ignorantia illa? Deinde
 si nihil amatur nisi quod cognoscitur; sicut nihil erit
 boni quod non amet, ita nullum bonum erit quod igno-
 6 ret. Bonum autem nemo perfecte novit nisi qui illud
 a malo scit discernere; hanc quoque discretionem nul-
 7 lus scit facere, qui malum ignorat. Sicut igitur ille
 de quo loquimur, omne perfecte sciet bonum, ita nul-
 lum ignorabit malum. Omnem igitur habebit scientiam,
 quamvis eam publice in hominum conversatione non
 8 ostendat. *Bos.* Hoc in maiori aetate ita videtur, sicut
 dicis; sed in infantia, sicut non erit tempus congruum
 ut in illo appareat sapientia, ita non erit opus et ideo
 9 nec congruum ut illam habeat. *Ans.* Nonne dixi, quia
 sapienter fiet illa incarnatio? Sapienter namque assu-
 met Deus mortalitatem, qua sapienter, quia valde utili-

ter, utetur. Ignorantiam vero non poterit assumere sapienter, quia nunquam est utilis sed semper noxia, nisi forte cum per eam mala voluntas quae nunquam in illo erit, ab effectu restringitur. Nam etsi aliquando ad aliud non nocet, hoc solo tamen nocet, quia scientiae bonum aufert; et ut breviter absolvam quod quaeris: ex quo homo ille erit, plenus Deo semper ut seipso erit; unde nunquam erit sine eius potentia et fortitudine et sapientia. *Bos.* Quamvis hoc in Christo fuisse semper non dubitarem, ideo tamen quaesivi, ut de hoc quoque rationem audirem. Saepe namque aliquid esse certi sumus et tamen hoc ratione probare nescimus.

14. *Bos.* Nunc rogo ut doceas me, quomodo mors eius praevaleat numero et magnitudini peccatorum omnium, cum unum (quod putamus levissimum) peccatum tam infinitum monstres, ut si numerus obtendatur infinitus mundorum, qui sic pleni sint creaturis sicut iste est, nec possint servari quin redigantur in nihilum, nisi faciat aliquis aspectum unum contra voluntatem Dei, non tamen fieri debeat.¹⁾ *Ans.* Si praesens esset homo ille et quis esset scires, et diceretur tibi: nisi occideris hominem illum, peribit mundus iste totus et quidquid Deus non est; faceres hoc pro conservanda omni alia creatura? *Bos.* Non facerem, etiamsi mihi infinitus numerus mundorum obtenderetur. *Ans.* Quid si iterum tibi diceretur: aut eum occidas aut omnia peccata mundi venient super te? *Bos.* Responderem me potius alia omnia peccata velle suscipere, non solum huius mundi quae fuerunt et quae futura sunt, sed et quaecumque super haec cogitari possunt, quam istud solum. Quod non solum de occisione eius sed et de qualibet parva

1) Cfr. Lib. I. c. 21, 3 sq.

- laesione, quae illam tangeret, respondere me existimo
 6 debere. *Ans.* Recte existimas; sed dic mihi, cur ita
 cor tuum iudicat, ut plus horreat unum peccatum in
 laesione huius hominis quam alia omnia, quae cogitari
 possunt; cum omnia quaecunque fiunt peccata, contra
 7 illum sint? *Bos.* Quoniam peccatum quod in persona
 eius fit, incomparabiliter superat omnia illa, quae extra
 8 personam illius cogitari possunt. *Ans.* Quid dicis ad
 hoc, quia saepe libenter aliquis patitur quasdam in sua
 persona molestias, ne maiores patiatur in rebus suis?
 9 *Bos.* Quia Deus non eget hac patientia, cuius potestati
 omnia subiacent, sicut tu supra cuidam meae interroga-
 10 tioni respondisti.¹⁾ *Ans.* Bene respondes; videmus ergo,
 quia violationi vitae corporalis huius hominis nulla im-
 mensitas vel multitudo peccatorum extra personam Dei
 11 comparari valet. *Bos.* Apertissimum est. *Ans.* Quan-
 tum bonum tibi videtur, cuius interentio tam mala est?
Bos. Si esse eius tam bonum est quam mala est eius
 destructio, plus est bonum incomparabiliter quam sint
 ea peccata mala, quae sine aestimatione superat eius
 12 interentio. *Ans.* Verum dicis. Cogita etiam, quia pec-
 cata tantum sunt odibilia, quantum sunt mala; et vita
 ista tantum amabilis est, quantum est bona. Unde se-
 quitur, quia vita ista plus est amabilis quam sint pec-
 cata odibilia. *Bos.* Non possum hoc non intelligere.
 13 *Ans.* Putasne tantum bonum tam amabile posse sufficere
 ad solvendum quod debetur pro peccatis totius mundi?
 14 *Bos.* Imo plus potest in infinitum. *Ans.* Vides igitur,
 quomodo vita haec vincat omnia peccata, si pro illis
 detur. *Bos.* Aperte. *Ans.* Si ergo dare vitam est mor-
 tem accipere; sicut datio huius vitae praevallet omni-
 bus hominum peccatis, ita et acceptio mortis.

1) Vide Lib. I. c. 15; 21, 7 sq.

15. *Bos.* Ita esse de omnibus peccatis quae per- 1
sonam Dei non tangunt, constat. Sed nunc video aliud
quaerendum. Nam si tam malum est eum occidere,
quam bona est vita eius; quomodo potest mors eius su-
perare et delere peccata eorum, qui eum occiderunt?
Aut si alicuius eorum peccatum delet, quomodo non 2
potest aliorum quoque hominum aliquod delere? Cre-
dimus enim, quia et multi ex illis salvati sunt et innu-
merabiles alii non salvantur. *Ans.* Hanc quaestionem 3
solvit apostolus, qui dixit, quia *si cognovissent, nun-*
*quam Dominum gloriae crucifixissent.*¹⁾ Tantum nam- 4
que differunt scienter factum peccatum et quod per
ignorantiam fit, ut malum quod nunquam facere pos-
sent pro nimietate sua si cognosceretur, veniale sit, quia
ignoranter factum est. Deum enim occidere nullus 5
homo unquam scienter saltem velle posset; et ideo qui
illum occiderunt ignoranter,²⁾ non in illud infinitum
peccatum, cui nulla alia comparari possunt peccata, pro-
ruerunt. Nam non consideravimus eius magnitudinem 6
ad videndum, quam bona esset vita illa; secundum hoc
quod ignoranter factum est, sed quasi scienter fieret,
quod nec unquam fecit aliquis nec facere potuit. *Bos.* 7
Rationabiliter interemtores Christi ad veniam peccati
sui pertingere potuisse monstrasti. *Ans.* Quid iam quae- 8
ris amplius? Ecce iam vides, quomodo rationabilis ne-
cessitas ostendat ex hominibus perficiendam esse super-
nam civitatem, nec hoc posse fieri nisi per remissionem
peccatorum, quam homo nullus habere potest nisi per
hominem, qui idem ipse sit Deus atque sua morte ho-
mines peccatores Deo reconciliet. Aperte igitur inveni- 9

1) 1. Cor. 2, 8.

2) Πάτερ, ἄφες αὐτοῖς οὐ γὰρ οἶδαν τί ποιοῦσι
Luc. 23, 34. — Act. 3, 17: κατὰ ἄγνοσιν.

mus Christum, quem Deum et hominem confitemur, esse mortuum propter nos, hoc autem absque omni dubitatione¹⁾ cognito, cuncta quae ipse dicit certa esse, quoniam Deus mentiri nequit, et sapienter esse facta quae fecit dubitandum non est, quamvis eorum ratio
 10 non intelligatur a nobis. *Bos.* Verum est quod dicitis; nec aliquatenus quod dixit esse verum, aut quod fecit, rationabiliter esse factum, dubito. Sed hoc postulo, ut quod quasi non debere aut non posse fieri videtur infidelibus in fide christiana, hoc mihi qua ratione fieri debeat aut possit aperias; non ut me in fide confirmes, sed ut confirmatum veritatis ipsius intellectu laetifices.²⁾

1 **16 a.** *Bos.* Quapropter sicut eorum quae supra dicta sunt rationem aperuisti, sic peto, ut eorum quae
 2 sum adhuc quaesiturus rationem ostendas. Primum scilicet, qualiter de massa peccatrice, i. e. de humano genere quod totum infectum erat peccato, hominem sine peccato quasi azymum de fermentato Deus assum-
 3 sit. Nam licet ipsa hominis eiusdem conceptio sit munda et absque carnalis delectationis peccato, Virgo tamen ipsa unde assumtus est, est in iniquitatibus concepta et in peccatis concepit eam mater eius³⁾ et cum originali peccato nata est, quoniam et ipsa in Adam
 4 peccavit, in quo omnes peccaverunt.⁴⁾ *Ans.* Postquam constat hominem illum esse Deum et peccatorum reconciliatorem, dubium non est eum omnino sine peccato esse; hoc autem esse non valet, nisi absque pec-
 5 cato de massa peccatrice sit assumtus. Qua vero ra-

1) *dubitatione* A a — *ambiguitate* A c — *dubietate* A b C D E F.

2) Cfr. Lib. I. c. 1, 2; c. 25, 12.

3) Psalm. 50 [51], 7.

4) Cfr. Roman. 5, 12.

tione sapientia Dei hoc fecit si non possumus intelli-
 gere, non debemus mirari sed cum veneratione tolerare,
 aliquid esse in secretis tantae rei quod ignoremus. Quippe 6
 mirabilius Deus restauravit humanam naturam quam in-
 stauravit; aequaliter enim utrumque Deo facile est;
 sed homo antequam esset, non peccavit ut fieri non de-
 beret. Postquam vero factus est, peccando meruit, ut 7
 quod et ad quod factus est perderet; quamvis non
 perdiderit omnino quod factus erat, ut esset qui puni-
 retur aut cui Deus miseretur. Neutrum enim horum 8
 fieri posset, si in nihilum redactus esset. Tanto ergo 9
 mirabilius Deus illum restituit quam instituit, quanto
 hoc de peccatore contra meritum, illud non de pecca-
 tore nec contra meritum fecit. Quantum etiam est Deum 10
 et hominem sic in unum convenire, ut servata integri-
 tate utriusque naturae idem sit homo qui Deus. Quis 11
 ergo praesumat vel cogitare, quod humanus intellectus
 valeat penetrare, quam sapienter, quam mirabiliter tam
 inscrutabile opus factum sit? *Bos.* Assentior quia nul- 12
 lus homo potest in hac vita tantum secretum penitus
 aperire, nec peto ut facias, quod nullus homo facere
 potest; sed tantum quantum potes. Plus enim persua- 13
 debis altiores in hac re rationes latere, si aliquam te
 monstraveris videre, quam si te nullam in ea rationem
 intelligere nihil dicendo probaveris. *Ans.* Video me ab 14
 importunitate tua non posse liberari; sed si aliquate-
 nus potero quod postulas ostendere, gratias agamus Deo.
 Si vero non potero, sufficiant ea quae supra probata
 sunt. Cum enim constat Deum hominem fieri oportere, 15
 dubium non est sapientiam et potentiam illi non deesse,
 ut hoc sine peccato fiat. *Bos.* Sic libenter accipio.
Ans. Oportuit utique ut illa redemptio quam Christus 16
 fecit, prodesset non solum illis qui eo tempore fuerunt,
 sed et aliis. Sit enim rex aliquis, cui totus populus 17
 suae cuiusdam civitatis sic peccavit, excepto uno solo

- qui tamen est de illorum genere, ut nullus eorum facere possit unde mortis damnationem evadat; ille autem qui solus est innocens, tantam apud regem habeat gratiam, ut possit, et tantam dilectionem erga reos, ut velit omnes qui credent suo consilio, reconciliare quodam servitio ipsi regi valde placituro, quod facturus est die
- 18 secundum voluntatem regis statuto. Et quoniam non omnes possunt qui reconciliandi sunt ad diem illam convenire; concedit rex propter magnitudinem servitii illius, ut quicumque vel ante vel post diem illam confessi fuerint, se velle per illud opus quod ea die fiet, veniam impetrare et ad pactum ibi constitutum accedere, ab omni culpa sint absoluti praeterita; et si contigerit ut post hanc veniam iterum peccent, si digne satisfacere et corrigi deinceps voluerint, per eiusdem pacti efficaciam iterum veniam recipiant, sic tamen ut nullus palatium eius ingrediatur, donec factum sit hoc
- 19 unde culpae relaxentur. Secundum hanc similitudinem, quoniam non potuerunt omnes homines qui salvandi erant praesentes esse, quando redemptionem illam Christus fecit, tanta fuit vis in eius morte, ut etiam in absentes vel loco vel tempore eius protendatur effectus.
- 20 Quod autem non solum praesentibus prodesse debeat, hinc facile cognoscitur, quia non tot praesentes esse eius morti potuerunt, quot ad supernae civitatis constructionem necessarii sunt; etiamsi omnes qui eiusdem mortis tempore ubicunque erant, ad illam redemptionem
- 21 admitterentur. Plures enim sunt daemones quam, de quibus restaurandus est numerus eorum, ea die viverent homines. Nec credendum est, ex quo factus est homo ullum tempus fuisse, quo mundus iste cum creaturis quae factae sunt ad usus hominum, sic vacuus fuisset, ut nullus esset in illo ex humano genere ad hoc
- 23 pertinens, propter quod factus est homo. Videtur enim inconveniens quod Deus vel uno momento permiserit

humanum genus et ea quae fecit propter usum eorum, de quibus superna civitas perficienda est, quasi frustra extitisse. Nam aliquatenus in vanum esse viderentur, 24 quamdiu non ad hoc propter quod maxime facta essent viderentur subsistere. *Bos.* Congruenti ratione et cui 25 nihil repugnare videtur monstras, nullum unquam tempus fuisse ex quo factus est homo absque aliquo, qui ad eam pertineret (sine qua factus esset vane omnis homo) reconciliationem; quod non solum conveniens sed etiam necessarium esse possumus concludere. Si 26 enim convenientius et rationabilius est hoc quam aliquando nullum fuisse, de quo intentio Dei qua hominem fecit perficeretur, nec est aliquid quod huic obviet rationi; necesse est semper aliquem ad praedictam reconciliationem pertinentem fuisse. Unde Adam et Evam 27 ad illam pertinuisse redemptionem dubitandum non est, quamvis hoc auctoritas divina aperte non pronunciet.¹⁾ *Ans.* Incredibile quoque videtur, quando Deus illos fe- 28 cit et proposuit immutabiliter facere de illis omnes homines, quos ad coelestem civitatem assumpturus erat, quod illos duos ab hoc excluserit proposito. *Bos.* Imo illos 29 maxime ad hoc fecisse credi debet, ut essent de illis propter quos facti sunt. *Ans.* Bene consideras. Nulla ta- 30 men anima ante mortem Christi paradisum coelestem ingredi potuit, sicut supra dixi de regis palatio. *Bos.* 31 Sic tenemus. *Ans.* Virgo autem illa, de qua ille homo assumptus est de quo loquimur, fuit de illis qui ante nati- vitatem eius per eum mundati sunt a peccatis, et in eius ipsa munditia de illa assumptus est. *Bos.* Placeret 32 mihi multum quod dicis nisi, cum ipse debeat a se ipso habere munditiam a peccato, videtur eam habere a

1) Irenaeo (adv. haer. 1, 30.) teste Tatianus apologeta, interpretatione loci Paulini 1. Cor. 15, 22. controrta deceptus, primus saluti contradixit protoplasti.

33 matre, et non per se mundus esse sed per illam. *Ans.* Non ita est. Sed quoniam matris munditia per quam mundus est, non fuit nisi ab illo, ipse quoque per se ipsum et a se mundus fuit.

- 1 **16 b.** *Bos.* Bene¹⁾ est de hoc. Verum adhuc mihi aliud videtur quaerendum. Diximus enim supra²⁾ quia non necessitate moriturus erat, et nunc videmus quia mater eius per eius mortem futuram munda fuit, quod nisi illa fuisset, ipse de illa esse non potuisset.
- 2 Quomodo ergo non necessitate mortuus est, qui non nisi quia moriturus erat potuit esse? Nam si moriturus non esset, Virgo de qua assumtus est, munda non fuisset, quoniam hoc nequaquam valuit esse nisi veram eius mortem credendo, nec ille de illa
- 3 potuit aliter assumi. Quare si non mortuus est ex necessitate postquam assumtus est de Virgine, potuit non esse assumtus de Virgine postquam est assumtus; quod non est possibile. *Ans.* Si bene quae supra dicta sunt considerasses, sane quaestionem in illis, ut puto, solutam intellexisses. *Bos.* Non video
- 5 quomodo. *Ans.* Nonne, quando quaesivimus³⁾ utrum ille mentiri potuerit, monstravimus, in mentiendo duas esse potestates, unam videlicet volendi mentiri alteram mentiendi; et quoniam, cum mentiendi potestatem haberet, hoc a seipso habuit ut non posset velle mentiri; idcirco de sua iustitia qua veritatem servavit, eum esse laudandum? *Bos.* Ita est. *Ans.* Similiter est in servando vitam potestas volendi servare et potestas servandi. Cum ergo quaeritur, utrum idem Deus homo potuerit servare

1) Unius tantum Codicis (A a) auctoritas Gerberonium adduxit, ut voculam *bene* exordium statueret capituli 17.

2) Cfr. I, 8. 9. 10; II, 10. 11.

3) Supra c. 10, 4. sq.

vitam suam ut nunquam moreretur, dubitandum non est quia semper habuit¹⁾ potestatem servandi; quamvis nequiverit velle servare, ut nunquam moreretur; et quoniam hoc a seipso habuit ut scilicet velle non posset, non necessitate sed libera potestate animam suam posuit.

Bos. Non omnino similes fuerunt in illo istae potestates, mentiendi scilicet et servandi vitam. Ibi enim sequitur, quia si vellet, posset mentiri; hic autem videtur, quia si mori non vellet,²⁾ non magis hoc posset, quam posset non esse quod erat. Nam ad hoc erat homo ut moreretur, et propter huius futurae mortis fidem de Virgine potuit assumi, sicut supra dixisti. *Ans.* Quemadmodum putas illum non potuisse non mori aut necessitate mortuum esse, quia non potuit non esse quod erat; ita potes asserere illum non potuisse velle non mori aut necessitate mori voluisse, quoniam quod erat non esse non potuit; non enim magis ipse factus est homo ad hoc ut moreretur, quam ut vellet mori. Quapropter sicut non debes dicere, quia non potuit non velle mori aut necessitate voluit mori, sic non est dicendum, quia non potuit non mori aut necessitate mortuus est. *Bos.* Imo quoniam eidem subiacent rationi, scilicet et mori et velle mori, utrumque videtur in illo necessitate fuisse. *Ans.* Quis se sponte voluit hominem facere, ut eadem immutabili voluntate moreretur, et per huius fidem certitudinis Virgo munda fieret, de qua homo ille assumeretur? *Bos.* Deus Filius Dei. *Ans.* Nonne monstratum est supra,³⁾ quod Dei voluntas nulla cogitur necessitate, sed ipse se⁴⁾ spontanea sua servat immutabilitate, quando dicitur aliquid necessitate facere? *Bos.* Vere monstratum est.

1) *habuerit* A a.

2) *mori non vellet* A a — *non mori vellet.*

3) c. 5.

4) *ipsa se* A a b c B C E F a.

- 14 Sed videmus econtra, quia quod Deus immutabiliter vult, non potest non esse, sed necesse est esse. Quapropter si Deus voluit ut ille homo moreretur, non
- 15 potuit non mori. *Ans.* Ex eo, quia Filius Dei assumpsit hominem ea voluntate ut moreretur, probas eundem hominem non potuisse non mori. *Bos.* Ita intelligo.
- 16 *Ans.* An non similiter apparuit ex his quae dicta sunt, Filium Dei et assumptum hominem unam esse personam, ut idem sit Deus et homo, filius Dei et Virginis filius?
- 17 *Bos.* Sic est. *Ans.* Idem igitur homo sua voluntate
- 18 non potuit non mori et mortuus est. *Bos.* Negare nequeo. *Ans.* Quoniam ergo voluntas Dei nulla necessitate facit aliquid sed sua potestate, et voluntas illius fuit voluntas Dei, nulla necessitate mortuus est
- 19 sed sola sua potestate. *Bos.* Argumentationibus tuis obviare nequeo; nam nec propositiones quas praemit-
tis, nec consequentias quas infers, ullatenus infirmare
- 20 valeo. Sed tamen hoc mihi semper occurrit quod dixi: quia si vellet non mori, non magis hoc posset, quam non esse quod erat; vere namque moriturus erat, quoniam si vere non fuisset moriturus, non fuisset vera fides futurae mortis eius, per quam et illa Virgo de qua natus est, et alii multi mundati sunt a peccato. Nam si
- 21 vera non fuisset, nihil prodesse potuisset. Quapropter si potuit non mori, potuit facere non esse verum quod
- 22 verum erat. *Ans.* Quare verum erat antequam moreretur, quia moriturus erat? *Bos.* Quoniam hoc ipse
- 23 sponte voluit et immutabili voluntate. *Ans.* Si ergo, sicut dicis, idcirco non potuit non mori, quia vere moriturus erat, et ideo vere erat moriturus, quia hoc ipse sponte et immutabiliter voluit; sequitur illum non ob aliud non potuisse non mori, nisi quia immutabili
- 24 voluntate voluit mori. *Bos.* Ita est; sed quaecunque fuerit causa, verum est tamen quia non potuit non mori,
- 25 et necesse fuit illum mori. *Ans.* Nimis haeres in nihilo

et (ut dici solet) quaeris nodum in scirpo.¹⁾ *Bos.* An 26
 es oblitus, quid obiecerim excusationibus tuis in huius
 disputationis nostrae principio, quia videlicet quod
 postulabam non faceres doctis, sed mihi et hoc ipsum
 mecum petentibus? Sustine igitur, ut pro tarditate et 27
 hebetudine nostri ingenii quaeram, quatenus mihi et
 illis etiam in puerilibus quaestionibus, sicut incepisti,
 satisfacias.

17. *Ans.* Iam diximus, quia Deus improprie dici- 1
 tur aliquid non posse aut necessitate facere. Omnis
 quippe necessitas et impossibilitas eius subiacet volun-
 tati. Illius autem voluntas nulli subditur necessitati aut
 impossibilitati. Nihil enim est necessarium aut impossi- 2
 bile, nisi quia ipse ita vult; ipsum vero aut velle aut
 nolle aliquid propter necessitatem aut impossibilitatem,
 alienum est a veritate. Quare, quoniam omnia quae 3
 vult et non nisi quae vult, facit; sicut nulla necessitas
 sive impossibilitas praecedit eius velle aut nolle, ita nec
 eius facere aut non facere, quamvis multa velit immu-
 tabiliter et faciat. Et sicut cum Deus facit aliquid, 4
 postquam factum est, iam non potest non esse factum
 sed semper verum est factum esse, nec tamen recte
 dicitur impossibile Deo esse, ut faciat quod praeteritum
 est non esse praeteritum; nihil enim ibi operatur ne-
 cessitas non faciendi aut impossibilitas faciendi, sed
 Dei sola voluntas, qui veritatem semper (quia ipse ve-
 ritas est) immutabilem, sicut est, esse vult. Ita si pro- 5
 ponit se aliquid immutabiliter facturum, quamvis quod
 proponit antequam fiat non possit non esse futurum,
 non tamen ulla est in eo faciendi necessitas aut non
 faciendi impossibilitas, quia sola operatur in ea volun-

1) Ex *Terentii Andria* act. 5 sc. 4 v. 39 sumsit
 hoc proverbium S. Anselmus.

- 6 tas. Quotiens namque dicitur Deus non posse, nulla
negatur in eo potestas, sed insuperabilis significatur
potentia et fortitudo. Non enim aliud intelligitur, nisi quia
nulla res potest efficere, ut agat ille quod negatur posse.
- 7 Nam multum usitata est huiusmodi locutio, ut dicatur
res aliqua posse, non quia in illa sed quoniam in alia
re est potestas; et non posse, non quoniam in illa sed
8 quia in alia re est impotentia. Dicimus namque: iste
homo potest vinci, pro: aliquis potest eum vincere; et:
ille non potest vinci, pro: nullus eum vincere potest.
- 9 Non enim potestas est posse vinci sed impotentia, nec
10 vinci non posse impotentia est sed potestas. Nec dici-
mus Deum necessitate facere aliquid eo, quod in illo
sit ulla necessitas, sed quoniam est in alio, sicut dixi
11 de impotentia, quando dicitur non posse. Omnis quippe
necessitas est aut coactio aut prohibitio; quae duae
necessitates convertuntur invicem contrarie, sicut ne-
12 cesse et impossibile. Quidquid namque cogitur esse,
prohibetur non esse, et quod cogitur non esse, prohi-
betur esse; quemadmodum quod necesse est esse, im-
possibile est non esse, et quod necesse est non esse,
13 impossibile est esse, et conversim. Cum autem dicimus
aliquid necesse esse aut non esse in Deo, non intelli-
gitur, quod sit in illo necessitas aut cogens aut prohi-
bens, sed significatur, quod in omnibus aliis rebus est
necessitas prohibens eas facere et cogens non facere;
14 contra hoc quod de Deo dicitur. Nam cum dicimus,
quod necesse est Deum semper verum dicere et necesse
est eum nunquam mentiri; non dicitur aliud, nisi quia
tanta est in illo constantia servandi veritatem, ut ne-
cesse sit nullam rem facere posse, ut verum non dicat
15 aut ut mentiatur. Quapropter cum dicimus, quia homo
ille, qui secundum unitatem personae (sicut supra¹⁾ di-

1) c. 7.

ctum est) idem ipse est qui Filius Dei Deus, non potuit non mori aut velle non mori, postquam de Virgine natus est; non significatur in illo ulla impotentia servandi aut volendi servare vitam suam immortalem, sed immutabilitas voluntatis eius, qua se sponte fecit hominem ad hoc ut in eadem voluntate perseverans moreretur, et quia nulla res potuit illam voluntatem mutare. Plus enim esset impotentia quam 16 potentia, si posset velle mentiri aut fallere aut mutare voluntatem, quam prius immutabilem esse voluit. Et 17 si (quemadmodum supra¹⁾ dixi) cum aliquis sponte se proponit facturum bonum aliquod, et eadem voluntate postea perficit quod proposuit; quamvis cogi possit si nolit promissum solvere, non tamen dicendus est necessitate facere quod facit, sed ea qua proposuit libera voluntate; non enim necessitate aut impotentia fieri vel non fieri dici debet aliquid, ubi neque necessitas neque impotentia quidquam operantur sed voluntas; — si, inquam, ita est in homine, multo magis necessitas aut impotentia nequaquam nominandae sunt in Deo, qui nihil nisi quod vult facit, et cuius voluntatem nulla vis cogere aut prohibere valet. Ad hoc enim valuit in 18 Christo diversitas naturarum et unitas personae, ut quod opus erat fieri ad hominum restaurationem si humana non posset natura, faceret divina, et si divinae minime conveniret, exhiberet humana; et non alius atque alius sed idem ipse esset, qui utrumque existens perfecte per humanam solveret quod illa debebat, et per divinam posset quod expediebat. Denique Virgo quae per fidem 19 munda facta est, ut de illa posset assumi, nequaquam credidit illum esse moriturum nisi quia vellet; quemadmodum per prophetam, qui de illo dixit: „oblatus est, quia ipse voluit“,²⁾ didicerat. Quapropter quoniam 20

1) c. 5, 3 sq. 2) Isai. 53, 7.

- vera fuit fides eius, necesse erat ita futurum esse, sicut credidit. Quod si te iterum perturbat, quia dico, necesse erat; memento, quia veritas fidei Virginis non fuit causa ut ille sponte moreretur, sed quia hoc futurum erat, vera fuit fides. Quamobrem si dicitur, necesse erat ut voluntate sola moreretur, quia vera fuit fides sive prophetia quae de hoc praecesserant, non est aliud quam si dicas, necesse fuisse ita futurum esse, quoniam sic futurum erat; huiusmodi autem necessitas non cogit rem esse, sed esse rei facit necessitatem esse.
- 21
- 22 Est namque necessitas praecedens, quae causa est ut sit res; et est necessitas sequens, quam res facit. Praecedens et efficiens necessitas est, cum dicitur coelum volvi, quia necesse est ut volvatur. Sequens vero et quae nihil efficit sed fit, est, cum dico te ex necessitate
- 23 loqui, quia loqueris. Cum enim hoc dico, significo nihil facere posse, ut dum loqueris non loquaris, non quod alius te cogat ad loquendum. Nam violentia naturalis conditionis cogit coelum volvi; te vero nulla
- 24 necessitas facit loqui. Sed ubicunque est praecedens necessitas, est et sequens; non autem ubi sequens ibi statim et praecedens. Possumus namque dicere, necesse est coelum volvi, quia volvitur; sed non similiter est verum, idcirco te loqui, quia necesse est ut loquaris.
- 25
- 26 Ista sequens necessitas currit per omnia tempora hoc modo: Quidquid fuit, necesse est fuisse. Quidquid est, necesse est esse. Quidquid futurum est, necesse est futurum fuisse. Haec est illa necessitas, quae (ubi tractat Aristoteles¹⁾ de propositionibus singularibus et futuris) videtur utrumlibet destruere et omnia esse ex

1) *Aristoteles* περὶ ἑρμηνείας c. 9: „οὐδὲν οὔτε ἔστιν οὔτε γίνεται οὔτε ἀπὸ τύχης οὔθ' ὁπότερ' ἔτυχεν, οὐδὲ ἔσται ἢ οὐκ ἔσται, ἀλλ' ἐξ ἀνάγκης ἅπαντα καὶ οὐχ ὁπότερ' ἔτυχεν.“

necessitate astruere. Hac sequenti et nihil efficienti 27
 necessitate, quoniam vera fuit fides vel prophetia de
 Christo, quia ex voluntate non ex necessitate moriturus
 erat, necesse fuit ut sic esset; hac homo factus est; hac
 fecit et passus est quidquid fecit et passus est; hac vo-
 luit quaecumque voluit. Ideo enim necessitate fuerunt 28
 quia futura erant, et futura erant quia fuerunt, et fu-
 erunt quia fuerunt; et si vis omnium quae fecit et quae
 passus est, veram scire necessitatem, scito omnia
 ex necessitate fuisse, quia ipse voluit. Voluntatem vero 29
 eius nulla praecessit necessitas. Quare si non fuerunt
 nisi quia ipse voluit, si non voluisset non fuissent. Sic
 itaque nemo tulit animam eius ab illo, sed ipse posuit
 eam et iterum sumpsit eam; quia potestatem habuit po-
 nendi animam suam et iterum sumendi eam, sicut ipse
 dixit.¹⁾ *Bos.* Satisfecisti mihi, illum non posse probari 30
 ulla necessitate mortem subiisse; nec me poenitet, ut
 hoc faceres importunum tibi extitisse. *Ans.* Ostendi- 31
 mus, ut puto, certam rationem, quomodo Deus assum-
 serit hominem sine peccato de massa peccatrice; sed
 nequaquam negandum aestimo aliam esse praeter istam
 quam diximus, excepto hoc quia Deus facere potest,
 quod hominis ratio comprehendere non potest. Verum 32
 quoniam et ista mihi videtur posse sufficere, et si aliam
 nunc inquirere vellem necesse esset investigare, quid
 sit originale peccatum et quomodo a primis parentibus
 in universum genus humanum praeter illum, de quo agi-
 mus, hominem diffundatur; et incidere in quasdam
 alias quaestiones quae suum postulant tractatum; ea,
 quam diximus, ratione contenti quae de incepto restant
 opere prosequamur. *Bos.* Ut vis; sed eo pacto, ut tu 33
 aliquando auxiliante Deo illam aliam rationem, quam
 nunc inquirere vitas, quasi debitum exsolvas. *Ans.* 34

1) Cfr. Ioann. 10, 18.

- Quoniam voluntatem hanc scio me gerere, quod petis non denego; sed quia de futuris incertus sum, promittere non audeo sed Dei dispositioni committo.¹⁾ Sed die nunc, quid tibi de quaestione quam in principio proposuisti, propter quam aliae multae se ingesserunt, persolvendum videatur. *Bos.* Summa quaestionis fuit, cur Deus homo factus sit, ut per mortem suam salvaret hominem, cum hoc alio modo potuisse facere videatur.
- 35 Ad quam tu multis et necessariis rationibus respondens ostendisti restaurationem humanae naturae non debuisse remanere nec potuisse fieri, nisi solveret homo quod pro peccato Deo debebat; quod debitum tantum erat, ut illud, cum non deberet solvere nisi homo, non posset nisi Deus; ita ut idem esset homo qui et Deus.
- 36 Unde necesse erat ut Deus assumeret hominem in unitatem personae, quatenus qui in natura solvere debebat et non poterat, in persona esset quae posset. Denique quia de Virgine et a persona Filii Dei esset assumendus homo ille, qui Deus esset; et quomodo sine peccato de massa peccatrice assumi potuerit, monstrasti.
- 37 Vitam autem huius hominis tam sublimem tam pretiosam apertissime probasti, ut sufficere possit ad solvendum quod pro peccatis totius mundi debetur, et plus in infinitum. Restat ergo nunc ostendere, quomodo illa solvatur Deo pro peccatis hominum.
- 38
- 39
- 40

1) Retractavit hanc materiam S. Anselmus biennio ferme post in libro, quem „*de conceptu virginali et originali peccato*“ inscriptum ad Bosonem direxit (*Gerberon* fol. 97 sq.), et quidem ita, ut Deum monstrarit etiam de peccatricis Virginis substantia, quoniam nusquam sit in hominis natura praeter voluntatem peccatum, prolem debuisse iustam, imo non nisi iustam, propagatione non naturali producere.

18. *Ans.* Si ¹⁾ propter iustitiam se permisit occidi, nonne ad honorem Dei vitam suam dedit? *Bos.* 2
 Si possum intelligere quod non dubito, quamvis non videam quomodo rationabiliter hoc fecerit; et cum et iustitiam indeclinabiliter et vitam suam aeternaliter servare potuerit, fatebor illum tale quid sponte dedisse Deo ad honorem illius, cui quicquid quod Deus non est comparari non potest, et quod pro omnibus omnium hominum debitis recompensari potest. *Ans.* An non intelligis, quia cum iniurias et contumelias et mortem crucis cum latronibus sibi (sicut supra ²⁾ diximus) propter iustitiam quam obedienter servabat, illatas benigna patientia sustinuit; exemplum dedit hominibus, quatenus propter nulla incommoda quae sentire possunt, a iustitia quam Deo debent, declinent; quod minime dedisset, si secundum potentiam suam mortem pro tali causa illatam declinasset? *Bos.* Videtur quod ipse nulla hoc ⁴
 exemplum necessitate dederit, quoniam multi ante adventum eius et Ioannes baptista post adventum ante mortem eius, fortiter mortem pro veritate sustinentes illud sufficienter dedisse noscuntur. *Ans.* Nullus unquam ⁵
 homo praeter illum moriendo Deo dedit quod aliquando necessitate perditurus non erat, aut solvit quod non debebat. Ille vero sponte Patri obtulit quod nulla necessitate unquam amissurus erat, et solvit pro peccatoribus quod pro se non debebat. Quapropter ille ⁶
 multo magis dedit exemplum, ut unusquisque quod aliquando incunctanter amissurus est, pro se ipso reddere Deo, cum ratio postulat, non dubitet, qui cum nullatenus aut pro se indigeret aut cogeretur pro aliis, quibus nihil nisi poenam debebat, tam pretiosam vitam

1) In Mscr. hic incipit c. 18.

2) Cfr. c. 11, 25 sq.

- imo seipsum, tantam scilicet personam tanta voluntate
7 dedit. *Bos.* Multum propinquas desiderio meo; sed
sustine ut quiddam quaeram, quod quamvis fatuum for-
sitan putes quaerere, non tamen in promptu mihi est
8 quid respondeam, si a me quaeratur. Dicis quia,
quando mortuus est, dedit quod non debebat. Sed
nemo negabit illum melius fecisse, quando hoc exem-
plum taliter dedit, et magis hoc placere Deo, quam
si non hoc fecisset; aut dicet eum non debuisse facere,
quod melius esse et quod magis placere Deo intellexit.
9 Quomodo ergo asseremus eum non debuisse Deo quod
fecit i. e. quod melius esse et magis placere Deo in-
tellexit, praesertim cum creatura debeat Deo totum,
10 quod est et quod scit et quod potest? *Ans.* Quamvis
creatura nihil habeat a se, quando tamen illi Deus con-
cedit aliquid licite facere et non facere, dat illi ita
suum esse utrumque, ut licet alterum sit melius, neu-
trum tamen exigatur determinate; sed sive faciat
quod melius est sive alterum, debere facere dicatur
quod facit; et si facit quod melius est, praemium habet;
11 quia sponte dat quod suum est. Nam cum virginitas
melior sit coniugio, neutrum tamen ab homine deter-
minate exigitur; sed et qui coniugio uti et qui virgini-
tatem servare mavult, quod facit debere facere dicitur.
12 Nemo enim virginitatem sive coniugium dicit eligi non
debere; sed dicimus, quia quod mavult homo, antequam
aliquid horum statuat, hoc debet facere; et si virgini-
tatem servat, pro spontaneo munere quod offert Deo
13 praemium expectat. Cum ergo creaturam dicis Deo
debere quod melius scit et potest, si intelligis ex de-
bito et non subaudis, si Deus iubet, non est semper ve-
rum. Siquidem, ut dixi, non debet homo virginitatem
14 ex debito, sed si mavult, debet uti coniugio. Quod si
te movet verbum quod est debere, nec potes illud in-
telligere sine aliquo debito, scito, quia sicut contingit

posse et non posse et necessitatem aliquando dici, non quia sunt in rebus ubi dicuntur, sed quoniam sunt in alio, ita et debere. Quippé cum dicimus debere pauperes a divitibus eleemosynam accipere, non est aliud quam divites debere pauperibus eleemosynam impendere; hoc namque debitum non est exigendum a paupere sed a divite. Deus quoque dicitur omnibus debere praeesse, non quia ille in hoc aliquo modo sit debitor, sed quoniam omnia debent illi subesse, et debere facere quod vult, quoniam quod vult debet esse. Ita quando vult aliqua creatura facere, quod suum est facere et non facere, dicitur debere facere, quia quod ipsa vult debet esse. Dominus itaque Iesus, cum mortem (sicut diximus) sustinere voluit, quoniam suum erat et pati et non pati, debuit facere quod fecit, quia quod voluit fieri debuit, et non debuit facere, quia non ex debito. Nempe quoniam ipse idem est Deus et homo, secundum humanam quidem naturam ex quo fuit homo sic accepit a divina natura, quae alia est ab humana, esse suum quidquid habebat, ut nihil deberet dare nisi quod volebat; secundum personam vero sic a seipso habebat quod habebat¹⁾ et sic perfecte sibi sufficiens erat, ut nec alii quicquam retribuere deberet, nec ut sibi retribuere dare indigeret. *Bos.* Aperte nunc video, quia nulla ratione seipsum morti ex debito, sicut ratio mea videbatur monstrare, dedit ad honorem Dei, et tamen facere debuit quod fecit. *Ans.* Honor utique ille totius est Trinitatis; quare quoniam idem ipse est Deus Filius Dei, ad honorem suum seipsum sibi sicut Patri et Spiritui sancto obtulit i. e. humanitatem suam divinitati suae, quae una eadem trium personarum est. Ut tamen in eadem ipsa veritate manentes apertius loquamur quod volumus, dicamus sicut usus

1) *habebat quicquid habebat A a.*

habet, quia Filius sponte se ipsum Patri obtulit; hoc namque modo apertissime dicitur, quia et in una persona totus Deus cui secundum hominem se obtulit, intelligitur; et per nomen Patris et Filii immensa quaedam in cordibus audientium, cum Patrem Filius hoc modo postulare pro nobis dicitur, pietas sentitur. *Bos.* Hoc libentissime accipio.

- 1 **19.** *Ans.* Intueamur¹⁾ nunc prout possumus, quanta inde ratione sequatur humana salvatio. *Bos.* Ad hoc tendit cor meum. Nam quamvis hoc mihi videri intelligere, ipsam tamen rationis contextionem a
- 2 te volo fieri. *Ans.* Quantum autem sit quod Filius sponte dedit, non est opus exponere. *Bos.* SuffICIENTER patet.
- 3 *Ans.* Eum autem qui tantum donum sponte dat Deo,
- 4 sine retributione debere esse non iudicabis. *Bos.* Imo necesse esse video, ut Pater Filio retribuatur; alioquin aut iniustus esse videtur si nollet, aut impotens si non
- 5 posset; quae aliena sunt a Deo. *Ans.* Qui retribuit alicui, aut dat quod ille non habet, aut dimittit quod ab illo potest exigi. Prius autem quam tantam rem Filius faceret, omnia quae Patris erant, sua erant; nec un-
- 6 quam debuit, quod illi dimitti possit. Quid ergo retribuetur nullius rei egenti, et cui non est quod dari aut dimitti possit? *Bos.* Ex una parte video retribuendi necessitatem et ex altera impossibilitatem; quia et necesse est Deum reddere quod debet, et non est cui red-
- 7 dat. *Ans.* Si tanta et tam debita merces nec illi nec alii reddatur, in vanum Filius tantam rem fecisse vide-
- 8 bitur. *Bos.* Hoc nefas est aestimare. *Ans.* Necesse est ergo ut alicui alii reddatur, quia illi non potest. *Bos.*
- 9 Inevitabiliter sequitur. *Ans.* Si voluerit Filius quod

1) In Mscr. hic incipit c. 19.

sibi debetur alii dare, poteritne Pater iure illum prohibere, aut alii cui dabit negare? *Bos.* Imo et iustum 10 et necessarium intelligo, ut cui voluerit dare Filius, a Patre reddatur; quia et Filio quod suum est dare licet, et Pater quod debet non nisi alii reddere potest. *Ans.* 11 Quibus convenientius fructum et retributionem suae mortis attribuet¹⁾ quam illis, propter quos salvandos (sicut ratio veritatis nos docuit) hominem se fecit, et quibus (ut diximus) moriendo exemplum moriendi propter iustitiam dedit? frustra quippe imitatores eius erunt, si meriti eius participes non erunt. Aut quos 12 iustius faciet haeredes debiti quo ipse non eget, et exundantiae suae plenitudinis, quam parentes suos et fratres, quos aspicit tot et tantis debitis obligatos egestate tabescere in profundo miseriarum, ut eis dimittatur quod pro peccatis debent, et detur quo propter peccatum carerent? *Bos.* Nihil rationabilius, nihil dulcius, nihil desiderabilius mundus audire potest. Ego quidem²⁾ tantam fiduciam ex hoc concipio, ut iam dicere non possim, quanto gaudio exultet cor meum. Videtur enim mihi, quod nullum hominem reiiciat Deus ad se sub hoc nomine accedentem. *Ans.* Ita est, si accedit sicut 14 oportet. Quemadmodum³⁾ autem sit ad tantae gratiae

1) *attribueret B.*

2) *quidem A a b c B E F a — quippe (enim).*

3) *S. Anselmus, quum hoc in opere obiectivam reconciliationis partem spectarit inquirendam, non potuit non obiter tantum perstringere quaestionem de applicatione et participatione gratiae per mortem Domini Iesu Christi acquisitae, qua homines consequuntur remissionem peccatorum. Cfr. de fide humana et imputatione divina hos locos: Lib. I. c. 20, 16 [„credunt in eum“]; Lib. II. c. 16 a, 19; c. 19, 11. [„quibus convenientius fructum et retributionem suae mortis attribuet, quam illis, propter quos salvandos hominem se fecit.“] et c. 20,*

- participationem accedendum et quomodo sub illa vivendum, nos ubique sacra scriptura docet, quae super solidam veritatem, quam adiuvante Deo aliquatenus perspeximus, velut super firmum fundamentum fundata est.¹⁾
- 15 *Bos.* Vere quidquid super fundamentum hoc aedificatur,
 16 super firmam petram fundatur. *Ans.* Puto me aliquantulum iam tuae satisfecisse quaestioni, quamvis hoc melior me facere plenius possit, et maiores atque plures quam meum aut mortale ingenium comprehendere valeat, huius rei sint rationes. Palam etiam est, quia Deus, ut hoc faceret quod diximus, nullatenus indigebat; sed ita veritas immutabilis exigebat; licet enim hoc quod homo ille fecit, Deus dicatur fecisse propter unitatem personae, Deus tamen non egebat ut de coelo descenderet ad vincendum diabolum, neque ut per iustitiam ageret contra illum ad liberandum hominem; sed ab homine Deus exigebat, ut diabolum vinceret et qui per peccatum Deum offenderat, per iustitiam satisfaciatur. Siquidem diabolo nec Deus aliquid debebat nisi poenam, nec homo nisi vicem, ut ab illo victus illum revinceret; sed quidquid ab illo exigebatur, hoc Deo debebat non diabolo.

- 1 **20.** *Ans.* Misericordiam vero Dei quae tibi perire videbatur, cum iustitiam Dei et peccatum hominis considerabamus, tam magnam tamque concordem iustitiae invenimus, ut nec maior nec iustior cogitari possit. Nempe quid misericordius intelligi valet, quam cum peccatori tormentis aeternis damnato et unde se redi-

2. [Peccatori Deus Pater dicit: *accipe Unigenitum meum et da pro te*; et ipse Filius: *tolle me et redime te*].

1) Cfr. Lib. I. c. 18, 43 et quae ibi ex S. *Ans.* Tract. de Conc. grat. c. lib. arbitr. et Eadmeri biographia attuli effata.

mat non habenti, Deus Pater dicit: accipe Unigenitum meum et da pro te; et ipse Filius: tolle me et redime te? Quasi enim hoc dicunt, quando nos ad christianam fidem vocant et trahunt. Quid etiam iustius, quam ut ille cui datur pretium maius omni debito, si debito datur affectu, dimittat omne debitum?

21. Diaboli vero reconciliationem de qua quaesivisti, impossibilem intelliges, si diligenter humanam consideres. Sicut enim homo non potuit reconciliari nisi per hominem Deum, qui mori posset, per cuius iustitiam Deo restitueretur quod per peccatum hominis perdidit; ita angeli damnati non possunt salvari nisi per angelum Deum, qui mori possit et qui per iustitiam suam Deo reparet, quod aliorum peccata abstulerunt. Et sicut homo per alium hominem qui non esset eiusdem generis, quamvis eiusdem esset naturae, non debuit relevari, ita nullus angelus per alium angelum salvari debet, quamvis omnes sint unius naturae, quoniam non sunt eiusdem generis sicut homines.¹⁾ Non enim sic sunt omnes angeli de uno angelo, quemadmodum omnes homines de uno homine. Hoc quoque removet eorum restorationem, quia sicut ceciderunt nullo alio nocente ut caderent, ita nullo alio adiuvante resurgere debent; quod est illis impossibile. Aliter enim in dignitatem quam habituri erant, non possunt restitui; quoniam sine alieno auxilio per potestatem suam quam acceperant, stetissent in veritate, si non peccassent. Quapropter si quis opinatur Salvatoris nostri redemptionem usque ad illos aliquando debere extendi, rationabiliter

1) „Est unusquisque *filius Adae* et homo per *creationem*, et *Adam* per *propagationem*, et *persona* per *individualitatem*, qua discernitur ab aliis.“ *De conceptu virginali* c. 10.

8 convincitur, quia rationabiliter decipitur. Quod non dico, quasi pretium mortis eius omnibus hominum et angelorum peccatis sua magnitudine non praevaleat, sed quoniam perditorum angelorum relevationi immutabilis ratio repugnat.

- 1 **22.** *Bos.* Rationabilia et quibus nihil contradici possit, quae dicis omnia mihi videntur; et per unius quaestionis quam proposuimus solutionem, quidquid in novo veterique Testamento continetur probatum intel-
- 2 ligo. Cum enim sic probes Deum fieri hominem ex necessitate, ut etiam si removeantur pauca quae de nostris libris posuisti (ut quod de tribus personis Dei et de Adam tetigisti) non solum Iudaeis sed etiam Paganis sola ratione satisfacias; et ipse idem Deus homo novum condat testamentum et vetus approbet: sicut ipsum veracem esse necesse est confiteri, ita nihil quod in illis
- 3 continetur, verum esse potest aliquis diffiteri. *Ans.* Si quid diximus quod corrigendum sit, non renuo correctionem, si rationabiliter fit. Si autem testimonio veritatis roboratur, quod nos rationabiliter invenisse existimamus, Deo non nobis attribuere debemus, Qui est benedictus in saecula. Amen.
-

INDEX

LOCORUM SCRIPTURAE SACRAE.

<i>Deut.</i>	32	8	35		<i>Ioann.</i>	8	34	11
<i>Psaln.</i>	50	7	72			8	55	62
	77	39	11			10	17. 18	19. 83
	109	7	15			14	31	13
<i>Eccli.</i>	18	1	30			16	15	15
<i>Isai.</i>	53	7	19. 81			18	11	13
<i>Ezech.</i>	18	27	42		<i>Act. Ap.</i>	3	17	71
	33	14sq.	42			10	35	32
<i>Mth.</i>	3	17	12		<i>Rom.</i>	5	12	72
	6	12	40			8	32	13. 16
	7	12	42		<i>1. Cor.</i>	2	8	71
	26	39	13. 16			15	22	75
	26	42	13. 16		<i>2. Cor.</i>	9	7	27
<i>Luc.</i>	2	52	16		<i>Gal.</i>	5	6	42
	10	22	15		<i>Phil.</i>	2	8. 9	13. 14
	23	34	71		<i>Col.</i>	2	14	10
<i>Ioann.</i>	6	38	13. 16		<i>Ebr.</i>	5	8	13
	6	44	17		<i>Iac.</i>	1	17	17
	6	70	37		<i>1. Ptr.</i>	3	15	1
	7	16	16					

**TYPIS EXPRESSIT OFFICINA AULICA ALTENBURGENSIS.
(H. A. PIERER.)**

MAR 21 '68

MAR 31 1977

JUN 1 1967



ANSELM, Saint
Cur Deus homo

604.7
A60.4cd
1857
cop.1

